

Milik Departemen P dan K  
Tidak diperdagangkan  
Untuk umum


# Hikayat Gajah Tujoh Ulee

Ramli Harun



Rektorat  
Kebudayaan

Departemen Pendidikan dan Kebudayaan



899. 2292

RAM  
h

PPS/Ac/3/82

Milik Dep. P dan K  
Tidak diperdagangkan

# Hikayat GAJAH TUJOH ULEE

MILIK KEPUSTAKAAN  
DIREKTORAT TRADISI  
SITJEN NBSF DEPBUDPAR

Dialihaksarakan oleh  
RAMLI HARUN

KEPUSTAKAAN  
DIT. TRADISI SASTRA NBSF  
DEPBUDPAR  
NO. INV : 2765  
PEROLEHAN :  
TGL : 4-5-83  
SANDI PUSTAKA :

Departemen Pendidikan dan Kebudayaan  
PROYEK PENERBITAN BUKU SASTRA  
INDONESIA DAN DAERAH  
Jakarta 1983



Diterbitkan oleh  
Proyek Penerbitan Buku Sastra  
Indonesia dan Daerah

Hak pengarang dilindungi undang-undang

|                                  |                   |
|----------------------------------|-------------------|
| PERPUSTAKAAN                     |                   |
| DIT. SEJARAH & NILAI TRADISIONAL |                   |
| Nomor Induk                      | : 1601/1984       |
| Tanggal terima                   | : 26-12-1984      |
| Belihadiab dari                  | : proyek PBSI & D |
| Nomor buku                       | :                 |
| Kopi ke                          | : 4               |

## KATA PENGANTAR

Bahagiailah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalan karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalan sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra daerah Aceh, yang berasal dari Museum Banda Aceh, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1983

Proyek Penerbitan Buku Sastra  
Indonesia dan Daerah

## DAFTAR ISI

|   |     |
|---|-----|
| Pengantar .....   | 7   |
| Ringkasan .....   | 9   |
| Mukaddimah .....  | 13  |
| 1. Meureudom Bunga Jicok le Gajah .....                           | 15  |
| 2. Banta Ali Poh Gajah Tujoh Ulee .....                           | 36  |
| 3. Putroe Meulu Meukawen ngon Banta Ali .....                     | 61  |
| 4. Raja SAMILON Keumeung Reubot Putroe .....                      | 79  |
| 5. Banta Ali Woe U Nanggroe Yaman .....                           | 105 |
| 6. Nanggroe Yaman Jiprang le Cina .....                           | 141 |
| 7. Falak antara Jak Tueng Bila .....                              | 170 |
| 8. Meureudom Bunga Woe Bak Abi Banta Ali Geuboh keu<br>Raja ..... | 194 |



## PENGANTAR

Naskah hikayat Gajah Tujoh Ulee ini kami peroleh dari Museum Banda Aceh bulan Juni 1982. Ditulis dengan huruf Arab bahasa Aceh dengan ukuran 21 X 16 Cm. Melihat dari kertas yang digunakan naskah ini diperkirakan sudah berumur lebih dari setengah abad. Tidak terdapat nama pengarang atau penyalinnya seperti umumnya pada hikayat-hikayat Aceh lainnya. Hanya pada halaman terakhir disebutkan bahwa hikayat ini mulai ditulis pada hari Ahad tanggal dua belas bulan Rajab dan selesai malam Selasa bulan Jumadilawal. Tidak ada tahunnya. Selain itu tertera pula dalam huruf latin nama Ismail Tengku Daud, Tanjung Dayah Baru Mukim Tungkop. Mungkin nama ini sebagai pemilik naskah.

Selain nama Meureudom Bunga sebagai tokoh utama dalam hikayat ini, nama-nama tokoh lain berbeda dengan nama-nama tokoh yang tercantum dalam buku *The Achehnese*. Dengan demikian dapat dipastikan bahwa naskah ini pun bukan naskah hikayat Gajah Tujoh Ulee yang dibicarakan oleh Dr. Snouck Horgrunye.

Hikayat yang bersambung setebal 311 halaman ini telah kami alih aksarakan ke dalam huruf Latin dengan membaginya menjadi delapan judul isi untuk memudahkan para pembaca mengikuti jalan ceritanya. Untuk sekedar memberi gambaran isinya, kami sertakan ringkasan ceritanya. Bagi penggemar dan pengamat sastra daerah kiranya hikayat ini dapat menjadi salah satu bahan yang berguna.

Jakarta Februari 1983

Ramil Harun

## RINGKASAN HIKAYAT GAJAH TUJUH ULEE

Negeri Indra Sarah yang makmur diperintah oleh raja Ahmad. Baginda selalu berdo'a agar dikaruniai seorang anak. Tuhan mengabulkan doa baginda. Permaisuri Cahya Geumilang melahirkan seorang putri dan diberi nama Meureudom Bunga. Baginda pernah bernazar jika mendapat anak akan diserahkan kepada Raja gajah berkepala tujuh. Tetapi ketika putrinya lahir, permaisuri tidak mau menyerahkannya sehingga kawanan gajah datang menyerang. Karena tidak dapat menahan serangan hewan itu akhirnya baginda menyerahkan putrinya dibawa oleh raja gajah.

Adapun anak raja Yaman bernama Banta Ali pada suatu malam bermimpi melihat seorang putri cantik di atas kepala seekor gajah. Dengan ditemani seorang pahlawan bernama Ali Hareudan, Banta Ali sampai di padang Hiram Cahya, tempat Meureudom bunga tinggal bersama gajah. Di sana Banta Ali berkenalan dengan putri itu dan mereka saling jatuh cinta. Dalam usaha membunuh gajah itu Banta Ali terlempar jauh dan jatuh di bawah seponon kayu dalam keadaan pingsan.

Seekor raja kera yang berkuasa di sebuah daerah yang luas ketika sedang berjalan-jalan dengan permaisurinya, menemukan Banta Ali tergeletak dalam keadaan pingsan lalu diobatinya. Raja kera itu berjanji akan membantu Banta Ali dalam mendapatkan putri Meureudom Bunga.

Dengan ilmu yang dipelajarinya dari raja kera, akhirnya Banta Ali dapat mengalahkan raja gajah itu. Bersama Ali Hareudan Banta Ali membawa pulang putri Meureudom Bunga. Di suatu tempat ketika Banta Ali sedang tidur nyenyak kedua kaki dan tangannya dipotong oleh Ali Hareudan. Kepada raja dikatakan bahwa Banta Ali sudah meninggal dan ia sendiri yang telah membunuh gajah tujuh kepala itu. Ia pun diangkat menjadi raja Yaman menggantikan raja Abdullah.

Banta Ali diobati sampai sembuh oleh seorang perempuan bernama Nilam Capa. Putri Meulu yang sedang bertapa dalam sebuah gua menerima tangan dan kaki Banta Ali dari malaikat de-

ngan pesan supaya ia kawin dengan Banta Ali. Semula Banta Ali merasa berat menerima pesan itu karena dirinya cacat. Tetapi sesudah berulang kali didesak, barulah ia bersedia dan dengan bantuan tiga orang Syiah kedua tangan dan kakinya kembali seperti semula.

Tiada berapa lama kemudian Banta Ali dan isterinya putri Meulu, tiba di negeri Yaman. Rencana perkawinan Ali Hareudan dengan Meureudom Bunga dapat digagalkan oleh Banta Ali bersama putri Meuleu. Ali Hareudan tewas di tangan Banta Ali akibat pengkhianatannya. Raja Yaman terharu menyambut kedatangan putranya yang disangkanya sudah meninggal. Banta Ali dinikahkan dengan Meureudom Bunga sesudah diangkat sebagai raja negeri Yaman.

Kecantikan putri Meureudom Bunga diketahui oleh seorang raja dari negeri Cina. Dengan armadanya yang besar ia menuju negeri Yaman. Banta Ali dan putri Meulu disihir, dan Meureudom Bunga dibawa lari ke negeri Cina. Seorang guru sakti bernama Falak Antara dapat memulihkan kembali semua orang yang kena sihir, dan bersama putri Meulu dan beberapa orang panglima perang ia terbang ke negeri Cina. Di sana terjadi perang sakti dalam memperebutkan putri Meureudom Bunga. Akhirnya raja Cina menyerah dan putri dibawa pulang ke Yaman. Tak lama kemudian dengan diantar oleh Falak Antara, putri Meureudom Bunga dan Banta Ali berangkat menuju negeri Indra Sarah untuk melihat orang tuanya. Di sana mereka disambut dengan upacara kebesaran oleh baginda raja dan permaisuri. Banta Ali diangkat pula sebagai raja negeri Indra Sarah menggantikan raja Ahmad.



**Hikayat**  
**GAJAH TUJOH ULEE**

# HIKAYAT GAJAH TUJUH ULEE

Bismillahirrahmanirrahim

## MUKADDIMAH

Bismillahi lon puphon surat  
Deungon beureukat saiden anbia  
Ya Tuhanku neubri beu mudah  
Haba indah lon calitra

Beu trang ate ya Tuhanku  
Nyang peungeuh hu sang peulita  
Heundak salen haba indah  
Neubri mudah lon fam bahsa

Beureukat prang sabilillah  
Ngon afuwah dum eelia  
Nibak lon jak jeuep-jeuep teumpat  
Ban-lon surat saboh calitra

Haba raja deungon putroe  
Jiprang nanggroeh uleh Cina  
Di gop dawok geuhareukat  
Timu barat maniaga

Santeut pakat uleebalang  
Geulawan prang ngon Beulanda  
Bak lon duek-duek leumah pike  
Ek meusampe bak lon kira

Hingga sampoe sidroe sahbat  
Geuyue surat saboh calitra  
Geuyue karang saboh hikayat  
Hana dapat ulon meudawa

Mumanyang-manyang gunong Geurutee  
Gunong Cot Ampee Seunanget Daya  
Seubab rakan yue lon sipu malee  
Hana got lagee lon peudong dawa

Di lon han jeuet lon seumurat  
Lagi duson that jarak ngon banda  
U barat jeuoh u timu han trok  
Kamoe di pucok banda Krueng Raya

Ulon seumurat hana meuseuntok  
Kalam pureh jok lon meurika  
Allah hai Po Rabbon Kade  
keu lon neubri troh ban pinta

Beu troh hajat dumna rakan  
Beu ek simpan ban lon rika  
Ulon surat ban nyang mudah  
Ate sosah dalam dada

bak siploh-ploh lon cok saboh  
Mubek gadoh asai punca  
Lon keumarang han got pakhok  
Pureh jok kalam meurika

Allah hai Po Rabbon Kade  
Keu lon neubri ban lon pinta  
Beu troh hajat lon Tuhan bri  
Lon rawi putroe ngon raja

Ulon deungo bak siuroe  
Yoh di nanggroe Aceh Beusa  
Lon kalon han lon tupat tan  
Peuhabaran ureueng tuha

Bahkeu dumnan saboh ato  
Khuteubah le hana gura  
'Ajaeb subhanallah  
Lheueh khuteubah lon calitra

\*\*\*\*\*



## I. MEUREUDOM BUNGA JICOK LE GAJAH

Deungo lon kisah raja meugah that  
Nanggroe mupat mupeue bangsa  
Jinoe lon seubot raja meugah  
Mupat daerah teumpat neuraja

Na saboh nanggroe di ateueh angen  
Luah han ban ngon tapeusa  
Saboh nanggroe sidroe sulotan  
Deungo he teelan lon calitra

Meusyeyuhu that raja meugah  
Raja Husen Syah that peurkasa  
Teukeudi Po Tuhan sidroe  
Raja nanggroe mawot teuka

Abeh langkah ngon raseuki  
Ka troh janji Tuhan Esa  
Tinggai aneuk ureueng lakoe  
Peutimang nanggroe mat neuraca

Banta Abdullah lam keurajeuen  
Pusaka neutueng jeuep-jeuep peukara  
Hukom that ade ateueh rakyat  
Uleebalang peuet peungapet raja

Aneuk rakyat dum lam nanggroe  
Malam uroe neubri aja  
Nyangkeu raja nyang meutuah  
Suroh Allah neukeurija

Pubuet ta'at hana khali  
Pujoe Rabbi Tuhan Esa  
Banda rame hana bagoe  
Sinan sinoe ureueng teuka

Nanggroe luah that meuhalak  
Tunong jarak hana tara  
Kapai datang le siat-at  
Seubab deelat hukom beuna

Juai barang bloe meuneukat  
Wase meuhat lam siploh sa  
Wase gle ngon wase darat  
Keunan geuintat wase kual

Meuh ngon pirak intan le that  
Geudong sarat peuet ploh dua  
That meusyeuhu raja dalam  
Uleebalang dum jiteuka

Bahkeu dumnan teuduek siat  
Lon sambat bak putroe muda  
Cahya Geumilang nan geurasi  
Cut putroe ti judo raja

Rupa indah putroe ahli  
Raja neugri ate suka  
Bicara jroh akai sampoe  
Bungong uroe babon ula

Rupa indah hana sakri  
Bago Diwi Bungsu Indra  
Pakaian le han peue peugah  
Meuh keureutah ngon meutia

Soe nyang kalon ate dasyah  
Reuban limpah tuha muda  
Bak jaroe kaca meuuke  
Bak gaki na gleueng meugeunta

Bak dada boh dokma bajee  
Bak ulee pucak ceumara  
Soe nyang kalon ate laloe  
Seupot uroe han jikira

Kulet puteh nibak gadeng  
Badan leunteng ban geuteumpa  
Soe nyang kalon bungong sunteng  
Ate ngeuren tuha muda

Raja nanggroe ate deundam  
Uroe malam jarak hana  
Nanggroe aman hana sakri  
Poteu Allah bri mubahgia

Ujeuen di gle kaem jitren  
Ureung gampong makmu raya  
Dalam nanggroe raseuki mudah  
Tuhan titah nyang seujahtra

Padum lawet dalam meunan  
Lam nanggroe nyan hana mara  
Bak siuroe jeuem teukeudi  
Poteu Allah bri ate rugha

Putroe neuduek ateueh keurusi  
Pioh doli ateueh geuta  
Meunoe jikheun cut putroe ti  
Ubak doli raja raya

Wahé judo tanglong nanggroe  
Deungo lon kheun proe saboh rahsia  
Keupeue jeuet le geudong meureuntang  
Keu soe neupulang aneukteu hana

Keupeue guna peutoe meuriti  
Keu soe neubri po meukuta  
Meuka udep wajebe mate  
Poteu Allah bri mawot teuka

Meunan jikheun bungong panjoe  
Raja nanggroe ro ie mata  
Seureuta Tuhan le neupujoe  
Neukheun meunoe neubeurkata

Neubri nekmat beu tasyuko  
Bala nyang le beu tasaba  
Seureuta ngon ie mata ro  
Meungucap syuko keu Rabbana



Raja nanggroe tahe hireuen  
Na dum ujeuen ro ie mata  
Puleh nibak tahe hireuen  
Meunoe neukheun pantah sigra

Neumeulakee ubak Tuhan  
Nyang laen tan na kuasa  
Ya Ilahi wa ya Rabbi  
Keu lon neubri beu troh pinta

Neubri aneuk keu lon sidroe  
Ureueng binoe nyang jroh rupa  
Meunan sabe baranggajan  
That syugolan raja raya

Neukhanduri bri seudeukah  
Faki syiah dum ulama  
Neumeulakee uroe malam  
Hana Tuhan kabui pinta

Beu troh hajat lon ya Allah  
Neukabui sah ban lon pinta  
Neubri aneuk rupa indah  
Lon bri keu gajah tujoh keupala

Meunan pinta raja meugah  
Poteu Allah peutroh pinta  
Padum lawet teuma dudoe  
Hame putroe tanglong donya

Na lhee buleuen hame putroe  
Ureueng nanggroe dum jiteuka  
Me bu leukat lawan tumpoe  
Peurumoh meuntroe ngon peutua

Meunan sabe hana padoe  
Troh sampoe bak kali raja  
Padum lawet buleuen sampoe  
Aneuk putroepi keulua

'Oh ban teubiet matauroe  
Budak sampoe pandang donya  
Lahe budak ureueng binoe  
Lam donya nyoe hana ngon sa

Poteu raja ate galak  
Neueu budak indah rupa  
Raja hei le bujang meugah  
Troh le pantah keunan sigra

Jibet jaroe bandua blah  
Mohon titah ubak raja  
Baro siseun jibet jaroe  
Marit dudoe poteu raja

Tatet beude ngon meuriam  
Keulaheran aneuk hamba  
Meunan sabda raja nanggroe  
Bujang meuntroe ate suka

Teuma jitet lila nubat  
Jiboh ubat na lhee gunca  
Ka jiato ateueh madat  
Sangat 'ajab taeu rupa

Sare lheueh jiboh ubat  
Jitet leugat pantah sigra  
Barat timu su meuhayak  
Lahe budak poteu raja

Tunong baroh troh meusyuehu  
Rakyat 'a-'u tren bak raja  
Ka meusyuehu dum seugala be  
Tanda lahe aneuk raja

Jitren rakyat geunap uroe  
Sinaroe tuha ngon muda  
Geusyik waki uleebalang  
Panglima prang ngon bentara

Teungku kali nujum syiah  
Troh le langkah keunan sigra  
'Oh troh keunan bak khalifah  
Teungku syiah le beurkata

Seuon jaroe bandua blah  
Mohon titah ubak raja  
Ampon tuanku syahi alam  
Po junjongan peue na sabda

Seuot raja neukheun meunoe  
Aneuk lon nyoe neuhei nama  
Taboh nan nyang meuseulihat  
Dalam surat taeu nyata

Meunan neukheun raja nanggroe  
Neuhareutoe bak peundita  
Teuma seuot teungku syiah  
Insya Allah po meukuta

Teungku nujum neulop kitab  
Neutakat bak bintang raja  
'Oh sare lheueh neujeumeulah  
Beurkatalah syiah peundita

Ampon meu'ah wahe doli  
Nan lon rasi bungong jeumpa  
Meureudom Bunga nan lon rasi  
Bintang pari indah rupa

Rayek tuah deungon bagi  
Poteu Allah bri mubahgia  
'Oh sare lheueh nan geurasi  
Woe keumbali syiah ulama

Poteu raja bri seudeukah  
Meuh keureutah ngon meutia  
Teutap raja lam keurajeuen  
Putroe buleuen lam istana

Neucok aneuk boh lam ayon  
Syae panton hana reuda  
Jak kutimang putik sukon  
Di dalam on angen timpa

Si nyak putroe jimupanton  
Tulak ayon jaroé dua  
**Jak** kutimang bintang pari  
**Boh** giri sikarang dua

Meung 'oh rayek cut puteh di  
Judo lon bri aneuk raja  
Allah hai do jak kudodi  
Cicem nuri lam istana

Beuthat dilee lon meujanji  
Han lon bri keu gajah rimba  
Jak kutimang bungong kundo  
Keu judo raja nyang raya

Uroe malam ate tunu  
Kaoi du keu gajah rimba  
Jak kutimang bungong meulu  
Nyang meusyeuhu bungong jeumpa

Bahkeu dumnan haba timang  
Meunyo panyang han le gura  
Na tujoh thon umu sampoe  
Tujoh bagoe leubeh ganda

Aneuk raja tunong baroh  
Dum keunan troh geune haba  
Geunap uroe troh teulangke  
Raja ube-be han neurela

Teuduek 'oh nan raja nanggroé  
Lon hareutoe gajah rimba  
Na tujoh thon umu putroe  
Jitren u nanggroé gajah rimba

Jijak laju hana ploh  
Hingga troh u mideuen raja  
Ureueng nanggroe sosah ate  
Binatang gle keunan teuka

Tujuh ulce peuet blah gadeng  
Hana bandeng ateueh donya  
'Oh sare troh u leuen meuligoe  
Raja nanggroe peugot geumpa

Abeh sosah asoe meuligoe  
Raja nanggroe leumah bicara  
Peue na hajat he meutuah  
Ka troh langkah keunoe gata

Seuot laju he po meurah  
Kamoe sosah ban sineuna  
Seuot gajah jikheun meunoe  
Deungo kamoe po meukuta

Neumeuhajat masa dilee  
Neubri keu kee putroe muda  
Nyankeu jeuet troh keunoe lon jak  
Jak tueng si nyak bungong jeumpa

Neumeuhajat yoh saboh roe  
Keu lon putroe aneuk gata  
Meunan jikheun raja gajah  
Banta Abdullah meunoe kata

Meunyo meunan he ulon beh  
Lon meutangogh ubak gata  
Tapreh tangogh lhee ploh uroe  
Lon bri putroe tanglong donya

Meunan narit raja nanggroe  
Seuot meunoe gajah rimba  
Bek sibuleuen tameutangogh  
Adat siplohpi kurela

Neumeujanji bek neuubah  
Ban nyang titah lon seureuta  
Meunan narit raja gajah  
Jiwoe pantah dalam rimba

'Oh leupah woe gajah uteuen  
Raja mideuen mubicara  
Geupangge le bujang tandi  
Seureutapi ngon peurdana

Troh le keunan jipeureugi  
Raja neugri neumeusabda  
Ubak bujang neukheun leugat  
Takrah rakyat dum barangna

Tunong baroh timu barat  
Bek lambat jinoe bak sigra  
Tapeugah lon raya hajat  
Yue tren leugat dum peutua

Meunan sabda raja meugah  
Mudek pantah le peurdana  
Uroe malam rakyat jikrah  
'Oh daerah nanggroe raja

Phon di sinoe troh beuladeh  
Ka abeh jeuep-jeuep peutua  
Teuma jitren dumna rakyat  
Waki meugat keujruen muda

Uleebalang meuntroe kali  
Dan lagi teuku bentara  
Geusiyik waki uleebalang  
Bentara blang imum muda

Abeh jitren dum sibirang  
Beusa seudang tuha muda  
'Oh troh uleuen bale keumang  
Dong meureuntang teupat banja

Uleebalang peuk seumbah  
Bak khalifah raja raya  
Ampon meu'ah syahi alam  
Di yup kidam po meukuta

Kamoe bandum hana troh fam  
Po junjongan peue na sabda  
Pat kuala nyang tan wase  
Kawom siri nyang kreueh jungka

Toh siri blang musara tan  
Peugah rijang po meukuta  
Kamoe bandum that guransang  
Jikalée prang siri raja

Meunan seumbah meuntroe kali  
Alam syahi meunoe sabda  
Tadeungo he uleebalang  
Dum sibirang tuha muda

Ulonteu nyoe that sukaran  
Deungo tuan lon calitra  
Jitren gajah keunoe datang  
Jimeung tawan aneuk hamba

Meureudom Bunga putroe meutuah  
Hajat gajah tujuh keupala  
Soe nyang ek poh gajah pindoe  
Lon bri putroe bungong jeumpa

Beuthat aneuk barangasoe  
Judo putroe meugah hina  
Nyankeu narit nibak ulon  
Pakri mufom dumna gata

Meunan sabda nibak sulotan  
That guransang rakyat dumna  
Seubab geubri putroe indah  
Peuleumah gagah ngon guranta



Raja nanggroe ate deundam  
Uroe malam jarak hana  
Nanggroe aman hana sakri  
Poteu Allah bri mubahgia

Ujeuen di gle kaem jitren  
Ureung gampong makmu raya  
Dalam nanggroe raseuki mudah  
Tuhan titah nyang seujahtra

Padum lawet dalam meunan  
Lam nanggroe nyan hana mara  
Bak siuroe jeuem teukeudi  
Poteu Allah bri ate rugha

Putroe neuduek ateuh keurusi  
Pioh doli ateuh geuta  
Meunoe jikheun cut putroe ti  
Ubak doli raja raya

Wahe judo tanglong nanggroe  
Deungo lon kheun proe saboh rahsia  
Keupeue jeuet le geudong meureuntang  
Keu soe neupulang aneukteu hana

Keupeue guna peutoe meuriti  
Keu soe neubri po meukuta  
Meuka udep wajebeu mate  
Poteu Allah bri mawot teuka

Meunan jikheun bungong panjoe  
Raja nanggroe ro ie mata  
Seureuta Tuhan le neupujoe  
Neukheun meunoe neubeurkata

Neubri neukmat beu tasyuko  
Bala nyang le beu tasaba  
Seureuta ngon ie mata ro  
Meungucap syuko keu Rabbana

Raja nanggroe tahe hireuen  
Na dum ujeuen ro ie mata  
Puleh nibak tahe hireuen  
Meunoe neukheun pantah sigra

Neumeulakee ubak Tuhan  
Nyang laen tan na kuasa  
Ya Ilahi wa ya Rabbi  
Keu lon neubri beu troh pinta

Neubri aneuk keu lon sidroe  
Ureueng binoe nyang jroh rupa  
Meunan sabe baranggajan  
That syugolan raja raya

Neukhanduri bri seudeukah  
Faki syiah dum ulama  
Neumeulakee uroe malam  
Hana Tuhan kabui pinta

Beu troh hajat lon ya Allah  
Neukabui sah ban lon pinta  
Neubri aneuk rupa indah  
Lon bri keu gajah tujoh keupala

Meunan pinta raja meugah  
Poteu Allah peutroh pinta  
Padum lawet teuma dudoe  
Hame putroe tanglong donya

Na lhee buleuen hame putroe  
Ureueng nanggroe dum jiteuka  
Me bu leukat lawan tumpoe  
Peurumoh meuntroe ngon peutua

Meunan sabe hana padoe  
Troh sampoe bak kali raja  
Padum lawet buleuen sampoe  
Aneuk putroepi keulua

'Oh ban teubiet matauroe  
Budak sampoe pandang donya  
Lahe budak ureueng binoe  
Lam donya nyoe hana ngon sa

Poteu raja ate galak  
Neueu budak indah rupa  
Raja hei le bujang meugah  
Troh le pantah keunan sigra

Jibet jaroe bandua blah  
Mohon titah ubak raja  
Baro siseun jibet jaroe  
Marit dudoe poteu raja

Tatet beude ngon meuriam  
Keulaheran aneuk hamba  
Meunan sabda raja nanggroe  
Bujang meuntroe ate suka

Teuma jitet lila nubat  
Jiboh ubat na lhee gunca  
Ka jiato ateueh madat  
Sangat 'ajab taeu rupa

Sare lheueh jiboh ubat  
Jitet leugat pantah sigra  
Barat timu su meuhayak  
Lahe budak poteu raja

Tunong baroh troh meusyeyuhu  
Rakyat 'a-'u tren bak raja  
Ka meusyeyuhu dum seugala be  
Tanda lahe aneuk raja

Jitren rakyat geunap uroe  
Sinaroe tuha ngon muda  
Geusyik waki uleebalang  
Panglima prang ngon bentara

Teungku kali nujum syiah  
Troh le langkah keunan sigra  
'Oh troh keunan bak khalifah  
Teungku syiah le beurkata

Seuon jaroe bandua blah  
Mohon titah ubak raja  
Ampon tuanku syahi alam  
Po junjongan peue na sabda

Seuot raja neukheun meunoe  
Aneuk lon nyoe neuhei nama  
Tabch nan nyang meuseulihat  
Dalam surat taeu nyata

Meunan neukheun raja nanggroe  
Neuhareutoe bak peundita  
Teuma seuot teungku syiah  
Insya Allah po meukuta

Teungku nujum neulop kitab  
Neutakat bak bintang raja  
'Oh sare lheueh neujeumeulah  
Beurkatalah syiah peundita

Ampon meu'ah wahe doli  
Nan lon rasi bungong jeumpa  
Meureudom Bunga nan lon rasi  
Bintang pari indah rupa

Rayek tuah deungon bagi  
Poteu Allah bri mubahgia  
'Oh sare lheueh nan geurasi  
Woe keumbali syiah ulama

Poteu raja bri seudeukah  
Meuh keureutah ngon meutia  
Teutap raja lam keurajeuen  
Putroe buleuen lam istana

Neucok aneuk boh lam ayon  
Syae panton hana reuda  
Jak kutimang putik sukon  
Di dalam on angen timpa

Si nyak putroe jimupanton  
Tulak ayon jaroe dua  
**Jak** kutimang bintang pari  
**Boh** giri sikarang dua.

Meung 'oh rayek cut puteh di  
Judo lon bri aneuk raja  
Allah hai do jak kudodi  
Cicem nuri lam istana

Beuthat dilee lon meujanji  
Han lon bri keu gajah rimba  
Jak kutimang bungong kundo  
Keu judo raja nyang raya

Uroe malam ate tunu  
Kaoi du keu gajah rimba  
Jak kutimang bungong meulu  
Nyang meusyehu bungong jeumpa

Bahkeu dumnan haba timang  
Meunyo panyang han le gura  
Na tujuh thon umu sampoe  
Tujuh bagoe leubeh ganda

Aneuk raja tunong baroh  
Dum keunan troh geune haba  
Geunap uroe troh teulangke  
Raja ube-be han neurela

Teuduek 'oh nan raja nanggroe  
Lon hareutoe gajah rimba  
Na tujuh thon umu putroe  
Jitren u nanggroe gajah rimba

Jijak laju hana ploh  
Hingga troh u mideuen raja  
Ureueng nanggroe sosah ate  
Binatang gle keunan teuka

Tujoh ulee peuet blah gadeng  
Hana bandeng ateueh donya  
'Oh sare troh u leuen meuligoe  
Raja nanggroe peugot geumpa

Abeh sosah asoe meuligoe  
Raja nanggroe leumah bicara  
Peue na hajat he meutuah  
Ka troh langkah keunoe gata

Seuot laju he po meurah  
Kamoe sosah ban sineuna  
Seuot gajah jikheun meunoe  
Deungo kamoe po meukuta

Neumeuhajat masa dilee  
Neubri keu kee putroe muda  
Nyankeu jeuet troh keunoe lon jak  
Jak tueng si nyak bungong jeumpa

Neumeuhajat yoh saboh roe  
Keu lon putroe aneuk gata  
Meunan jikheun raja gajah  
Banta Abdullah meunoe kata

Meunyo meunan he ulon beh  
Lon meutanggoh ubak gata  
Tapreh tanggoh lhee ploh uroe  
Lon bri putroe tanglong donya

Meunan narit raja nanggroe  
Seuot meunoe gajah rimba  
Bek sibuleuen tameutanggoh  
Adat siplohpi kurela

Neumeujanji bek neuubah  
Ban nyang titah lon seureuta  
Meunan narit raja gajah  
Jiwoe pantah dalam rimba

'Oh leupah woe gajah uteuen  
Raja mideuen mubicara  
Geupangge le bujang tandi  
Seureutapi ngon peurdana

Troh le keunan jipeureugi  
Raja neugri neumeusabda  
Ubak bujang neukheun leugat  
Takrah rakyat dum barangna

Tunong baroh timu barat  
Bek lambat jinoe bak sigra  
Tapeugah lon raya hajat  
Yue tren leugat dum peutua

Meunan sabda raja meugah  
Mudek pantah le peurdana  
Uroe malam rakyat jikrah  
'Oh daerah nanggroe raja

Phon di sinoe troh beuladeh  
Ka abeh jeuep-jeuep peutua  
Teuma jitren dumna rakyat  
Waki meugat keujruen muda

Uleebalang meuntroe kali  
Dan lagi teuku bentara  
Geusyik waki uleebalang  
Bentara blang imum muda

Abeh jitren dum sibirang  
Beusa seudang tuha muda  
'Oh troh uleuen bale keumang  
Dong meureuntang teupat banja

Uleebalang peuk seumbah  
Bak khalifah raja raya  
Ampon meu'ah syahi alam  
Di yup kidam po meukuta

Kamoe bandum hana troh fam  
Po junjongan peue na sabda  
Pat kuala nyang tan wase  
Kawom siri nyang kreueh jungka

Toh siri blang musara tan  
Peugah rijang po meukuta  
Kamoe bandum that guransang  
Jikalee prang siri raja

Meunan seumbah meuntroe kali  
Alam syahi meunoe sabda  
Tadeungo he uleebalang  
Dum sibarang tuha muda

Ulonteu nyoe that sukaran  
Deungo tuan lon calitra  
Jitren gajah keunoe datang  
Jimeung tawan aneuk hamba

Meureudom Bunga putroe meutuah  
Hajat gajah tujuh keupala  
Soe nyang ek poh gajah pindoe  
Lon bri putroe bungong jeumpa

Beuthat aneuk baraggasoe  
Judo putroe meugah hina  
Nyankeu narit nibak ulon  
Pakri mufom dumna gata

Meunan sabda nibak sulotan  
That guransang rakyat dumna  
Seubaö geubri putroe indah  
Peuleumah gagah ngon guranta



Dalam atejih teusawo  
Kee keu judo putroe muda  
Aneuk raja dalam nanggroe  
Dum sinaroe that guranta

Ubak raja lom jisudi  
Ban kheun doli nyo sibeuna  
Kadang ubah nibak doli  
Aeb keuji kamoe dumna

Meunan jikheun dum sibarang  
Raja dalam beungeh raya  
Na nibak makupi siseun  
Ban nyang kukheun han meutuka

Meunan narit raja nanggroe  
Jilakee droe aneuk raja  
Jiteubiet le dalam mideuen  
Ladom jikheun meunoe haba

Bahle jinoe tameusabong  
Soe nyang untong mubahgia  
Bahle abeh meuh lam geudong  
Kusinthong bandum u lua

Meuna tuah deungon untong  
Tajak ngon payong tawoe ngon guda  
Meunan jikheun dumji sare  
Jipeugot le deungon kuta

Tujoh kuta that seureuloe  
Pacang beusoe junga meulila  
Rakyat rame miseue lalat  
Cukop leungkap abeh leungka

Ato lila ateueh madat  
Beude nubat ngon ramtaka  
Cukop ase dumna rakyat  
Teuduek siat manusia

Jinoe lon boh laen kisah  
Raja gajah lon calitra  
Troh bak tanggoh lhee ploh uroe  
Rakyat lam nanggroe meuseuranta

A'beh jitren dum sinaroe  
Bujang meuntroe ngon haria  
Geusyik waki uleebalang  
Panglima prang ngon peutua

Abeh jitren dumna rakyat  
Ka meusapat tuha muda  
'Oh meusapat dum meuhimpon  
Abeh jitren ubak raja

Rimueng badeuek deungon gajah  
Jingadap khalifah raja rimba  
Teuma marit raja gajah  
Jipeugah ubah lasyeuka

Tadeungo he dumna rakyat  
Lon kheun teupet ubak gata  
Gaseh sayang wahe rakan  
Dum sibarang tuha muda

Tren u nanggroe Indra Sarah  
Putroe indah keunoe taba  
Kon meugata wahe rakan  
Ulon tuanpi seureuta

Meunan sabda bak sulotan  
Seuot rijang dum lasyeuka  
Insy Allah kamo seun  
Meuseuki lon badai meukuta

Jibeudoh le leugat jitren  
Bandum kawom asoe rimba  
'Oh sare ka leupah rakyat  
Miseue lalat kawom rimba

Sajan raja jibeurangkat  
Le that rakyat han teukira  
Jijak laju hana pioh  
Hingga troh u nanggroe raja

Troh u nanggroe Indra Sarah  
Rimueng gajah badeuek singa  
Ureueng nanggroe ate gundah  
Jieu gajah le lagoina

Aneuk raja jikheun meunoe  
Bak uroe nyoe prang tangaza  
Pasoe beude ngon meuriam  
Tamuprang ngon gajah rimba

Jipasoe le lila nubat  
Jitakat u dalam laksa  
Jitet beude jareueng-jareueng  
Jiampeueng angkatan rimba

That guranta dumna ureueng  
Asoe uteuen le that fana  
Su meuriam miseue guroh  
Nyum ka runtoh nanggroe raja

Gajah mate seun sireutoh  
Waba sampoh seun silaksa  
Aneuk raja tunong baroh  
Maken sunggoh prang jingaza

Di phon beungoh troh 'an seupot  
Ka jisurot gajah rimba  
'Oh sare troh bak sulotan  
Uleebalang jimeusabda

Ampon meu'ah wahe deelat  
Le that rakyat nyang ka fana  
Na siteungoh rakyat abeh  
Keunong bareh manusia

Uleebalang meunan titah  
Raja gajah ro ie mata  
Seubab rakyat le that mate  
Keunong beude deungon lila

Tadeungo lon wahe rakan  
Dum tatawan tuha muda  
Singoh uroe kuta taprang  
Allah Tuhan nyang peulara

Tapoh mate dumna ensan  
Bila rakan nyang ka fana  
Meunan sabda nibak sulotan  
Tamat kalam siklep mata

Jinoe laen lon atoran  
Kawom ensan dalam kuta  
Mangat ate dum sibarang  
Ka meunang prang bak jisangka

Singoh tajak dum u dalam  
Pakri reumbang tapeuhaba  
Talakee putroe aneuk sulotan  
Pakri padan nibak gata

Sidroeu ureueng pungo alang  
Meunoe reumbang phon beurkata  
'Oh sare troh ubak deelat  
Takheun teupat bek syok sangka

Kawom gajah abeh mate  
Kamoe sare nyang pufana  
Kamoe muprang bandum sunggoh  
Tuanku beh hana reuda

Neubri putroe puteh leusoh  
Kamoe jeuh heundak gisa  
Bak lon sidroe meunan sunggoh  
Laen taboh kri bak gata

Jiseuot le bandum sunggoh  
He adoe beh ban kheun gata  
Keumah pakat narit abeh  
Hingga mureh teubiet faja

Jinoe muwoe haba keudeh  
Gajah paleh lon calitra  
Kuku' manok teuka mureh  
Jaga abeh agam dara

Sare jaga bandum abeh  
Jiprang keudeh kuta raja  
Rimueng badeuek gajah puteh  
Le that wareh ali rimba

Jiek laju hana ploh  
Hingga troh bak padang raya  
Troh u mideuen raja dalam  
That guransang asoe rimba

Deumpek rimueng deungon gajah  
Bangon ulah bade raya  
Rimueng lumpat gajah jigrop  
Sang-sang geuyup sangkakala

Kuku' manok mantong seupot  
Teukeujot rakyat lam kuta  
Teuingat le beude jitet  
Dalam seupot jipeulila

Ureueng nanggroe that teumakot  
Dalam seupot prang jingaza  
Rimueng badeuek ka teusurot  
Beude jitet miseue taga

Hingga peungeuh cuaca trang  
That guransang manusia  
Jitet beude ngon meuriam  
Sang-sang karam bumoe donya

Badeuek rimueng le that simpan  
That guransang aneuk raja  
Taeu reubah miseue jeundrang  
Hana lapang bumoe donya

Abeh jiplueng dum teureuban  
Bak sulotan dum jigisa  
'Oh troh keunan bandum jiwoe  
Jihareutoe ubak raja

Awai akhe jipeugah proe  
Beungeh tuloe raja raya  
Jipet mata jikap gigoe  
Jiek tanggoe ban geulawa


Deungon rakyat dum sinaroe  
Hana bagoe that guranta  
Sideh jiek sinoe geupreh  
Nyoe phon jadeh kon le seunda

Nyoe baro phon prang meutunang  
Rotnoe rotnan that guranta  
Jiek gajah ban ie paseueng  
Deumpek siseun 'oh meutaga

That guranta asoe uteuen  
Dumna ureueng pucat muka  
Jitet beude hana lanti  
Tan padoli asoe rimba

Jiek laju hana sakri  
Ban bubiri teungoh meunta  
Beude lila tan padoli  
That beureuhi rimueng singa

Di phon beungoh troh cot uroe  
Ureueng nangoe ka jiguda  
Raja gajah tujuh ulee  
Hana lagee that guranta



Keunong lila keunong beude  
Bube pade hana luka  
That kuasa hana sakri  
Tujoh seun haji duek lam tapa

That teumakot ureueng nanggroe  
Gajah keudroe lingka kuta  
Deumpek rimueng deungon gajah  
Sang aruwah ka keulua

That guranta asoe uteuen  
Han ek linteueng raja raja  
Troh le keunan kawom uteuen  
Jipoh ureueng han teukira

Le that mate ureueng nanggroe  
Jiseudoe le rimueng guha  
Aneuk raja dum lam nanggroe  
Dum sinaroe ka jiguda

Nyang ka mate wahe adoe  
Rimueng seudoe badeuek seuba  
Troh le keunan lam meuligoe  
Ban sinaroe kawom rimba

Raja nanggroe teumakot that  
Muka pucat yo meugeumpa  
Neukeumeung plueng han leupah le  
Gundah ate raja raya

Raja gajah jimeukalam  
Bak sulotan jipeuhaba  
Ka deungo he raja dalam  
Kuhantam meuligoe kuta

Meuhan kabri putroe intan  
Gata tuan tinggai donya  
Lheueh takheun na jeuet takheun tan  
Miseue kalam inong tuha

Meunan jikheun raja gajah  
Seuot pantah poteu raja  
Insya Allah jinoo lon bri  
Bek rioh le dumna gata

Meunan kalam banta Abdullah  
Raja gajah lom beurkata  
Adat meutabri dilee putroe  
Han reuloh nanggroe rakyat fana

Nyoe peue jeuet lom buet ka leupah  
Pakri lon bah po meukuta  
Le that mate rakyat lam prang  
Gata ensan kamoe rimba

Abeh narit raja gajah  
Muwoe kisah putroe muda  
Meureudom Bunga dalam meuligoe  
Meuteutaloe ngon ie mata

Putroe bae hana bagoe  
Ingat keudroe ka troh masa  
Seureuta ngon jikheun meunoe  
Sira jimoe Meureudom Bunga

Wahe ma po ma meutuah  
Lon neukeubah lam istana  
Bek neubri lon ma keu gajah  
Sia payah neupeulara

Meunan jikheun si nyak putroe  
Ubak ma droe jipeuhaba  
Teuma seuot tuan putroe  
He aneuk droe pakri daya

Karonya Po Tuhan Makbud  
He aneuk cut cahya mata  
Lon keumeung tham hana dapat  
Kuasa that gajah rimba



Wahe aneuk bungong peukan  
Kheundak Tuhan dum peukara  
Meutan gata lam meuligoe  
Ulon sidroe pungo gila

Wahe aneuk bungong uroe  
Wahe putroe cahya mata  
'Oh tan gata lam meuligoe  
Lon he putroe ate luka

Meuhat mate ajai sampoe  
He aneuk droe 'oh tan gata  
Bukon sayang cicem nuri  
Burong diwandi dalam hawa

Kheundak Tuhan Poku Rabbi  
Dumnoe bagi ka neukada  
Bukon sayang bintang cot uroe  
Reudok tampoe padam cahya

Bak seulamat wahe putroe  
Beu troh tawoe bak ayahda  
Lon peujok bak Tuhan sidroe  
Laen han soe nyang kuasa

Neubri saket neubri mangat  
Ateueh umat dumna hamba  
Meunan jikheun tuan putroe  
Tuhan sidroe hana dua

Ie mata ro hana padoe  
Neupujoe Wahidon Kaha  
Bahkeu dumnan riwayat putroe  
Gajah jiwoe dalam rimba

Putroe Meureudom di meuligoe  
Ngon ayah droe sajan bunda  
Neubri idin ma ngon ayah  
Lon meulangkah dalam rimba

Uroe nyoe cre lon ngon deelat  
Di akhirat lon preh gata  
Dalam donya uroe nyoe cre  
Dudoe page tameueu mata

Adat bit udep sirasa mate  
Tan neuue le rijang jula  
Meunan jikheun putroe indah  
Ma ngon ayah ro ie mata

Bahkeu dumnan abeh kisah  
Jiwoe gajah dalam rimba  
Meureudom Bunga jiba sajan  
That sukaan kawom rimba

Abeh jiwoe rimueng gajah  
Putroe indah sajan jiba  
Padum lawet jibeurjalan  
Troh u padang Hiram Cahya

Padang luah that meuhalak  
Sibuleuen jak pasang guda  
Di teungoh nyan kayee sibak  
Cabeueng rampak hana ngon sa

Phon di uram troh bak ujong  
Kayee rambong geuhei nama  
Nyankeu teupat raja gajah  
Mideuen luah hana tara

Teutap sinan putroe indah  
Sajan gajah dalam rimba  
Kakeu meunan janji Tuhan  
Dum hayawan nyang peulara

Dum jigaseh putroe bangsawan  
Allah Tuhan nyang that kaya  
Tulong Tuhan Maha Kudrat  
Ngon mukjizat Nabi kita

Raseuki troh keunan jiintat  
Dumna rakyat dalam rimba  
Tuan putroe sinan dasyah  
Sajan gajah dalam rimba

Raja gajah tujuh ulee  
Bak peureudee rambong raya  
Sigo jieh jibeuradu  
E teungku lhee buleuen jaga

Putroe jiduek ateuh ulee  
Bungong keumbee nyang that eelia  
Bahkeu dumnan saboh karang  
Bek le panyang gadoh gura

## II. BANTA ALI POH GAJAH TUJUH ULEE

Amma bakdu teungku po cut  
Lon seubot raja nyang tarek  
Nanggroe Yaman teupat keurajeuen  
Luah mideuen wahe adek

Raja ngon nanggroe sapeue nama  
Jeuep-jeuep donya meugah tarek  
Meusyeuhu that ateueh donya  
Tan umpama jeuep-jeuep tasek

Keubaipi that han lut beusoe  
Barangasoe gadoh tarek  
Nanggroe luah hana tara  
Rame banda wahe adek

Ureueng meukat bandum kaya  
Kapai bungka ili mudék  
Meusyeuhu that babon ula  
hana ngon sa jeuep-jeuep tasek

Seubab ade hukom raja  
Kapai bungka pulang balek  
Sakti utoh hana ngon sa  
Beurani kha raja cantek

Taklok keunan raja sireutoh  
Seubab utoh sakti tarek  
Ngon rupa jroh hana macam  
Tamse ban matauroe ek

Sithon siseun raja beurjalan  
Deungon pahlawan nyang tarek-tarek  
Ngon payong meuh ateueh keupala  
Awan meurika gura lagoe ek

Judo raja syahi alam  
Jroh analan putroe keucek  
Ceureupu Intan nan geurasi  
Putroe ahli rupa cantek

Soe nyang kalon ate suka  
Cahya muka jitren jiek  
Pakaian hu nibak asoe  
Intan pudoe wahe adek

Soe nyang kalon teudong tahe  
Teusungko reubah mubalek  
Bicara jroh akai sampoe  
Lom ngon ragoé that ceureudek

Rupa indah hana ngon sa  
Bungong jeumpa cicem peutek  
Soe nyang kalon ate rindu  
Bintang timu rupa cantek

Meunan geukheun lam calitra  
Tan deungon na hom he adek  
Ulon sidroe hana troh fam  
Hamba Tuhan lon hai adek

Aneuk rajapi na sidroe  
Ureueng lakoe banta keucek  
Rupa elok sang meutia  
Hana ngon sa jeuep-jeuep tasek

Dua blah thon umu sampoe  
Aneuk putroe banta keucek  
Badan kuat beurani kha  
Hana ngon sa jeuep-jeuep tasek

Uroe malam ate suka  
Rok-rok masa wahe adek  
Sireutoh rakan sajan seureuta  
Pasang guda jeuep-jeuep tasek

Beungoh jajak seupot jiwoe  
Geunap uroe pulang balek  
Meunan sabe baranggajan  
That sukaan banta keucek

Padum lawet meunan juga  
Tuhan kaya nyang po milek  
Leumah lumpoe banta muda  
Dalam rahsia putroe keucek

Rupa indah sang purnama  
Meureudom Bunga nan he adek  
Ateueh gajah tujuh ulee  
Di yup kayee rampak lagoe ek

Abeh leumah dum sinaroe  
Jaga dudoe banta keucek  
'Oh ban jaga Banta Ali  
Moe meu 'i- 'i reubah mubalek

Seubab han le putroe muda  
Nyum di mata bunoe he adek  
Teuma jaga raja Yaman  
Pakon meunan ka neusidek

Teuma seuot Banta Ali  
Neupeugah kri raja sidek  
Phon di uram troh bak ujong  
Abeh mufom wahe adek

Raja Yaman neukheun meunoe  
Deungo kamoe bungong rubek  
Taba rakyat dum sinaroe  
Seutot lumpoe dalam tasek

Meuhan jajak aneuk nanggroe  
Baranggasoe han kutilek  
Kuboh lam glap seupot tuloe  
Baranggasoe beusa keucek

Meunan jikheun raja nanggroe  
Seuot dudoe Banta keucek  
Rakyat rame hana laba  
Rot lam rimba uteuen tasek

Rimueng badeuek gajah pindoe  
Dum sinaroe dalam tasek  
Meunyo meunan aneuk badan  
Taba pahlawan dalam tasek

Beurani kha raya badan  
Ek jitawan putroe keucek  
Teuma seuot Banta Ali  
Nyankeu neubri Pahlawan tarek

Raja pangge le Pahlawan  
Ali Hardan nan he adek  
Troh le keunan deungon sigra  
Ubak raja ka jisidek

Lon neupangge he sulotan  
Ho neumuprang siri tasek  
Meunan jikheun le Pahlawan  
Seuot rijang meukuta patek

Tadeungo he panglima prang  
Tabeurjalan dalam tasek  
Tajak, keu ngon Banta muda  
Jijak mita putroe keucek

Nibak gajah tujuh keupala  
Dalam rimba paya rubek  
Meunan jikheun raja raya  
That guranta Pahlawan tarek

Taeu kulet hitam sukla  
Badan raya han soe tilek  
'Oh jimeusu that guranta  
Bah kutampa gajah tasek

Tadeungo su ban geureuda  
Badan raya ube buket  
Jipet jibleut mata dua  
Nyum ek teuga ureueng saket

Badan raya miseue hantu  
Sigunca bu na keumeung sep  
Banta Ali ate suka  
Seumbah raja putroe cantek

Neubri idin ayah bunda  
Ulon bungka dalam tasek  
Jinoe lon jak dalam rimba  
Lon jak mita putroe cantek

Teuma seuot putroe muda  
Seureuta ngon raja patek  
Wahe aneuk cahya pirak  
Bek tajak u dalam tasek

Rimueng badeuek dalam rimba  
Jikap gata bungong rubek  
Bek tajak u dalam rimba  
Putroe muda hana lam tasek

Pane putroe dalam uteuen  
Badeuek rimueng le lagoe ek  
Le di nanggroe aneuk raja  
Muda muda rupa cantek

Lom jimarit Banta muda  
Deungon bunda rupa baek  
Tabri idin he ma badan  
Bek tatham lon jak lam tasek

Rabbon Karim nyang kuasa  
Allah Ta'ala nyang po milek  
Laen bandum tan kuasa  
Beuthat raja meugah tarek



Karonya Po Rabbon Baki  
Lon esteuri dalam tasek  
Meunan leumah dalam rahsia  
He ma raja bek neuasek

Bitpi dumnan narit Banta  
Putroe muda mantong meuasek  
Han jibri jak Banta muda  
Ro ie mata miseue rintek

Raja Yaman marit rijang  
Beungeh na ban rimueng burek  
Bit nyo gata kuthee bingong  
Ureueng inong hana balek

Gop peugah sapeue han keunong  
Ureueng bingong akai tan lisek  
Meugoh troh hat Poteu Allah bri  
Han mate beuthat lam tasek

Meuna udep hana mate  
Akhe-akhe pulang balek  
Bek le tatham beuthat jijak  
Ilahon Hak nyang po milek

Meunan neukheun bak putroe muda  
Beungeh raya meukuta patek  
Seuot putroe nyang jroh rupa  
Hom hai raja ban nyang baek

Nyang jeuet bunoe ulon sangga  
Bek jibungka Banta keucek  
Meuka idin bak sripada  
Bak lon sigrapi ka baek

'Oh lheueh idin ayah bunda  
Laju bungka raja keucek  
Ngon Pahlawanpi seureuta  
Troh lam rimba uteuen tasek

Geujak laju hana ploh  
Hingga troh bak gunong rubek  
Leupah gunong jijeumeurang  
Pahlawan ngon raja keucek

Geujak laju hana ploh  
Sampoe troh bak padang baek  
Troh bak padang Hiram Cahya  
Leumah rupa gajah tasek

Gajah teungeut teubeurangkong  
Yup bak rambong rampak lagoe ek  
'Oh jikalon le Pahlawan  
Yo ngon badan ulée meuasek

Tahe hireuen hana haba  
Yo meugeumpa reubah mubalek  
Jimarit le pantah sigra  
Udeh gisa wahe adek

Ka troh tajak udeh gisa  
Bek meuhawa putroe keucek  
Lon eu gajahpi raya that  
Han troh hajat wahe adek

'Oh lon kalon ateueh gajah  
Hana ubah matauroe ek  
Nyum aruwah ka keulua  
Gajah raya 'oh lon tilek

Nyankeu lon kheun got tagisa  
Hana iaba wahe adek  
Teuma seuot aneuk raja  
Jak tagisa gata patek

Bah tinggai lon dalam rimba  
Jak leh gata pulang balek  
Meuka lon jak han lon woe le  
Bahle mate dalam tasek

Meugoh lom troh nyang lon pinta  
Han lon gisa pulang balek  
Meunan narit Banta muda  
Pahlawan raya sosah lagoe ek

Jimarit le pantah sigra  
Ngon le mata bagoe rintek  
Bak siseun nyoe kee bit mate  
Jipajeh le gajah tasek

Meuhat mate bak uroe nyoe  
Gajah nyoe han kujeuet tilek  
Banta Ali beurani kha  
Rambong raya laju neuek

Ngon Pahlawanpi seureuta  
Badeuek raya geusuen lagoe ek  
Pahlawan kheun ubak Banta  
Na bicara bak lon adek

Taikat lon gaki jaroe  
Ile adoe bek sret mubalek  
Tatop geulunyueng deungon mata  
Bek deuh rupa nyan lon tilek

Meunan jikheun si ceulaka  
That seutia Banta keucek  
Teutap sinan aneuk bisoe  
Malam uroe taloe tarek

Banta Ali lon hareutoe  
Haba nuwoe miseue nyang ka  
Balikeu dumnun saboh syahdan  
Lon bayan putroe ngon raja

Gajah teungeut di yup bak kayee  
Di ateuh uie Meureudom Bunga  
Ya Tuhanke neutulong karnoe  
Lon cek putroe bak gajah rimba

Lon keumeung cok putroe indah  
Bak gajah tujuh keupala  
Allah hai Po Rabbon Kade  
Keu lon neubri beu troh pinta

Ngon keuramat du lon raja  
Deungon bunda ma lon saja  
Meunan neukheun Banta Ali  
Pujoe Rabbi sidroe Tuhan

Abeh ingat dalam ate  
Neusyae saboh habaran  
Keumbang jeumpa baunya harom  
Ditanam urang dalamnya kuta

Kulihat sudah beurteumu beulom  
Ate di dalam sangat beurcinta  
Teuma seot putroe intan  
Suara ban sang biula

Bajee hitam gancangnya tujuh  
Mari kutaroh di gaki dulang  
Kalee tuanku beurani sunggoh  
Ambek adekda di tangan urang

Banta Ali seot nyoe ban  
Ateneu girang hana ngon sa  
Boh kundo di ateuh dulang  
Di bawah dulang larek-beurlarek

Jangan he adek di tangan urang  
Di mulot meujen bisa kuambek  
Banyak-banyak kayee di rimba  
Kayee hidop dimakan api

Abang suka adekpon suka  
Mate hidop tidak padoli  
Banta Ali seot pantah  
Bandua blah bijaksana

Sideh utoh sinoe cidah  
Bandua blah sabe padra  
Aneuk cicem cut meuen di padang  
Aneuk tulo yang meuen di banda

Jarak that nanggroe keunoe lon landang  
Tatem peusayang adek le gata  
Seuot putroe jantung leukat  
Su mangat that sang biula

Aneuk cicem cut meuen di pasi  
Aneuk keudidi meuen di data  
Han jeuet peusayang dalem juhari  
Hana meuturi di lon ngon gata

Lom neuseuot le Banta Ali  
Hana lanti meusiklep mata  
Aneuk cicem cut meuen di pante  
Ateueh kayee gle aneuk leuk kua

Bek takheun meunan hai panyot kande  
Dudoe meuturi kamoe ngon gata  
Teuduek siat panton dendang  
Bek le panyang hana le gura

Banta Ali neutiek taloe  
Bak putroe Meureudom Bunga  
'Oh sare troh keudeh sampoe  
Pantah putroe jidrop sigra

Banta Ali ka neutarek  
Neupeuek cong rambong raya  
Troh u manyang bungong kipah  
Gajah plah hana lom jaga

Marit putroe bintang peureuseh  
Deungon gop jeh Ali Peurkasa  
Naneu keunoe dalem payong  
Jak saweue lon dalam rimba

Seureuta ngon jilakee ampon  
Jiseun jaroe bandua  
Ngon suara jroh meualon  
Sang bakat tren di kuala

Dua lhee seun jaroe jibet  
Bak teuct jiseumbah Banta  
Lheuen jiseumbah ka jisurot  
U likot na tujuh deupa

Banta Ali teuma seuot  
Ban aneuk lot ngon jeureukha  
Kru seumangat e bintang sret  
Dalam sagop gunung raya

Lon jak lam gle beungoh seupot  
Lon tanjo sret ubak gata  
Jinoe adoe pakri patot  
Hai bintang sret cuba kata

Lom jimeusu putik rambot  
E dalem cut kri nyang suka  
Manyang-manyang gunung Geurutee  
Lam sapai bajee limpeuen ngon kala

Adat jeuet dalem keu bungong keumbee  
Lom boh bak ulee sajan ceumara  
Banta Ali ka neupaleng  
Ka teukhem bacut teurtawa

Neumarit le sira teukhem  
Ate ngeuren sangat suka  
Putik jambee ie puteh ban gadeng  
Putik jambee kleng hitam ban baja

Adat jeuet putroe keu buloh suleng  
Lon lihat bak keuieng ho lon jak lon ba  
Aben loh noe panton dendang  
Bek that panyang han le gura

Marit putroe bintang timu  
Ngon teungku Ali Peurkasa  
Siri nanggroe cuba peugah  
Ma ngon ayah peuebu nama

Soe geumeuhei nama tuanku  
Peugah laju po meukuta  
Nanggroe Yaman raja Yaman  
Geukheun meunan lam calitra

Ma lon putroe Ceureupu Intan  
Nama lon tuan Ali Peurkasa  
Bak ulon ka beh hareutoe  
Gata adoe cuba beurkata

Insy Allah he pangulee  
Tadeungo lagee lon calitra  
Nama nanggroe Indra Sarah  
Raja Abdullah du lon raja

Ma lon putroe Cahya Geumilang  
Nama lon tuan Meureudom Bunga  
Lom neumarit Banta Ali  
Ngon putroe ti tanglong donya

Tabri idin wahe putroe  
Hajat kamoe tren u donya  
Ngon meulahe kudrat Allah  
Lon cang gajah tujuh keupala

Meuka mate gajah pindoe  
Jeuet tawoe keudeh bak raja  
Seuot putroe bungong tanjong  
Meu'ah ampon po meukuta

Meunyo tatren keudeh nu bumoe  
Tinggai kamoe cong kayee raya  
Mate teungku tinggai kamoe  
Lam donya nyoe putoh asa

Padang masya teumpat meuhimpon  
Sinan neupreh lon po meukuta  
Meunyo mate tuanku di bumoe  
Lon duek sidroe cong kayee raya

Meunan jikheun cahya uroe  
Meuteutaloe ngon ie mata  
Banta Ali seuot meunoe  
Bek he putroe tameudawa

Tabri idin wahe adoe  
Bek he putroe panyang haba  
Meuka troh hat ajai sampoe  
Lam peutoe beusoepi keulua

Teuma seuot putroe ahli  
Hom he doli ban nyang suka  
Meuna tuah deungon bagi  
Poteu Allah bri lheueh bak bahya

Banta Ali beudoh laju  
Heundak lalu tren u donya  
Syae panton sang Meulayu  
Ate rindu Banta muda

Peuile raket keulileng buket  
Beusoe peurawot dalam peuraho  
Minta do'a barang seudiket  
Keu raja laot siapa tahu

Seuot putroe bungong meulu  
Ngon lagam su sang biula  
Peuraho raya rancong bangkuang  
Heundak jeumeurang u Bangkahulu

Kamoe nyang tinggai seulamat datang  
Abang beurjalan beu lanjot umu  
Abeh narit haba takwi  
Banta Ali tren u donya



Troh u bumoe Banta indah  
Raja gajah teungeut indra  
Aneuk raja ate gundah  
Neueu gajah that bit raya

Neumeulakee bak Tuhanku  
Ate kuyu Banta muda  
Ya Ilahi wa ya Rabbi  
Po lon neubri beu troh pinta

Tulong Tuhan mukjizat Nabi  
Beuek lon tadi gajah rimba  
Ban sare lheueh mohon tulong  
Peudeueng lam sarong neukeulua

Neumat peudeueng ka neugunci  
Banta Ali that guranta  
Neucang gajah that bit sunggoh  
Miseue guroh peudeueng raya

Banta Ali that guransang  
Gajah neucang sunggoh raya  
Neutak laju deungon peudeueng  
Leupang-leupang hana ngon sa

Bek 'an luka kulet asoe  
Meubulee roe hana luka  
Neucang laju deungon peudeueng  
Gajah bajeueng keubai raya

Tujoh uroe tujoh malam  
Gajah neucang hana reuda  
Umu sibuleuen peuet blah uroe  
Jaga keudroe gajah rimba

'Oh ban jaga gajah pindoe  
Beungeh tuloe hu ngon mata  
Bak Banta laju jipeutoe  
Jikap gigoe jipet mata

Ngon jimeusu that gurantang  
Beungehji ban rimueng bangsa  
Bit aneuk syam aneuk ceulaka  
Keupi kacang putroe kaba

Bak uroe nyoe han kusayang  
Kusimpan bek jan kahei ma  
Ka jitajo ban bubiri  
Banta Ali that guranta

Keepi kapoh putroe katawan  
Kah hai ensan that angkara  
Keudeh keunoe hana undi  
Banta Ali that guranta

Gajah beungeh hana sakri  
Jikap bibi jipet mata  
Jidrop laju Banta Ali  
Ka troh janji Tuhan Esa

Ka jigidong uleh gajah  
Tuleueng patah asoe luka  
Ka 'oh nan hat janji Allah  
Banta indah ka binasa

Patah tuleueng hanco asoe  
Jisrom dudoe dalam rimba  
Ka sret Banta u yup kayee  
Bak peureudee meudang ara

Teutap sinan bineh sungoe  
Malam uroe hana jaga  
Kuasa kudrat tulong Tuhan  
Teungeut pangsaneuk raja

Teuduek 'oh noe saboh syahdan  
Lon karangan eungkong tapa  
Jih keu raja dum hayawan  
Seubabjih nyan that peurkasa

Taklok keunan dum seugala don  
Bue ngon lutong himbee ngon kra  
Bak siaroe jibeurjalan  
Sithon siseun adat raja

Adat meunan baranggajan  
Buleuen Muharram thon peurmula  
Bak uroe nyan raja beurangkat  
Sajan rakyat geusyik panglima

Jijak laju hana ploh  
Hingga troh bak gunong raya  
Troh bak gunong buket sampoe  
Abeh nanggroe neumat raja

Abeh rakan dum jiyue woe  
Raja ngon putroe heundak bungka  
Abeh jiwoe dumna rakyat  
Bungka leugat putroe ngon raja

Jijak laju hana ploh  
Hingga troh bak aneuk raja  
'Oh jikalon Banta seudang  
Teuka sayang eungkong tapa

Wahe judo ureueng lakoe  
Ureueng nyoe ka gop enaya  
Mantong nyawong gohlom mate  
Darah ile bak angeeta

Tapeubat le geutanyoe  
Ureueng nyoe tameusyeedara  
Eungkong inong meunan kalam  
Eungkong agam meunoe haba

Ka meuteumee ensan saboh  
Bangsa nyoe jroh lon eu rupa  
Meunan jikheun bandua droe  
Jipeutoe bak aneuk raja

Banta Ali teungeut pangsang  
Gaki badan dum binasa  
Ka jipeugoe Banta indah  
Eungkong meutuah that seutia

'Oh ban jaga Banta Ali  
Eungkong juhari jibeurkata  
Pakon meunoe wahe adoe  
Gata sidroe keunong seksa

Peugah laju he adoe jroh  
Gata jipoh peue kareuna  
Teuma seuot Banta Ali  
Poteu Allah bri he syeedara

Lon cang gajah bak siuroe  
Lon cok putroe Meureudom Bunga  
That pahlawan gajah pindoe  
Ulon sidroe ka binasa

Deungo lon peugah wahe adoe  
Gajah pindoe ka troh tapa  
Keubai sangat han lut beusoe  
Tujoh seun meugoe jiduek lam tapa

Bitpi meunan wahe adoe  
Ulon sidroe tupeue tanda  
Meuka lon eu nibak badan  
Ka lon tujan mawot teuka

Meunyo bit-bit tatueng putroe  
Bahle kamoe peungon gata  
Meunan kata eungkong meutuah  
Seuot pantah Ali Banta

Meuna gaseh dalem payong  
Nyang hajat lon meunan hawa  
Meunyo meunan wahe adoe  
Tameurunoe meuen peundika

Eungkong tapa geumaseh that  
Jipeuubat aneuk raja  
Puleh kaki deungon jaroe  
jipeurunoe meuen peudika

Padum lawet teuma dudoe  
Marit meunoe eungkong tapa  
Jinoe adoe jak cang gajah  
Gata sudah jeuet peundika

Tulong Tuhan kuasa kudrat  
Troh ban hajat bak lon sangka  
Bak ate lon meunan nyang brat  
Ngon beureukat guree hamba

Meunan jikheun eungkong tapan  
Ate girang aneuk raja  
Sare ase dum sinaroe  
Bungka jinoe eungkong ngon raja

Jijak laju hana ploh  
Hingga troh u padang raya  
Troh u padang Cahya Hiram  
Marit nyoe ban eungkong tapa

Wahe adoe bungong peukan  
Nyoe lon peusan ubak gata  
Ploh gata sinoe di padang  
Lon u manyang meuseunia

Meuka troh hat ajai sampoe  
Gajah pindoe mate fana  
Lon peugah bak gata adoe  
'Oh troh sampoe mawot teuka

Padum lawet teuma akhe  
Poteu Allah bri troh kutika  
Eungkong tapa marit pantah  
Jipeugah bak Banta muda

Bak uroe nyoe wahe adoe  
Gajah pindoe ka troh masa  
Ka troh janji nibak Tuhan  
Beudoh jak cang bek that jula

Meunan jikheun eungkong tapan  
Gajah neucang le Ali Banta  
Neucang laju deungon peudeueng  
Hana leueueng siklep mata

Pat nyang keunong dum jipajoh  
Seubab ka troh ajai teuka  
Yoh nyan gajah jihei ampon  
Su meualon miseue taga

Ampon po cut lon jeunulang  
Bek le neucang neupeuhamba  
Lon neupuwoe nyan u nanggroe  
Uroe dudoe mufeu'at na

Tuanku meugah seugala nanggroe  
Meuna lon sidroe di leuen istana  
Meunan jikheun gajah pindoe  
Seuot dudoe eungkong tapa

Wahe adoe Banta Ali  
Deungo lon kheun kri ubak gata  
Bek takeubah gajah suang  
Akhe datang jipoh gata

Bek tasangka na ban jikheun  
Gajah uteuen le bicara  
Bit that paleh eungkong pindoe  
Jipeurunoe manusia

Meukuteumee eungkong pindoe  
Kuseudoe bek jan jihei ma  
Eungkong tapa seuot pantah  
Kah hai gajah bek le haba

Uroe nyoe kah abeh raseuki  
Ka troh janji Allah Ta'ala  
Masa dilee cit meugah that  
Jinoe troh hat mate fana

Bek kasangka udep sabe  
Jinoe mate mawot teuka  
Hana kathee droe binatang  
Han kasayang manusia

Meunan jikheun eungkong juhari  
Gajah sare beungeh raya  
Jikeumeung poh Banta seudang  
Beungehji ban rimueng bangka

Han jiteumee jidrop sabe  
Gundah ate gajah rimba  
Banta Ali neucang sabe  
Ka meugule gajah rimba

'Oh ban reubah gajah pindoe  
Ulah bagoe Seulawah Dara  
Sampoe mate raja gajah  
Eungkong meutuah heundak gisa

Idin keu lon wahe adoe  
Jinoe lon woe saweue tangga  
Lon jak kalon aneuk nanggroe  
Kadang soe-soe nyang meudawa

Kareuna lon trep di sinoe  
Bak teumpat nyoe sajan gata  
Meunan eungkong jimeukalam  
Seuot rijang Banta muda

Bek taduek le dalam uteuen  
Tren u mideuen sajan hamba  
Tadeungo he adoe payong  
Bah tinggai lon dalam rimba

Seubab kamoe kawom binatang  
Gata ensan manusia  
Meuna bahaya gata adoe  
Ulon sidroe troh kuteuka

Nyoe na saboh euncien malakat  
Tanda sahbat lon ngon gata  
Watee hajatteu keu kamoe  
Di sinoe tamohon pinta

Abeh narit ngon juhari  
Jipeureugi eungkong tapa  
Banta Alipi neubeudoh  
Pahlawan neuploh dalam singkla

Abeh geuboh geutah ram'ong  
Lam idong geulunyueng mata  
Leumah jieu bungong keumbee  
Aneuk asee laen keunira

Bahle kucok putroe keu kee  
Bah kutipee Banta muda  
Bah kusumpom ateueh batee  
Beukah ulee mate fana

Teuma kucok bungong keumbee  
That meulagee nyang seujahtra  
Lompi leumah dalam ate  
Kadang han mate aneuk raja

Meudum gajah ka ek jipoh  
Kee saboh han jan kuhei ma  
Pahlawan that gundah ate  
Han jitukri pubicara

Banta Ali bungka sunggoh  
Sampoe troh bak sungoe raya  
'Oh troh keunan geumupioh  
Bungka jeuoh lom lam rimba



'Oh tho reuoh ka geumanoe  
Dalam sungoe ië mumata  
'Oh lheueh manoe banlhee gop nyan  
Banta seudang teungeut mata

Tadeungo lon he Pahlawan  
Lon tidoran teungeut raya  
Meugoh jaga bek tapeugoe  
Ban lon kheun nyoe bek meutuka

Insya Allah tuanku droe  
Han lon peugoe po meukuta  
Asoe uteuen dum sinaroe  
Lon seudoe bek jan jihei ma

Meunan jikheun le pahlawan  
Teungeut pangsang Banta muda  
'Oh ban teungeut Banta seudang  
Aneuk jalang ate suka

Jisuet peudeueng dalam sarong  
Ka jipuntong Banta muda  
Jikoh jaroe deungon gaki  
Banta Ali teungeut indra

'Oh ban puntong gaki jaroe  
Jicok putroe tanglong donya  
Sira jinoe jimupanton  
Sang bakat tren di kuala

Ayo he nasib pakri keu untong  
Laksana tongtong dilawan peunyu  
Laot barollah teurempong-ampong  
Kita beurgantung pada Tuhanku

Mirahpati di naggroe Jeddah  
Heundak sama si rajawali  
Saya beurgantung keupada Allah  
Aku beurtungkat keupada Nabi

**Meunan jikheun putroe intan  
Seuot Pahlawan teuma beurkata  
Tadeungo he bungong panjoe  
jinoe tawoe ubak raja**

**Troh u nanggroe bintang canden  
Tameukawen geutanyoe dua  
Seuot putroe bungong pade  
Bahle mate dalam rimba**

**Baranggaho han lon jak le  
Bah dalam gle rimueng seuba  
Meunan narit putroe bintang  
Di Pahlawan beungeh raya**

**Meuhan tawoe putroe bungong  
Kutueng nyawong bahle fana  
Kukoh gaki deungon jaroe  
Gata putroe bek le haba**

**Meuhan tawoe bak sulotan  
Troh janjian Tuhan Esa  
Meunan jikheun aneuk bisoe  
Seuot putroe tanglong donya**

**Insya Allah lem teungku droe  
Ikot kamoe dum peukara  
Meunan narit putroe elok  
Aneuk budok ate suka**

**Tinggai sinan Banta Ali  
Jipeureugi woe bak raja  
Jiba sajan putroe bungong  
Rot lam gunong jalan safara**

**Padum lawet teuma dudoe  
Troh u nanggroe si ceulaka  
Jikalon le ureueng dalam  
Pahlawan ka troh jigisa**

Jitet beude lila nubat  
Suroh deelat raja raya  
Pahlawan jitamong leugat  
Seumbah, deelat ayah bunda

Sajan putroe cahya kilat  
Soe nyang lihat suka rasa  
Soe nyang kalon ate deundam  
Allah he wang jroh lagoina

Tahe hireuen dumna ensan  
Rupa na ban bintang rusa  
Taeu uroe sang bek leukang  
'Oh malam leumah rahsia

Bahkeu dumnan putroe bungong  
Lon seumong ngon badeuek raya  
'Oh lheueh seumbah raja dalam  
Lem Pahlawan peugah haba

Ampon meu'ah po jeunulang  
Banta seudang hana meugisa  
Leupah ulon jak cang gajah  
Lon keubah di yup kayee raya

Mate gajah lon cok putroe  
Troh lon woe bak Banta muda  
'Oh lon kalon Banta han le  
Jeuep lungkiek gle lon jak mita

Troh lon jak bak saboh padang  
Banta seudang sinan teurhanta  
Lon puwoe le teuma rijang  
Lon jak tueng ngon syiah ulama

'Oh lheueh tanom lon khanduri  
Alem faki lakee do'a  
Nyankeu dum buet lon he doli  
Pakri pike po meukuta

Jinoe neupoh lon bak mate  
Seubab tan le po cut Banta  
Meureudom Bunga that meutuah  
Han jipeugah dum keurija

Raja Yarpan seuot pantah  
Kheundak Allah dum keurija  
Neubri saket lawan mangat  
Neubri nekmat lawan bala

Neubri nekmat beu tasyuko  
Bala nyang le beu tasaba  
Seureuta ngon ie mata ro  
Tasyuko Wahidon Kaha


Sleueng nibak nyan padum buleuen  
Meunoe neukheun poteu raja  
Lon boh gata keu raja mideuen  
Takeurajeuen nanggroe raya

Lon niet aneuk gata sidroe  
Keu geulantoe Banta muda  
Banta Alipi ka mate  
Lonpi han le mat neuraca

Teuma sabda raja ade  
Neuyue pangge rakyat dumna  
Troh le keunan dum sibarang  
Uleebalang ngon peutua

Imum geusyik waki meugat  
Meusapat ngon keujruen muda  
Jitren rakyat dum sibarang  
Bentara blang ngon haria

'Oh meuhimpon seukalian  
Juhan Pahlawan geuboh keu raja  
Bandum rela uleebalang  
Tet meuriam deungon lila



### III. PUTROE MEULU MEUKAWEN NGON BANTA ALI

Trep ka lambat tan lon tu'oh  
'Oh ban puntong gaki jaroe  
Teutap sinan dalam rimba  
Aneuk raja sayang han soe

Mantong udep nyawong badan  
Dalam pangsang Banta sidroe  
Padum uroe lheueh nibak nyan  
Eungkong tapan troh jak pakoe

Karonya Po Rabbon Kade  
Dumpeue ase leungkap bagoe  
Bak siuroe jibeurlalan  
Eungkong tapan nyang saboh roe

Deungon rakyat dum seureuta  
Himbee ngon kra dum sinaroe  
Cagee lutong bue ngon reungkah  
That barollah wahe adoe

Jijak laju dalam uteuen  
Miseue tupeuen barat jatoe  
Padum lawet peurlalanan  
Troh le keunan hingga sampoe

Troh bak tuan Banta Ali  
Duek meuriti dum sinaroe  
Eungkong tapa ka jisudi  
Banta Ali nyang hareutoe

Supo buet nyoe adoe badan  
Buet pahlawan he dalem droe  
Dumnoe tuah ka Tuhan bri  
Dumnoe bagi ulon sidroe

Bahya sabe hana lanti  
Kheundak Rabbi Tuhan sidroe

Banta Ali meunan kalam  
Eungkong tapan marit dudoe

Wahe judo nyang juhari  
Jak peureugi wahe putroe  
Taba rakyat dum barangri  
Tapeureugi seugala nanggroe

Tajak mita kawom ensan  
Nyang duek ladang baranggasoe  
Taba keunan Banta Indah  
Sayang leupah bek le meunoe

Adat ka mate jeuet taseubee  
Rijang teuntée wahe putroe  
'Oh takalon that weueh ate  
Jaroe gaki ka mupaloe

Taeu teuh miseue bace  
Ulah mise kayee tungoe  
Abeh narit raja peugah  
Insya Allah jaweueb putroe

Jibeudoh le putroe indah  
Bue ngon reungkah dum sinaroe  
Cagee lutong himbee ngon kra  
Dum jibungka sajan putroe

Jijak laju hana jidong  
Putroe eungkong pantah han soe  
Tujoh uroe jijak sabe  
Meuteumee le ureueng sidroe

Nama geukheun Ni Lam Capa  
Duek lam rimba gop nyan sidroe  
Troh le keunan putroe tapa  
Asoe rimba dum sinaroe

Ni Kubayan pucat muka

Miseue geumpa leungo asoe  
Jimarit le putroe uteuen  
Deungo lon kheun ma teungku droe

Jeuet troh langkah ulon tuan  
Sidroe ensan ka mupaloe  
Jaroe han le gakipi tan  
Bukon sayang ma teungku droe

Lon ba keunoe tapeubat  
Pakri meuh at cuba kheun proe  
Hana bak lon ubat luka  
Jak tamita laen nanggroe

Eungkong tapa jikheun meunoe  
Na bak kamoe dum sinaroe  
Meuh ngon pirak breueh ngon pade  
Dumpeue lon bri e po ma droe

Seuot po Ni bungong uroe  
Taba keunoe wahe putroe  
Meuka ek na breueh ngon pade  
Abeh pike bak lon sidroe

Meunan jikheun Ni Lam Capa  
Asoe rimba galak han soe  
Eungkong tapa marit pantah  
Deungo lon peugah aduen adoe

Gaseh sayang dumteu sare  
Mita pade dalam nanggroe  
Tapuwoe keunoe beu rijang le  
Beu ase deungon lhee uroe

Meunan jikheun eungkong tapan  
Beudoh rakan dum sinaroe  
Cagee lutong bue ngon reubah  
Jimeulangkah tren u nanggroe

Jijak laju hana lanti  
Jipeureugi malam uroe  
Troh u nanggroe dum kafilah  
Jimeureupah dalam nanggroe

Ureueng nanggroe ate sosah  
Bue ngon reungkah rame han soe  
Jicok laju peue nyang mudah  
Gadong birah dum jipuwoe

Jicok jagong deungon pade  
Keudeh u gle dum jipuwoe  
'Oh troh jiwoe dumna rakyat  
Jijok leugat ubak putroe

Jagong pade dum lat batat  
'Oh meusapat le han bagoe  
Ni Lam Capa ate mangat  
Le that nekmat keunan sampoe

Teuduek siat Ni Kubayan  
Eungkong tapan leugat jiwoe  
'Oh sare troh bak sulotan  
Marit,rijang tuan putroe

Wahe judo deungo lon peugah  
Cit ka sudah dum sinaroe  
Na meuteumee sidroe ensan  
Taba keunan Banta sidroe

Meunan narit putroe peugah  
Ate dasyah raja nanggroe  
Marit raja eungkong meutuah  
Bak kafilah jihareutoe

Dum geutanyoe ulon peugah  
Tameulangkah dum sinaroe  
Tajak intat Banta indah  
Nyankeu titah ulon sidroe



Sare peungeuh cuaca trang  
Eungkong tapan peukeumah droe  
Deungon rakyat that barollah  
Bue ngon reungkah rame han soe

Jijak intat Banta indah  
Ka troh sudah bak nyang baroe  
'Oh troh keunan ka hamperan  
Ni Kubayan tahe keudroe

Troh le keunan jiba laju  
Adoe teungku sayang han soe  
Teutap sinan Banta Ali  
Sajan po Ni malam uroe

Beungoh seupot neuboh ubat  
Hana siat nyang na padoe  
Padum lawet teuma akhe  
Puleh gaki deungon jaroe

Ni Lam Capa mangat ate  
Neumarit le bak samlakoe  
Ate rindu hana ngon sa  
Ubak Banta neukheun meunoe

Po meukuta deungo lon peugah  
Tameunikah dua geutanyoe  
Seubab ate lon that rindu  
Wahe teungku malam uroe

Tameukawen geutanyoe dua  
Po meukuta tanglong nanggroe  
Meunan narit Ni Lam Capa  
Seuot Banta teuma meunoe

Wahe po ma bungong jeumpa  
Aneuk gata kamoe sidroe  
Phon lam donya troh 'an page  
Bak lon tan le meudeh meunoe

Meunan jikheun Banta seudang  
Ni Kubayan beungeh han soe  
Ni Lam Capa saket ate  
Neumeusyae tuha pindoe

Bak beuramoe timoh di pante  
Bak kayee mate timoh kulat  
Napsu kamoe han meusampe  
Jikalée mate nyawong teurangkat

Banta seuot jikheun meunoe  
Deungo kamoe he ma siat  
Puteh-puteh meulu cina  
Bak ceundana ateuch jeurat

Gata sidroe sah lon kheun ma  
Phon lam donya troh akhirat  
Teuduek 'oh noe saboh leua  
Bek that jula beungoh uroe

Meunankeu dum manusia  
Tuha muda dalam nanggroe  
Beungoh seupot rijang jula  
Tuha muda han thee keudroe

Ni ngon Banta sabe rioh  
Hana teudoh malam uroe  
Hijo-hijo seunam Banggala  
Hana ek sa ngon seunam Kleng

Agam putik inong tuha  
Rok-rok masa su meudeungkeng  
Pisang raja masakan raja  
Baek hareuga raja sitali

Ureueng tuha teungada-ngada  
Ureueng muda apa lagi  
Bahkeu dumnan saboh syahdan  
Laen padan lon calitra

Deungo lon peugah wahe teungku  
Putroe Meulu nyang that eela  
Jiduek lam guha saboh sirokan  
Jitapa sinan siumu donya

Le that hekeumat ngon saktian  
That pahlawan beurani kha  
Nyankeu aneuk raja Diu  
That meusyeyuhu seugala donya

Masa jikoh gaki jaroe  
Keunan bak putroe malaikat ba  
Teutap sinan putroe Meulu  
Ate rindu dalam tapa

Gaseh Tuhan Rabbon Ghafu  
Putroe Meulu that eelia  
Tulong Tuhan Maha Kudrat  
Malaikat tren u donya

Tuhan suroh ubak putroe  
Meunan adoe lam calitra  
Troh bak teumpang tuan putroe  
Neupeujeuet droe keu eelia

'Oh troh keunan wahe sahbat  
Malaikat neubeurkata  
Meunoe neukheun malaikat  
Narit sehat phon neubuka

Wahe aneuk putroe indah  
Deungo lon peugah bijeh mata  
Gata jinoe tameukawen  
Puteh leucen bek meudawa

Meunan suroh Tuhanku Rabbi  
Banta Ali judo gata  
Nyankeu aneuk raja Yaman  
Gaki tangan ka bak gata

Taba gaki deungon jaroe  
Wahe putroe nyang seujahtra  
Meunan neukheun malaikat  
Seuot leugat putroe muda

Seuot putroe bungong tanjong  
Bak ulon ateueh jeumala  
Bak lon sidroe hana ubah  
Deumi Allah han meutuka

Meunan jikheun bungong riwat  
Malaikat pi neugisa  
Tinggai sinan putroe intan  
Ngon pakaian dum peukara

Sawak ija sok ngon bajee  
Bak ulee pucak ceumara  
Pakaian hu hana sakri  
Gleueng gaki ulee suasa

Jingui alat dum u badan  
Jipingang tulesan Banggala  
Sare keumah ngon pakaian  
Jibeurjalan putroe muda

Jijak laju putroe buleuen  
Troh u mideuen Ni Lam Capa  
'Oh sare troh keunan sampoe  
Marit putroe tanglong donya

Marit putroe putik sukon  
Meunoe phon-phon wahe cutda  
Pisang klat jantung pisang nu  
Soe na di leupu seumangat kuta

Seuot po Ni bungong rihan  
Lon hai intan ureueng tuha  
Aneuk lon han lakoepi tan  
Cit mubadan sidroe saja

Peue na hajat e sambinoe  
Bak kamoe tapeugah sigra  
Seuot putroe bungong rubek  
Neubri lon ek u istana

Nyankeu hajat lon jak keunoe  
Wahe ma droe pakri bak gata  
Ni Lam Capa seuot pantah  
Beungeh leupah hu ngon mata

Han kubri ek u rumoh kee  
Dara asee keunoe teuka  
Nyandum rupa miseue buleuen  
Dalam uteuen meudiwana

Seuot putroe bungong peukan  
Jikheun nyoe ban pantah sigra  
Mirahpati teureubang lalu  
Burong rawatu jilise awan

Idin he ma lon ek u leupu  
Adanya situ raja bangsawan  
Meunan jikheun putroe intan  
Ni Kubayan beungeh raya

Hana ureueng laen sinoe  
Cit meukamoe dalam rimba  
Bit dara syam dara pindoe  
Mita lakoe rimueng seuba

Meunan jikheun Ni Kubayan  
Beungehji ban gajah meunta  
Saket ate putroe Meulu  
Jiek laju u istana

'Oh sare troh u meuligoe  
Marit putroe tanglong donya  
Ampon meu'ah tuanku droe  
Ka troh keunoe bak meukuta

Dua lhee seun jaroe jibet  
Bak teuot jiseumbah Banta  
Lom jimarit putroe Meulu  
Ngon teungku Ali Peurkasa

Suroh Tuhan Po lon Rabbi  
Lon esteuri po meukuta  
Meunan hajat ulon tuan  
Po junjongan bukon seunda

Banta Ali nyoe ban balek  
He adek panyot peulita  
Kareuna lon ureueng faki  
Jaroe gaki tan bandua

Jaroepi han gaki puntong  
Kon deungon lon judo gata  
Di gata na gaki jaroe  
Ulon sidroe ureueng hina

Seuot putroe puteh leusoh  
Bak lon sunggoñ bukon seunda  
Untong kamoe tuanku beh  
Aakhirat troh phon lam donya

Hana ubah nibak kamoe  
Lam donya nyoe hana dua  
Wa'amma qadrallahu haqqun qadrihi  
Hadih Nabi bukon seuda

Nyang ka kada han jeuet ungki  
Hak nyang neubri wajib rela  
Miseue teuseubot lam riwayat  
Deungo he deelat lon calitra

Di yup tapak gaki lakoe  
Ureueng binoe sinan syeuruga  
Meutan idin ureueng lakoe  
Jreueng binoe hana laba

Jipuasa jiseumbahyang  
Sibarang jibloe nuraka  
Jiboh jakeuet pitrah jibri  
Jiek haji bloe nuraka

Beutthat lakoejih baduwi  
Beutthat pancuri ambek areuta  
Meunan teuseubot lam hadih Nabi  
Narit nyang suci hana dosta

E dalem cut bungong uroe  
Ulon sidroe judo gata  
Meunyo meunan wahe putroe  
Bak lon sidroeipi ka rela

Lom jimarit si nyak putroe  
Idin lon woe heundak gisa  
Banta Ali seuot meunoe  
Idin kamoe po jroh rupa

Nyoe na saboh lon amanat  
Lon bri ingat putroe muda  
Putik pawoh geulima batu  
Anak seumbilan diteupok tangan

Jawoh nanggroe di neugri situ  
Hilang di mata di hate jangan  
Meunan neukheun Banta Ali  
Seuot putroe ti Meulu indra

Aer madu di dalam puan  
Anak ikan di teupi laot  
Saya teuringat keupada tuan  
Hari dan malam hate tak lupot

Narit abeh janji sampoe  
Jiwoe putroe tinggai raja  
Ni Lam Tapa that mupot-pot  
Ni ceumarot hana reuda

Bit dara syam aneuk bisoe  
Mita lakoe rimueng seuba  
Adat kon seubab badan la'eh  
Kuteumee kheh ngon kutampa

Meunan jikheun Ni Kubayan  
Beungeh na ban rimueng bangsa  
Tuan putroe jipeulikot  
Ni ceumarot that guranta

'Oh leupah woe putroe bintang  
Ni Kubayan peugah haba  
Deungo lon peugah tuanku beh  
Bak lon sunggoh bukon pura

Bek neumeukawen putroe jeuh  
Meukeusud han troh po meukuta  
Taeu rupa miseue buieuen  
Jeuep-jeuep uteuen meudiwana

Jipeujeuet droe miseue meurak  
Taeu jijak jeuep-jeuep rimba  
Nyang teuladan deungon kamoe  
Ban lon kheun nyoe han meuriba

Kamoe rumpang gata puntong  
Cit meunanggong geutanyoe dua  
Banta Ali seuot meunoe  
Gata sidroe sah lon kheun ma

Phon lam donya troh 'an page  
Bak meusampe ulon kheun ma  
Teuiem po Ni narit han le  
Ka teupike Ni Lam Capa

Teuduek 'oh noe adoe teungku  
Putroe Meulu lon calitra  
Sleueng nibak nyan tujuh uroe  
Tuan putroe lom jibungka



Jibot gaki tuan putroe  
Syiah lhee droepi seureuta  
Troh le keunan siat sampoe  
Cut putroe sajan eelia

Pioh sinan syiah lhee droe  
Jiek putroe ubak Banta  
Jipeuduek jaroe deungon gaki  
Banta Ali hana haba

Tahe hireuen iem beurzikri  
Pujoe Rabbi Tuhan Esa  
Putroe Meulu jimeukalam  
Bak Tuhan Wahidon Kaha

Allah hai Po Rabbon Kade  
Keu lon neubri beu troh pinta  
Bak muwoe jaroe deungon gaki  
Tuhan neubri bak seujahtra

Lheueh meulakee putroe kande  
Poteu Allah bri kabui pinta  
Muwoe gaki deungon jaroe  
Tuhan sidroe nyang that kaya

Lheueh nibak nyan teuma lagi  
Bri khanduri keu eelia  
Lheueh jipeuduek jibet jaroe  
Ase kamoe teungku raja

'Oh lheueh makeuen neusrah jaroe  
Pinah putroe idang raya  
'Oh sare lheueh pinah idang  
Putroe bintang peugah haba  
Putroe marit meujuadah  
Deungon syiah dalam rimba  
Neudeungo lon teungku syiah  
Neupeunikah lon ngon Banta

Teuma seuot teungku syiah  
Insya Allah putroe muda  
Lheueh wakilah nibak teungku  
Putroe Meulu ek istana

Teuma beudoh Banta Ali  
Neutren lagi bak eelia  
'Oh sare troh u seuramoe  
Mumat jaroe deungon eelia

Na sikeujap teuma dudoe  
Syiah lhee droe baca do'a  
Kheun usikum 'ibadallah  
Lheueh khuteubah baca do'a

Cukop ase dumpeue sudah  
Geupeunikah aneuk raja  
Putroe Meulu he meutuah  
Lon peunikah deungon gata

Banta Ali seuot pantah  
Lon meunikah putroe muda  
'Oh sare lheueh kabui nikah  
Geufatihah teuma sigra

Tinggai sinan raja ngon putroe  
Syiah neuwoe dalam rimba  
Teutap sinan Banta ngon putroe  
Po Ni sidroe masam muka

Geubripi han geulakeepi tan  
Deuek laparan ureueng tuha  
Padum lawet teuma dudoe  
Marit putroe deungon raja

Wahe judo tanglong nanggroe  
Nibak kamoe saboh bicara  
Tapeukawen Po Ni sidroe  
Tabri lakoe ureueng muda

Meunan leumah bak lon sidroc  
Pakri jinoe po meukuta  
Banta seuot teuma dudoe  
Hom hai putroe ban nyang suka

Meunan kalam raja nanggroe  
Lheueh nyan putroe mohon pinta  
Ngon meulahe kaya Tuhan  
Beu troh ensan keunoe sigra

Beu troh sajan teungku syiah  
Meunan titah putroe muda  
Allah hai Po Rabbon Kade  
Keu lon neubri on kayee syeuruga

Sret on kayee ubak putroe  
Geupumanoe Ni Lam Capa  
Lheueh pumanoe Ni Kubayan  
Kulet na ban bungong jeumpa

Miseue ureueng muda seudang  
Rupa nyura sang bintang kala  
Soe nyang kalon tahe mandang  
Allah he wang jroh lagoina

Ngon meulahe kudrat Tuhan  
Ni Kubayan ka seujahtra  
Lheueh nyan teuma wahe rakan  
Troh le ensan ngon eelia

'Oh sare troh keunan sampoe  
Neubet le putroe idang raya  
Ni Lam Capa teuduek keudroe  
Tuan putroe meukeurija

'Oh lheueh makeun pinah idang  
Ni Kubayan meusuara  
Na neudeungo teungku ampon  
Peunikah lon ngon linto teuka

Teuma seuot teungku syiah  
Insya Allah po jroh rupa  
Cukop ase dumpeue sudah  
Geupeunikah Ni Lam Capa

'Oh sare lheueh kabui nikah  
Teungku syiahpi neugisa  
Tinggai sinan linto baro  
Sajan judo Ni Lam Capa

Lawet lawan teuma dudoe  
Leumah lumpoe Banta muda  
Nakeu umu teungoh malam  
Dua jeuem klam watee seunia

Na nyum tangkulok gop cok di ulee  
Sang nyum malee aneuk raja  
Abeh leumah dum sinaroe  
Jaga dudoe Ali Banta

Ie mata ro meuteutaloe  
Teuingat keudroe raja muda  
Lheueh nyan jaga le ngon putroe  
Jitanyong proe pakon rugha

Adat salah tuanku kamoe  
Neukoh takue lon beu sigra  
Hana salah wahe putroe  
Bukon lon moe seubab gata

Karonya Po Tuhan sidroe  
Han got lumpoe leumah rahsia  
Peue neulumpoe tuanku droe  
Kadang putroe jeuet boh makna

Banta Ali teuma peugah  
Asailiah neucalitra  
Phon bak uram troh bak ujong  
Abeh bandum jeuep peukara

Seuot putroe bungong tanjong  
Meunoe phon-phon jibeurkata  
Meu'ah ampon tuanku droe  
Makna lumpoe lon peunyata

Bak ate lon tuanku droe  
Gop tueng putroe Meureudom Bunga  
Meunan narit lon nyang tanggoe  
Tuanku droe bukon seunda

Banta Ali neukheun nyoe ban  
Judo badan jak tabungka  
Bahle tawoe jinoe rijang  
Bek jitawan putroe muda

Adat bit le cicem laen  
Leubeh canden cicem pala  
Adat bit le putroe laen  
Leubeh canden Meureudom Bunga

Seuot putroe intan biduri  
Ban kheun doli bak lon suka  
Adat jinoe tapeureugi  
Bak kamoepi hana dawa

Ulon ikot baranggakri  
Bah meuseuki nyawong keulua  
Lakee idin nibak po Ni  
Banta Ali kheundak bungka

Neudeungo he po ma badan  
Idin laman e ma raja  
Idin kamoe ma meutuah  
Woe bak ayah saweue bunda

Kareuna lon trep ka leupah  
Ma ngon ayah han meuho ka  
Pakri aneuk talakee woe  
Tinggai kamoe dalam rimba

Kadang mate saleh pajan  
Ngon lonpi tan dalam rimba  
Bek tagundah ma teungku droe  
Tuhan sidroe nyang peulara

Nyang pumanoe na Jibraï  
Nyang peusuci Allah Ta'ala  
Meunyo meunan he aneuk droe  
Idin tawoe bijeh mata

Uroe nyoe cre lon ngon gata  
Meu'ah deésya dum barangna  
Abeh narit Banta Ali  
Tinggai po Ni dalam rimba

Bahkeu dumnan saboh ayat  
Bek panyang that hana gura  
Lagi ulopi meularat  
Timu barat lam gop maba

Han jeuet lon duekpi meusiat  
Troh le surat hana reuda  
Bahkeu 'oh nan saboh pangkat  
Ragam barat saboh laku

Lagee timu lagee barat  
Han that mangat wahe teungku  
Lon umpama miseue timphan  
Tapeulawan ngon ie madu

Han that mangat 'oh tamakan  
Ngon on sajan ta'uet laju  
Teuduek 'oh noe saboh ato  
Khuteubah le han ek peugah

#### IV. RAJA SAMILON KEUMEUNG REUBOT PUTROE

Amma bakdu teuma dudoe  
Aneuk raja woe nyoe lon peugah  
Teubiet faja beungoh uroe  
Bungka putroe ngon khalifah

Neujak laju hana piah  
Bungka sunggoh rot lam rimba  
Teungoh gunung neutren paloh  
Bungka sunggoh putroe ngon raja

Na lhee buleuen geubeurjalan  
Troh bak padang nyang that luah  
Nyankeu teumpang siyah rimba  
Aneuk raja ka troh langkah

'Oh troh keunan aneuk raja  
Syiah rimba saleuem pantah  
Assalam 'alaikom e samlakoe  
Pane nanggroe banta indah

Peue nan ayah mateu putroe  
Gata sidroe cuba peugah  
Ho tameung jak po juhari  
Cuba kheun kri he meutuah

Banta seuot 'alaikom salam  
Ulon tuan woe bak ayah  
Banta Ali nan lon tuan  
Raja Yaman nama ayah

Ma lon putroe Ceureupu Intan  
Meusyeuhuran jeuep kafilah  
Meunyo aneuk raja nanggroe  
Nyo ek sampoe keunoe langkah

Ulon teu nyoe na taturi  
Deungo lon kheun kri he meutuah

Duek di laot Nabi Khide  
Di dalam gle lon peurintah

Lon hukom bandum seugala be  
Udep mate suroh Allah  
Gata aneuk that lon gaseh  
Lon bri abeh eleumee peuet blah

Nyoe na saboh euncien malakat  
Le that nekmat he cut indah  
'Oh tapeuduek ateueh bumoe  
Kuta beusoe jadi susah

Ngon pahlawan muploh laksa  
Ngon lasyeuka han teupegah  
Mat bak jaroe peudeueng ganja  
Beurani kha han peue pegah

Ase meuriam ateueh madat  
Aneuk ubat cit ka sudah  
Neubri peudeueng gajah meunta  
Syiah rimba ate murah

Lom neubri kreh rimueng tapa  
Nan neuboh geula(r) teungku syiah  
Lom neubri pahlawan dua  
Hebat rupa han ek pegah

Ansyah Pari Diwa Peurkasa  
Bandua nyan ureueng meugah  
U dalam pha ka neupasoe  
Seubab rago teungku syiah

Abeh neubri dum sibarang  
Ate deundam teungku syiah  
Lom neumarit teungku tapa  
Ubak Banta ka neupegah

Jampang he aneuk gata muprang  
Bak lon he intan taisyarah



Meunan wasiet syiah rimba  
Banta muda seuot pantah

Insya Allah he teungku droe  
Bak lon sidroe hana ubah  
Neubri idin teungku ampon  
Hajat ulon woe bak ayah

Trep ka lambat ulon bungka  
Ayah bunda nyang lon keubah  
Seuot teungku syiah rimba  
He ciut Banta han peue salah

Idin kamoe bijeh mata  
Woe bak bunda deungon ayah  
'Oh lheueh idin mumat jaroe  
Raja ngon putroe bungka pantah

Padum lawet bungka sabe  
Rot dalam gle uteuen gajah  
Lhee buleuen bungka sampoe  
Troh u nanggroe nyang that luah

Nama nanggroe Bustajaman  
Raja jimeunan Samilon meugah  
Nanggroe luah hana ngon sa  
Samilon 'ala nyang that meugah

Sireutoh raja taklok keunan  
Rayek saktian han ek peugah  
Pahlawan le muploh laksa  
Beurani kha han peue peugah

Baranggaho han soe sagang  
Ho nyang jiprang siat bicah  
Ka troh keunan raja ngon putroe  
Seupot uroe ka rab sudah

Troh le keunan ureueng nanggroe  
Jieu putroe rupa indah  
Dumna rakyat tahe hireuen  
Ladom jikheun buleuen peuet blah

Pane putroe keunoe teuka  
Hana ngon sa jeuep kafilah  
Ladom ureung meunoe kira  
Ubak raja kujak peugah

Meuh at geubri meuh ngon pirak  
'Oh troh kujak bak khalifah  
Abeh ingat dalam ate  
Jibeudoh le jiwoe pantah

Jiplueng laju cula-caloe  
Troh sampoe bak raja meugah  
'Oh sare troh bak Samilon  
Jiseun jaroe dua blah

Deungo lon peugah ampon deelat  
Sidroe jeh pat putroe indah  
Rupa indah hana bagoe  
Ulah nyum proe buleuen peuet blah

Cahya muka ban panyot hu  
He tuanku kon beurakah  
Patot judo ngon tuanku  
Bintang timu meuh keureutah

Ban jideungo wahe teungku  
Ate rindu raja meugah  
Raja Samilon suka ate  
Jipangge meuntroe peurdana

Troh le keunan pantah han soe  
Bandua droe beurani kha  
Bak raja jimeuhei ampon  
Jiseun jaroe bandua

Ampon meu'ah deelat ampon  
Ho neusuron kamoe bandua  
Teuma seut raja nanggroe  
Tacok putroe keunoe taba

Meuhan jibri putroe seudang  
Jihpi tacang tapufana  
Meujih sidroe keunoe datang  
Tacok rijang putroe muda

Meunan suroh raja meugah  
Bujang meugah ate suka  
Jibeudoh le sigra pantah  
Rakyat jikrah tuha muda

'Oh meuhimpon beusa seudang  
That guransang dum lasyeuka  
Cukop ase dum sibarang  
Meuntroe bujang ngon panglima

Jijak laju dum sinaroe  
Troh sampoe bak raja muda  
'Oh troh keunan wahe adoe  
Bujang meuntroe peugah haba

Assalam 'alaikom wahe adoe  
Pajan keunoe troh tateuka  
Wa 'alaikom salam helem meuntroe  
Kamoe baroe baro teuka

Lom jimarit bujang meuntroe  
Jitanyong proe ubak Banta  
Tadeungo he intan bungong  
Lon teumanyong ubak gata

Peugah laju intan bungong  
Lon teumanyong bek sia-sia  
Pane nanggroe asailiah  
Peue nan ayah nama gata

Banta Ali seuot pantah  
Deungo lon peugah lem peurdana  
Nanggroe Yaman asailiah  
Teumpat ayah du lon raja

Nama ayah raja Yaman  
Nama lon tuan Ali Peurkasa  
Meunyo meunan wahe adoe  
Nibak kamoe saboh bicara

Adoe teungku deungo lon peugah  
Saleuem seumbah bak sripada  
Geuyue lakee bungong peukan  
Putroe intan judo gata

Meuhan tabri bungong panjoe  
Gata sidroe tinggai donya  
Nyankeu narit lon nyang tanggoe  
Pakri adoe nibak gata

Seuot Banta neukheun meunoe  
Deungo kamoe lem peurdana  
Hajat di lon malam uroe  
Intat putroe keu raja gata

Lah cit ka troh gata keunoe  
Adat han kamoe keudeh teuka  
Nyankeu narit lon nyang sunggoh  
E dalem beh bukon pura

Lon cre gampong tinggai tempat  
Lon jak intat putroe keu raja  
Meunan narit Banta seudang  
Meuntroe bujang jiek bisa

Seureuta ngon panglima prang  
Dum sibirang ngon lasyeuka  
Jikeumeung poh Banta seudang  
Beungehji ban gajah meunta

Tadeungo he Banta seudang  
Gata kucang putroe kuba  
Adat tabri putroe bungong  
Seulamat nyawong hana keulua

Gata han mate meuteumee riwang  
Meutabri bintangkeu raja raya  
Nyo bit geuthee gata malang  
Takeumeung muprang deungon suara

Camplic saboh padumna keueung  
Bak sidroe ureueng padumna teuga  
Bujang meuntroe meunan jikheun  
Neusuet peudeueng Banta muda

'Oh l~~heueh~~ neusuet peudeueng u jaroe  
Neutam~~poe~~ ban siseun lingka  
Dumna rakyat abeh phang-phoe  
Peusiblah droe bek binasa

Mate rakyat na sireutoh  
Gohlom sunggoh mantong pura  
Dumna rakyat tahe-gante  
Peudeueng hijo gajah meunta

Keudeh keunoe meusurot-surot  
Teungoh meulet leuek bangguna  
Banta Ali rab mupaloe  
Ureueng nanggroe that guranta

Neuteupok jaroe ubak gaki  
Jiteubiet le pahlawan dua  
Jimarit le bandua droe  
Jibèt jaroe ateueh jeumala

Han jan jimarit le pahlawan  
Raja seudang le beurkata  
Na tadeungo he pahlawan  
Talawan prang tantra raja

Han jan abeh Banta kheun ban  
'Oh jideungo prang that guranta  
Jiteubiet le keudeh leugat  
Jieu rakyat ban ie raya

'Oh sare troh dalam mideuen  
Jisuet peudeueng pantah sigra  
Jimat peudeueng ka jigunci  
Ansyah Pari that guranta

Jicang rakyat kanan kiri  
Laen lagi jijak mita  
Banduajih that seureuloe  
Abeh phang-phoe tantra raja

Le that rakyat ka mupaloe  
Putoh jaroe takue ngon pha  
Nyang na tinggai nyan sidroe-droe  
Jiplueng jiwoe ubak raja

'Oh sare troh rakyat jiwoe  
Bujang meuntroe peugah haba  
Ampon meu'ah wahe deelat  
Le that rakyat nyang ka fana

Ube nyang ka lon lawan prang  
Han tom lon pandang meunoe rupa  
Siat abeh rakyat jicang  
Dua pahlawan that peurkasa

Rupa hebat han tajeuet pandang  
Bagoe nyum sang uroe teungoh kha  
Jinoe bak ingat tuanku beh  
Kadangpi troh keunoe jiteuka

Meutroh keunoe jih jilalo  
Jihanco meuligoe kuta  
Meunan seumbah meuntroe bujang  
Dua pahlawan pi jigisa

U dalam pha ka jimasok  
Sinan jiduekjih bandua  
Jinoe marit raja rayek  
Ateji brok hana ngon sa

Jipeugot le teuma surat  
Iiyue intat jeuep-jeuep raja  
Jiboh narit dalam surat  
Mangat han that dum ie nira

Lom jipeugot surat sipucok  
Jiyue jok keu raja muda  
Jiboh narit dalam surat  
Bak uram mangat bak ujong bisa

Tadeungo he Banta Ali  
Keu lon tabri putroe muda  
Gata ngon kamoe jeuet keu sahbat  
Beutroh hajat lon bak gata

Meutatem bri putroe bu zong  
Seulamat nyawong gata han fana  
Meuhan tabri gata teukeunong  
Keulua nyawong tatinggai donya

Han taturi raja Samilon  
Keunoe meuhimpon sireutoh raja  
Sireutoh raja dalam nanggroe  
Bak ulon sidroe tundok keupala

Bek ngon saket tabri ngon mangat  
Bek jeuet keusumat lon ngon gata  
Abeh narit tamat surat  
Jiyue intat pantah sigra

Jijak laju hana ploh  
Siat troh bak Banta muda  
Jijok pantah teuma surat  
Neubeuet leugat raja muda

Neueu narit dalam kireman  
Banta intan duka cita  
Ate sosah Banta seudang  
Bak putroe phang neupeuhaba

Wahe judo deungo lon peugah  
Pakri ilah ngon bicara  
Raja Samilon beungeh han soe  
Gata putroe jimeung hila

Seubab gop nyan ateuh nanggroe  
Hajat sampoe ban geupinta  
Ulon sidroe sosah ate  
Pakri pike judo muda

Seuot putroe tanglong kande  
Meunoe pike po meukuta  
Nibak udep bahle mate  
Keuji sabe akhe masa

Bahle mate bak siseun nyoe  
'Aeb neunyoe singoh lusa  
Bek tagundah tuanku droe  
Tuhan sidroe nyang peulara

Deungon beureukat do'a syiah  
Bek tagundah po meukuta  
Lon neumeuniet manok pupoh  
Neuhei taroh sianeuk dua

Ngon beureukat do'a guree  
Han lon malee beuthat raja  
Lon lakee tulong nibak Allah  
Ngon meutuah du lon raja

Kepeue jeuet le ringget lam peutoe  
Meutan tamubloe pat geuthee kaya  
Keupeue jeuet le sakti lam badan  
Meutan tamuprang pat geuthee teuga

Meunan jikheun putroe Meulu  
Ate rindu heundak ngaza  
Banta Ali tundok ulee  
Meunyum malee aneuk raja



Tadeungo he putroe indah  
Deungo lon peugah judo muda  
Tinggai gata lam meuligoe  
Gata putroe bek tangaza

Meuka mate ion di padang  
Kheundak Tuhan judo gata  
Teuma seuot putroe Meulu  
Hom hai teungku ban nyang suka

Abeh narit keumah pakat  
Peugot surat saboh keu raja  
Meunoe narit dalam surat  
Mangatpi that saketpi na

Bek tatham-tham aneuk rimueng bueh  
Le that seun ka lheueh dalam bahya  
Bek talingkeue sane meuganong  
Adat han nyawong abeh areuta

Abeh narit tamat surat  
Geujok leugat bak peurdana  
Na sikeujap teuma dudoe  
Troh jiwoe bak raja raya

'Oh sare lheueh jijok surat  
Raja lihat kalon haba  
Jideungo narit dalam surat  
Raja meugat beungeh raya

Ubak bujang le jipeugah  
Rakyat takrah dum barang na  
Meunan sabda raja meugah  
Rakyat jikrah seugala donya

Na lhee uroe rakyat jikrah  
Jitren pantah ban ie raya  
Geusyik waki uleebalang  
Panglima prang ngon peutua

Tuha muda jitren leugat  
Waki meugat imum muda  
Abeh jitren beusa seudang  
Bentara blang keujruen muda

Abeh bandum rakyat jitren  
Seungoe gampong rame kuta  
'Oh meuhimpon dum meusapat  
Tamong leugat kuta raja

'Oh troh u leuen bale keumang  
Dong meureuntang teupat banja  
Ampon meu'ah syahi alam  
Di yup kidam po meukuta


Kamoe bandum hana troh fam  
Po junjongan peue na sabda  
Toh kuala nyang tan wase  
Kawom siri nyang kreueh jungka

Siri sukee nyang han taklok  
Nyang hana trok bak meukuta  
Sfiri nanggroe neukeumeung prang  
Peue meusugang e sripada

Meunan seumbah meuntroe kali  
Alam syahi neumeusabda  
Meunoe neukheun raja dalam  
Bungong peukan keunoe taba

Bak raja nyang baroe datang  
Jak cok rijang keunoe taba  
Namajih nyan Banta Ali  
Jak tatadi he panglima

Meuhan jibri putroe bungong  
Tatueng nyawongjih bu fana  
Meujih sidroe keunoe datang  
Taantam bek jan jihei ma



Teuma seuot uleebalang  
Ampon tuan kamoe hamba  
Keunoe lon ba putroe bintang  
Troh lon riwang han jan jula

Teuma seuot raja dalam  
Dumteu tuan ampon sigra  
Dumna rakyat beudoh sare  
Peudeueng beude le jihila

Ladom jisok bajee rante  
Bak gaki kawoh teumaga  
Keutupong beusoe ateueh ulee  
Le that sukee tantra raja

Sikin panyang lhat bak keuieng  
Sikin ladieng reugam di lua  
Nyang pahlawan wahe adoe  
Bak jaroe cokma meulila

Reugam leumbeng sandang peudeueng  
Ladom ureueng gulam lila  
Ladom beude mat bak jaroe  
Beureukah droe deungon ija

Sare keumah dum sinaroe  
Seupot uroe teuka seunja  
Teuduek 'oh nan saboh sagoe  
Ureueng nanggroe ka seudia

Mohon tulong ubak Rabbi  
Dan lagi bak teungku tapa  
Ya Ilahi wa ya Rabbi  
Tuhan neubri ban lon pinta

Beu troh hajat ban lon lakee  
Beureukat guree syiah rimba  
Lheueh meulakee Banta indah  
Poteu Allah peutroh pinta

Ngon beureukat do'a syiah  
Kuta luahpi teudong ka  
Teudong kuta tujuh lapeh  
Sama bareh han teukira

Uleebalang han teubileueng  
Sadum naleueng dalam donya  
Bak jaroe cokma ngon peudeueng  
Bangon ureueng tuntutan bila

Meuriam le lila nubat  
Ateuh madat meuato ka  
Ampqn meu'ah wahe po cut  
Peue neuyue buet kamoe dumna

Nyang ka han tom meunoe bagoe  
Bak uroe nyoe peue saleh ka  
Peugah laju syahi alam  
Dum pahlawan that guranta

Kamoe bandum that guransang  
Jikalee prang siri raja  
Teuma seut raja seudang  
Tamuprang ngon raja raya

Raja Samilon nyang gurancang  
Jimeung lawan putroe muda  
Jikeumeung cok tuan putroe  
Judo kamoe po cut gata

Ban jideungo meunan kalam  
Miseue biram jiek bisa  
Insya Allah tuanku droe  
Pajan keunoe troh jiteuka

Tulong Tuhan Poku Rabbi  
Bek mayeuem le po meukuta  
Kukoh jaroe deungon gaki  
Raja 'asi that ceulaka

Meunan narit jen esulam  
'Oh jideungc prang that guranta  
Teuduek siat saboh syahdan  
Meuriwang keu tantra raja

Ureueng gampong lon hareutoe  
Matauroepi ka faja  
Beudoh rakyat dum sibarang  
Pubeudoh prang tantra raja

Ka jiteubiet dum u padang  
Guda samaran nam ploh laksa  
Alam puteh alam hitam  
Le that macam taeu rupa

Tarek alam ngon pupanji  
That beureuhi dum guranta  
Rakyat rame 'oh peunoh blang  
Payong ngon alam le ban rupa

Nyoe baro phon prang meutunang  
Bandua nyan ureueng meunama  
Sinoe geujak sideh geupreh  
Nyoe phon jadeh kon le pura

Surak deumpek that gurantang  
Nyoe baro prang mula-mula  
'Oh sare troh u teungoh blang  
Lemah jipandang kuta raya

Dumna rakyat tahe mandang  
Allah he wang pane kuta  
Ladom ureueng jimeung riwang  
Jak he abang laju gata

Ka beungeh le uleebalang  
Cuba riwang kuyue sula  
Meunyo han jeuet han lon riwang  
Bah simpan nyawong keulua

Jimarit le uleebalang  
Beudoh taprang bek that jula  
'Oh sare troh keunan sampoe  
Sideh sinoepi ase ka

Jitet beude dengon nubat  
Miseue barat baro teuka  
Dumna ureueng muka pucat  
Miseue kulat keunong sira

Bitpi meunan wahe sahbat  
Jimeukarat laju bak kuta  
Keudeh keunoe mate rakyat  
Nyang le that ureueng di lua

Di phon beungoh troh 'an seupot  
Beude jitet miseue taga  
Seupot uroe geumupioh  
Ka teudoh beude ngon lila

Ka geupioh bandua blah  
Ladom patah ladom luka  
Nyang ka mate han ek peugah  
Ile darah lam blang raya

Uleebalang jimupakat  
Musyawarat' ngon peutua  
Pakri lagee pakri laku  
Geutanyoe kuyu bak ri rupa

Teuma seuot sidroe ureueng  
Meunoe jikheun pantah sigra  
Singoh uroe taprang sunggoh  
Tunong baroh lingka kuta

Bak lon sidroe meunan sunggoh  
He dalem beh kri bak gata  
Nyokeu meunan he adoe beh  
Bak lon sunggoh ban kheun gata

Keumah pakat narit abeh  
Teuma geuh bandum rata  
Kuku' manok teuğa mureh  
Jaga abeh tuha muda

Sare keumah dum sibarang  
Pubeudoh prang miseue nyang ka  
Pasoe beude ngon meuriam  
Jiek curam ban keulua

Sideh jihak sinoe geupreh  
Maken leubeh nibak nyang ka  
Sideh sinoe beude jitet  
Asap seupot sang ka seunja

Dumna ureueng sangkot-pawot  
Yo ngon atot pucat muka  
Miseue ujeuen boh beude sret  
That teumakot tantra raja

Bitpi meunan laju jilop  
Tan jisurot jiek lanja  
Jitet beude ngon meuriam  
Lua dalam meugeumpita

Mate rakyat muploh katoe  
Nyang paloe ureueng po banda  
Teutap sinan ureueng lam prang  
Raja dalam lon calitra

Padum uroe sleueng nibak nyan  
Troh le keunan sireutoh raja  
Deungon rakyat uleebalang  
Pahlawan geusyik panglima

Troh le keunan dum meuhimpon  
Bak Samilon raja raya  
'Oh meuhimpon dum meusapat  
Tamong leugat kuta raja

'Oh troh u leuen bale keumang  
Dong meureuntang teupat banja  
Jibet jaroe 'oh meulayang  
Ampon tuan.le jikata

Kamoe bandum hana troh fam  
Po junjongan peue na sabda  
Siri nanggroe neukeumeung prang  
Peugah rijang po meukuta

Teuma seuot alam syahi  
Banta Ali lawan gata  
Lon keumeung cok bintang tujuh  
Jih baro-troh keunoe teuka

Meuhan jibri bungong peukan  
Tasimpan tuboh ngon nyawa  
Meunan napsu lon nyang sunggoh  
Saleh ek troh ban lon pinta

Seuot raja nyang sireutoh  
Kamoe peutroh po meukuta  
Kamoe peutroh hajat doli  
Meuseuki nyawong keulua

Meunan jikheun seukalian  
Raja dalam ate suka  
Sinan ploh bak malam nyan  
Ban lakuan adat raja

Jibri teupat nyang that indah  
Ate dasyah dum peutua  
Ngon makanan rasa mangat  
Bagoek nekat dalam donya

Dumna rakyat ate mangat  
Le that nekat nibak raja  
Beungoh uroe cuaca trang  
Beudoh rijang dum barangna



Jipeuase dum seukalian  
Peukakalt prang beude lila  
Cukop ase dum sinaroe  
Miseue bunoe dilee nyang ka

Lakee idin bak sulotan  
Ek cong kandran ateueh guda  
Beudoh rakyat ngon pahlawan  
Uleebalang ngon peutua

Keudeh laju teubiet u blang  
That guransang tantra raja  
Miseue reudok jipeuek hitam  
Meunan angkatan sireutoh raja

Nyoe baro phon prang meuhayak  
Geulumbang meutak musem keunong sa  
Surak deumpek that meuhubo  
Kram-krum tambo ngon nukara

Kram-krum beude ngon jisurak  
Jitimbak bak kuta raja  
Jiek laju that guransang  
Beungehji ban rimueng bangsa

Ngon pahlawan muploh katoe  
Cokma beusoe dumji rata  
Jitet beude leu 'am-leu'um  
Meukrum-krum han putoh taga

Raja sireutoh ka u padang  
Masa nyan prang that guranta  
Deumpek surak that gurantang  
Dum pahlawan that guranta

Meuhubo-hubo meuhayak-hayak  
Bumoe meugrak-grak na nyum meugisa  
Jitet beude ban beureutah  
Jibareh bak kuta raja

Sideh sinoe jitet beude  
Rakyat mate muploh laksa  
Banta Ali nyum meukarat  
Le that rakyat laju teuka

Neuteupok jaroe ubak gaki  
Jiteubiet le pahlawan dua  
Diwa Peurkasa Ansyah Pari  
Banduaji that guranta

Ampon meu'ah wahe po cut  
Peue ueuyue buet kamoe dua  
Tadeungo he panglima prang  
Ka troh lawan keunoe teuka

Le that rakyat keunoe datang  
Keunoe jiprang tantra raja  
'Oh jideungo meunan kalam  
Jen eseulam that guranta

Lakee idin bak su'otan  
Teubiet u blang dum lasyeuka  
Nyoe baro phon prang meukaleh  
Nyoe 'a jadeh kon le seunda

Keudeh keunoe prang meukalot  
Miseue jimeulet leuek bangguna  
Rakyat mate seun sireutoh  
Ma teungku beh le that fana

Le that mate ureueng nanggroe  
Abeh phang-phoe tantra raja  
Meuhubo-hubo di teungoh mideuen  
Jimeukap limpeuen ngon peusan rimba

Jibeudoh dhoi abee teureubang  
Uroe teungoh trang hanle cahya  
Uroe malam prang meuhayak  
Jimeulet jalak ngon bireng raja

Pahlawan le rancak-rancak  
Miseue meurak meu'en di rimba  
Keudeh keunoe jimeutop tak  
Mate rusak muploh laksa

Raja sireutoh meunyum undi  
Biek jen pari that guranta  
Ka jicinta saboh saktian  
Di teungoh padang ka jeuet ie raya

Laot meualon riyueuk meugule  
Abeh mate sukee jen rimba  
Nyang na tinggai pahlawan meugah  
An Pari syah Diwa Peurkasa

Ansyah Pari cinta hekeumat  
Le that rakyat nyang ka fana  
Troh u darat riyueuk phang-phoe  
Hekeumat nyoe sireutoh raja

Pahlawan dua jiteupok jaroe  
Laot ka doe ngon siklep mata  
Udep ngon rakyat nyang kamupaloe  
Laot nyan ka doe ka miseue nyang ka

Dua pahlawan ate ka rusak  
Jipeulheueh he nyak saboh saktinya  
Ansyah Pari cinta hekeumat  
Troh le sahbat inong geureuda

Siblah nanggroe raya han that  
Jipeugleh rakyat uleh geureuda  
Raja sireutoh saket ate  
Abeh mate dum lasyeuka

Raja sireutoh jibeuet hekeumat  
Troh le sahbat raj' naga  
Troh le keunan siat sampoe  
Jimeukiloe deungon geureuda

Hana saho taeu tiwah  
Bandua blah ureueng meunama  
Phon di nanggroë troh lam awan  
Uroe ngon buleuen hana le cahya

Abeh hanco batee ngon kareueng  
Kayee lam uteuen jeuet keu sira  
Jibeudoh abee miseue ujeuen  
Meunan geukheun dalam calitra

Tan deungon na hana lon tuban  
Meulaenkan Tuhan Allah Ta'ala  
Nyang di rakyatpi tan pioh  
Maken sunggoh nibak nyang ka

Raja samilon ka u padang  
Jideungo prang that meugeumpa  
Deungon rakyat ireng sajan  
Ngon pahlawan troh meulaksa

Raja sireutoh teungoh muprang  
That guransang dalam tantra  
Tantra raja ka meunyum gli  
Ansyah Pari that guranta

Abeh rakyat dum jitadi  
Biet jen pari gagah raya  
Raja sireutoh ka meusurot  
Jitakot keu pahlawan dua

Raja Samilon beungeh han ban  
Dua pahlawan that guranta  
Jiek bisa miseue biram  
Jimasok prang raia raya

Raja sireutoh ireng sajan  
Ngon pahlawan dum lasyeuka  
Jipeh tambo deungon geundrang  
Tarek gambang ngon biula

Peh ceuracap ngon napiri  
Keudangdi hareudanunama  
Rakyat rame muploh katoe  
Raja nanggroe prang jingaza

Tarek alam ngon pupanji  
Jipeunari alam raja  
Sinoe jiek sideh geujak  
Deumpek surak meutaga-taga

Raja sireutoh that guransang  
Seubab masok prang raja raya  
Miseue reudok jiek hitam  
Meunan ragam Samilon 'ala

Masa nyan prang that seureuloe  
Raja nanggroe that guranta  
Masa nyang prang hana reunggang  
Jimeukap biram ngon cuala

Pahlawan dua that seureuloe  
Le that jieumpoe tantra raja  
Le that rakyat ka mupaloe  
Jiseudoe ban siseun lingkka

Deungon rakyat dum sinaroe  
Jikap gigoe jipet mata  
Tantra raja meunyum tiwah  
An Pari syah that peurkasa

Raja kalon han got laku  
Jibeuet laju hekeumat donya  
Pahlawan dua ka jeuet keu batee  
Rakyat meuribee ka binasa

Nyankeu sakti raja dalam  
Keu batee hitam rakyat meulaksa  
Na sikeujap uroepi malam  
Raja dalam ka jigisa

Troh bak teumpat peurheuntian  
Pioh rakan dum barangna  
Jipreh beungoh uroe mureh  
Jiprang keudeh kuta raya

Jinoe muwoe haba keudeh  
Bek le reunteh hana gura  
Banta Ali neukheun nyoe ban  
Pahlawan hana jigisa

Abeh jeuet keu batee hitam  
Pakri padan putroe muda  
Ulon sidroe sosah ate  
Meuka tan le pahlawan dua

Meuka tan le panglima prang  
Soe lom lawan tantra raja  
Seuot putroe bungong peukan  
Tulong Tuhan po meukuta

Meunan jikheun putroe Meulu  
Ate rindu heundak ngaza  
Sok bajee kot ngon kupiah  
Hana ubah ureueng agam

Kuku' manok saboh-saboh  
Putroe jroh teubiet u lua  
Dua sajan raja meugat  
Jieu rakyat ka binasa

'Oh troh keunan adoe teungku  
Putroe Meulu do'a jibaca  
Ka jicinta saboh hekeumat  
Puleh rakyat nyang ka binasa

Abeh puleh seukalian  
Pahlawan deungon lasyeuka  
Na sikeujap teuma dudoe  
Beungoh uroe teubiet faja

Tantra rajapi ka ase  
Salawale miseue nyang ka  
Troh le keunan siat sampoe  
Dum sinaroe that guranta

Miseue baroe prang meuhayak  
Mate rusak miseue nyang ka  
Raja sireutoh raja Samilon  
Keunan meuhimpon lingka kuta

Putroe Meulu jikheun meunoe  
Dum geutanyoe tamong lam kuta  
Bah meu'oh troh jiek keunoe  
Bahle kamoe nyang theun sangga

Meunan suroh tuan putroe  
Rakyat jiwoe dalam kuta  
Troh le keunan ureueng nanggroe  
Laju jieumpoe pinto kuta

Miseue reudok jikandong ujeuen  
Miseue tupeuen tantra raja  
Putroe Meulu cinta hekeumat  
Jeuet le leugat laot nuraka

Jeuet laot di teungoh padang  
U dalam awan meunyalan-nyala  
Bek antara geutanyoe ensan  
Cicem teureubang lupot bicara

Raja Samilon sinan ka mate  
Riyuek meugule laot nuraka  
Abekh mate waba sampoh  
Raja sireutohpi ka fana

Abekh mate dumna rakyat  
Apui raya that laot nuraka  
Abekh hanco kareueng batee  
Jeuet keu abee bumoe donya

Kakeu mate raja pindoe  
Balah bunoe that juara  
Bahkeu dumnan tamat kalam  
Keu pasai prang ka seunia

Dumna rakyat abeh jiwoe  
Bak teumpang droe dilee nyang ka  
Bahkeu dumnan saboh leua  
Bek that jula wahe rakan



## V. BANTA ALI WOE U NANGGROE YAMAN

Cok malakat sok bak jaroe  
Gadh meuligoe han le kuta  
Amma bakdu ampon deelat  
Laen ayat nyoe lon kheun ban

Wahe rakan aduen adoe  
Aneuk raja woe nyoe lon bayan  
Sare ase dumpeue sudah  
Bungka pantah raja seudang

Neujak laju hana ploh  
Teubiet reuoh basah badan  
Putroe Meulu jikheun meunoe  
Deungo kamoe judo badan

Lon ngui ija deungon bajee  
Miseue lagee ureueng agam  
Bek jituri kamoe putroe  
Dalam nanggroe tabeurjalan

'Oh meuteumee raja meugah  
That bit sosah uroe malam  
Teuma seuot Banta indah  
Han peue salah e putroe phang

Putroe Meulu ate suka  
Jingui ija miseue agam  
Jisok bajee kot ngon kupiah  
Hana ubah ureueng agam

Geubungka le teuma laju  
Troh teungku u banda lapan  
Troh u peukan rame banda  
Raja muda beurheuntian

Neueu geudong baro baro  
Meuneukat le han sapeue tan

Nan jitur<sup>i</sup> raja ngon putroe  
Bandua droe miseue agam

Beudoh sinan lom geubungka  
Raja muda putroe seudang  
Geujak laju dalam nanggroe  
Dum sinaroe ate deundam

Dumna ureueng ate suka  
Aneuk dara nyang that girang  
Ngui pakaian laju-laju  
Jiplueng teungku laju u blang

Ladom inong ba ngon aneuk  
Pluerg jak jeungeuk 'oh bineh blang  
'Oh jikalon ate suka  
Ladat mata aneuk jalang

Jimeuhei le jikheun meunoe  
Tawoe keunoe e da rijang  
Aneuk jimoe ka rab mate  
Bek tadong le sinan di blang

Jiseuot le jikheun meunoe  
Beuthat jimoe bahle ceukang  
Beuthat jimoe aneuk paleh  
Kumeung eu jeh muda seudang

Meunan jikheun ureueng nanggroe  
Raja ngon putroe bungka curam  
Bungka laju putroe buleuen  
Troh u mideuen raja pahlawan

'Oh troh keunan raja ngon putroe  
Seupot uroepi ka malam  
Putroe Meulu jikheun meunoe  
Ho geutanyoe judo badan

Kareuna lon ureueng musafe

Karong wali sidroepi tan  
Meunan jikheun putroe Meulu  
Seuot teungku raja seudang

Keunan tajak bak Tok Male  
Na lon turi wahe intan  
Bicara jroh akai sampoe  
Gop nyan sidroe that bijakan

Jibeudoh le putroe tanglong  
Troh u gampong Ni Kubayan  
'Oh sare troh u teungoh leuen  
Meunoe neukheun raja seudang

Putik pisang klat jantung pisang nu  
Soe na di leupu seuot rijang  
Male Kaya seuot meunoe  
Soe di bumoe saleh setan

Bukon setan ulonteu nyoe  
Nyang marit nyoe kawom ensan  
Tok Male-kheun teuma meunoe  
Taek keunoe ureueng datang

Banta Ali neuk laju  
Putroe Meulupi ek sajan  
Troh u rumoh bandua droe  
Mumat jaroe teuma rijang

'Oh sare lheueh mumat jaroe  
Pioh putroe deungon raja  
Tok Male jok ranup lam puan  
Marit nyoe ban ureueng tuha

Nyoe na bak lon ranup layee  
Jeuh peureudee ureueng meukat ba  
Pajoh aneuk ranup tabeue  
Seuleupong pageue tawo bak buga

Pajoh aneuk ranup lam umpang  
Kamoe bujang han soe kira  
Meunan neukheun Tok amel nyoe  
Seuot meunoe putroe muda.

Seuot putroe jikheun meunoe  
Bak kamoe ateueh jeumala  
Tabeue ranup bakong pumasen  
Nyang leubeh lon syen ma keu gata

Layee ranup rijang meugantoe  
Tan gata sidroe pat lon jak mita  
Meunan jikheun bungong uroe  
Ek u meuligoe Male Kaya

Troh u rumoh ma teungku droe  
Umpang u jaroe le neuhila  
Neutaguen bu rijang-rijang  
Eungkot reundangpi ase ka

Ato cawan dalam idang  
Beuet rijang malam ka jula  
Lheueh neupeuduek neubet jaroe  
Ase kamoe bijeh mata

Bak keutumbi timoh di buket  
Bak sialet siraja meugoe  
Ase kamoe nyak peungabet  
Peusinget geupet pubasah jaroe

Eungkot di laot jiwet-wet iku  
Si nyak pajoh bu deungon sira  
Rimba gunong padok han deuh  
Meutamah kreueh bulee mata

Kamoe nyang bri that beurani  
Phet di gaki miseue rusa  
Banta Ali seuot meunoe  
Nibak kamoe dum srikaya

Abeh lon jak jeuep-jeuep nanggroe  
Han tom meunoe lon eu rupa  
Neutop ngon sahab meuseunujoe  
Adat tabloe le hareuga

Goh lon pajoh rasa ka troe  
Sijtek asoe ladat mata  
Abeh narit bandua blah  
Makeuen pantah putroe ngon raja

'Oh lheueh makeuen raja ngon putroe  
Pinah dudoe idang raya  
'Oh sare lheueh pinah hidang  
Po Ni tatang ngon ceurana

Pajoh ranup baro bicah  
Marit sipatah Male kaya  
Patbu gampong he aneuk droe  
Hobu nanggroe heundak bungka

Cuba peugah e samlakoe  
Bandua droe ho tabungka  
Banta Ali seuot meunoe  
Hajat kamoe jak bak raja

Tadeungo lon wahe intan  
Bak sulotan bek tajak gata  
Meunyo tajak bak sulotan  
Nyawong lam badan ka keulua

Aneuk raja seuot nyoe ban  
Peue salaham kamoe dua  
Deungo lon peugah aneuk badan  
Raja Pahlawan that ceulaka

Le that jipoh dumna ureueng  
Raja bajeueng that angkara  
Lawet keurajeuen raja pindoe  
Ureueng nanggroe sosah raja

Raja Yaman buta tuloe  
Namiét geubloe geuboh keu raja  
Pakon he ma nyang jeuet meunoe  
Ubak kamoe ma peuhaba

Male Kaya seuot pantah  
Deungo lon peugah bijeh mata  
Aneuk raja jimeulumpoe  
Na saboh putroe dalam rimba

Nibak gajah tujuh ulee  
Bak peureudee rambong raya  
Lheueh nibak nyan teuma dudoe  
Seutot lumpoe aneuk raja

Ngon pahlawan neuba sidroe  
Ureueng nanggroé sidroe hana  
Jinoe ka jiwoe Pahlawan di gle  
Jikheun mate aneuk raja

Abéh dumpeue jihareutoe  
Geupulang nanggroé uleh raja  
Nyankeu haba nyang lon peugah  
Aneuk meutuah bijeh mata

Wahé aneuk nyak meutuah  
Lon that sosah hana tara  
Deungo lon peugah aneuk badan  
Raja Pahlawan jinoe keurija

Kamoe bandum abéh geukheun  
Ube-be tayeuen geuyue péh gaca  
Gata aneuk bek le tajak  
Peue nyang galak ulon peuna

Lon niet aneuk dalam jasad  
Lon niet ubat raja peunawa  
Male kaya meunan kalam  
Seuot nyoe ban Banta muda

Wahe po ma bungong meulu  
Ban nyang napsu lon seureuta  
Meunyo meunan intan bungong  
Na peue lon tanyong bijeh mata

Gata aneuk jeuoh tajak  
Pat taeu bak peureudee gaca  
Seuot Banta teuma dudoe  
Nibak kamoe po ma raja

Cit lon peugah uroe dudoe  
Troh bak uroe meukeurija  
Teutap sinan Banta indah  
Muwoe kisah ubak raja

Padum lawet teuma dudoe  
Raja nanggroe mubicara  
Abeh neukrah dumna rakyat  
Timu barat seugala donya

Abeh jitren dum sibirang  
Uleebalang ngon peutua  
Deungon rakyat bandum sajan  
Jitren curam ban ie raya

'Oh meuhimpon dum meusapat  
Tamong leugat lam kuta raja  
'Oh troh u leuen bale keumang  
Dong meureuntang teupat banja

Jibet jaroe 'oh meulayang  
Ampon teelan le jikata  
Baro siseun jibet jaroe  
Marit dudoe poteu raja

Raja Yaman neukheun meunoe  
Deungo kamoe tuha muda  
Lon krah gata dum lam nanggroe  
Hajat kamoe meukeurija

Raja ngon putroe lon peunikah  
Cuba peugah dumna gata  
Uleebalang seuot dudoe  
Tuanku droe kri nyang suka

Dumna kamoe han peue daleh  
Pajan jadeh meukeurija  
Teuma seuot raja dalam  
Buleuen Muharram dua ploh dua

Tapeuase dumna alat  
Bek meudap-dap 'oh keurija  
Meunan neukheun raja dalam  
Uleebalang dum seureuta

Padum lawet teuma dudoe  
Dum sinaroepi ase ka  
Geutet beude ngon meuriam  
Ban atoran dilee nyang ka

Jitren rakyat meusong-abong  
Seungue gampong rame kuta  
Jipeh tambo yup seurune  
Rakyat rame dalam lua

Peurasan le han ek peugah  
Nyoe lon kisah Male Kaya  
Teutap neuduek bak rumoh droe  
Malam uroe sosah raya

Seubab ka troh janji sampoe  
Raja nanggroe meukeurija  
Male sosah hana bagoe  
Neukheun meunoe ubak Banta

Wahe aneuk bungong pade  
Lon geupangge uleh raja  
Han jeuet tinggai gaca ube tayeuen  
Meunan neukheun uleh raja



Wahe aneuk bungong meurak  
Tapeugah bak peureudee gaca  
Meuna gasehteu keu kamoe  
Di sinoe tabalah guna

Adat tabri meuh meukatoe  
Ban lon sidroe tan mulia  
Male Kaya meunan hareutoe  
Seuot meunoe Banta muda

Insya Allah ma teungku droe  
Nibak kamoe peureudee gaca  
Neujak he ma dalam jurong  
On keurundong meujak mita

Aneuk raja meunan kalam  
Ate girang Male Kaya  
Lheueh nibak nyan teuma dudoe  
Beungoh uroe teubiet faja

Tok Male jak dalam jurong  
On keurundong neujak mita  
'Oh neupuwoe troh u gampong  
Dalam leusong neutop lanja

Sare ase dum sibirang  
Geuba rijang ubak raja  
Ureueng laenpi ka sampoe  
Tok Male nyoepi ka teuka

'Oh abeh troh dum sibirang  
Na bube blang tamon gaca  
Raja Pahlawan mangat ate  
Tok Male nyang intat gaca

Teuma dudoe lheueh nibak nyan  
Tok Male nyan ka neugisa  
Neujak laju cula-caloe  
Ka troh sampoe u rumoh tangga

Male Kaya teuduek siat  
Lon sambat keudeh bak raja  
Geutet beude ngon meuriam  
Geumpa alam ngon ramtaga

Tam-tum tambo kram-krum geundrang  
Raja Pahlawan geuboh gaca  
Ka geupeueh ateuh kaso  
Teuku linto ka teurhanta

Ka ipeurab dum sinaroe  
Ureueng nanggroe tuha muda  
Ladom ureueng sang teumakot  
Teukeujot teugrop u lua

Jieu badan miseue hantu  
Ngon mata hu miseue sua  
'Oh jikalon sang peunyakit  
Lom ngon kulet hitam sukla

Jieu mata teubleut teup<sup>~t</sup>  
Teubiet ciret ureueng boh gaca  
Seubab jitakot keu raja nanggroe  
Leungo asoe miseue geumpa

Aneuk dara jikheun meunoe  
Peue bala nyoe ya Rabbana  
Jiboh gaca gaki jaroe  
Tujoh uroe baro leungka

Raja Yaman kheun lom meunoe  
Deungo kamoe dumna gata  
Soe nyang utoh bak meuandam  
Cuba kheun ban jinoe sigr

Jiseuot le sidroe ureueng  
Meunoe jikheun ubak raja  
Datok Male nyang that ragoe  
Laen han soe po meukuta

Poteu raja neukheun seutot  
Kajak cok keunoe sigra  
Meunan sabda raja ade  
Jiseutot le Male Kaya

'Oh sare troh bak Tok Male  
Jipeugah le sabda raja  
Wahe po ma deungo lon peugah  
Saleuem seumbah bak sripada

Tuan putroe geuyue andam  
Meunan kalam raja raya  
Nyankeu narit ulon tuan  
Bukon wayang wahe maja

Tok Male neuseuot pantah  
Insya Allah troh lon teuka  
Tapeugah lon troh ulon jak  
Meunan he nyak tapeuhaba

Male Kaya meunan neukheun  
Jiwoe ureueng suroh raja  
Male Kaya marit meunoe  
Deungo kamoe bijeh mata

Wahe aneuk bungong keumbee  
Pakri lagee toh bicara  
Tuan putroe geuyue andam  
Pakri padan nyang seujahtra

Banta Ali seutot meunoe  
Nibak kamoe saboh bicara  
Bak rumoh lon neuyue andam  
Rayek jeumaran putroe rimba

Teuka sidroe syiah uteuen  
Meunan neukheun wahe po ma  
Meuhan jipateh takbi lumpoe  
Saket putroe malam keurija

Meunan he ma neuhareutoe  
Neupeugah proe ubak raja  
Banta Ali meunan titah  
Seuot pantah Male Kaya

Wahe aneuk bungong pade  
Kadang han geubri putroe muda  
Wahe ma po bek neugundah  
Poteu Allah peutroh pinta

Teuduek 'oh noe haba takwi  
Neupeureugi Male Kaya  
Neujak laju hana ploh  
Hingga troh bak kuta raja

'Oh sare troh u meuligoe  
Marit dudoe Male Kaya  
Ampon meu'ah tuanku droe  
Ka troh kamoe po meukuta

Poteu raja seuot pantah  
Ampon bak Allah sibarang deesya  
Na sikeujap teuma lheueh nyan  
Raja Yaman neumeusabda

Jeuet lon pangge gata keunoe  
Tadeungo jinoe lon peuhaba  
Tuan putroe lon yue andam  
Nyan habaran wahe po ma

Seuot po Ni neukheun meunoe  
Deungo kamoe po meukuta  
Bak rumoh lon geuyue andam  
Rayek jeumaran putroe rimba

Teuka sidroe teungku syiah  
Meunan peuneugah syiah lam rimba  
Meuhan tapateh takbi lumpoe  
Saket putroe malam phon gaca

Male Kaya meunan kalam  
Raja dalam sosah raya  
Geupeugah bak raja dalam  
Deungo lon tuan aneuk raja

Male Kaya jikheun meunoe  
Tuan putroe keudeh jiyue ba  
Bak rumohjih jiyue andam  
Rayek jeumaran putroe rimba

Abeh dumpeue jihareutoe  
Beungeh tuloe raja raya  
Le that lagee aneuk asee  
Keunoe bak kee peugah haba

Bek kadong le jakleh kawoe  
Luroh gigoe 'oh kutampa  
Male Kayapi neupeurab  
Meukhap-khap miseue geumpa

Neuwoe laju le neukarat  
Teumakot that ureueng tuha  
Neuwoe laju hana pih  
Hingga troh u rumoh tangga

'Oh sare troh bak rumoh droe  
Neuhareutoe ubak Banta  
Wahe aneuk bungong peukan  
Lon he intan rab binasa

Bek antara jibri putroe  
Ulon sidroe jimeung tampa  
Bek neugundah ma teungku droe  
Tuhan sidroe nyang peulara

Neuduek he ma bak rumoh droe  
Kadang putroe keunoe jiba  
Teutap neuduek bak rumoh droe  
Kisah muwoe ubak raja

Sare ase dum sinaroe  
Tuan putroe geuboh gaca  
Rakyat rame lam meuligoe  
Dum sinaroe ase leungka

Teuduek siat haba putroe  
Lon puwoe keudeh bak Banta  
Banta Ali neumupike  
Ngon Tok Male nyang that kaya

Pakri laku ma teungku droe  
Beu troh putroe keunoe jiba  
Male Kaya seuot meunoe  
Bak kamoë hana bicara

Gadoh akai lon lam ate  
Han lon tukri pubicara  
Teuma seuot putroe Meulu  
Bak lon teungku na bicara

Ngon beureukat do'a wali  
Tulong Rabbi Tuhan Kaya  
Putroe Meulu cinta hekeumat  
Ka jisakat Meureudom Bunga

Saket putroe ingat han le  
Sang ka mate nyaworlg keulua  
Abeh gundah asoe meuligoe  
Saket putroe tanglong donya

Geumeukaoui geumeuhajat  
Han jitem mat jeuep elia  
Tuan putroe saket meularat  
Meutamah that nibak nyang ka

Raja Yaman that mupot-pot  
Neuceumarot hana reuda  
Tok Male kheun han jipateh  
Raja paleh tan bicara

Nyoe nyang ka troh takbi lumpoe  
Saket putroe bungong jeumpa  
Raja Pahlawan jikheun meunoe  
Idin kamoe ban nyang suka

Meuna umu bak malam nyoe  
Singoh uroe bahle taba  
Meunan jikheun raja pindoe  
Puleh putroe tanglong donya

'Oh sare ka beungoh uroe  
Raja nanggroe mubicara  
'Oh meuhimpon dumna rakyat  
Neuyue jak intat putroe muda

Sare keumah dara agam  
Jak intat intan bak Male Kaya  
Jipeh geundrang yup seurune  
Rakyat rame ate suka

Jikhok dap peh geudumbak  
Suka galak tuha muda  
Jijak laju hana ploh  
Hingga troh bak Male Kaya

'Oh sare troh keunan sampoe  
Marit meuntroe ngon peurdana  
Wahe po ma deungo lon peugah  
Saleuem seumbah nibak raja

Putroe muda geuyue andam  
Meunan kalam bak sripada  
Nyankeu narit lon nyang tanggoe  
He po ma droe bukon seunda

Seuot po Ni putik rambot  
Ban nyang patot neupeuhaba  
Wahe aneuk po bungung keumbee  
Ateuh ulee suara gata

Teutapi na bacut salah  
Deungo lon peugah he bentara  
Han jeuet lon andam tuan putroe  
Jak tapuwoe ubak raja

Mata seupot geulunyueng tuloe  
Lom ngon jaroe yo meugeumpa  
Bujang meuntroe seot nyoe ban  
Po ma badan bek meudawa

Wahe po ma bek dawa le  
Upah lon bri meuh sibara  
Meunan jikkeun bujang tandi  
Seot po Ni Male Kaya


Hana hajat lon keu upah  
Peue tapeugah meuh sibara  
Meuh ngon pirak intan pudoe  
Le nibak droe Tuhan karonya

Bitpi meunan aneuk teungku  
Meunoe laku lon seureuta  
Tinggai sinoe putroe bintang  
Keudeh u blang surot gata

Tuha muda dum sibirang  
U yup keutapang meuseunia  
Meuntroe bujang seot pantah  
Insya Allah po ma raja

Jibeudoh le dum sibirang  
Keudeh u blang meuseunia  
Jipeh tambo deungon geundrang  
Gong ngon canang gambang wangsa

Teuduek siat ureueng di blang  
Meuriwang bak Male Kaya  
Marit po Ni bungong uroe  
Neuhei putroe indah rupa





E putroe cut bungong rupa  
Taek keunoe bijeh mata  
Seuot putroe bungong mirah  
Insya Allah wahe po ma

Teuma jiek bungong puteh  
Troh keudeh bak Male Kaya  
'Oh sare troh u seuramoe  
Seumbah Tok nyoe Male Kaya

Teuma neuk u meuligoe  
Sajan putroe bungong jeumpa  
Banta Ali duek meurangko  
Deungon judo Meulu antara

Meureudom Bunga dong beurdiri  
Hireuen lale sikutika  
'Oh jituri Banta Ali  
That beureuhi ate luka

Beuet jaroe santeut bahu  
Ban leuk hijo jilhom kua  
Bladeh toi ureueng geumumpoi  
Blanoé toi ureueng sreng sutra

Na neukeunoe teungku jamaloi  
Lon ikat kaoi jeuep-jeuep eelia  
Ie di laot meugeulumbang  
Meugeuguncang rok-rok masa

Na neukeunoe teungku jeunulang  
Trep that ka tan lon eu rupa  
Ikan di laot asam di rimba  
Keupada Allah beurteumu juga

Meunan jikheun putroe indah  
Seuot pantah Ali Banta  
Sudah datang sikuna Deuli  
Masok beurawang gisa keunudi

Dahulu gaséh seukarang deur  
Aer kuminom sirasa duri  
Seuot putroe cahya intan  
Sura na ban aer nira

Dua blah dayong siguci  
Pulang peureugi sikuna Padang  
Bak deumi Allah tidak kubeunci  
Jangan dipateh fitnah urang

Meunan jikheun uleh putroe  
Seuot dudoe Banta muda  
Datang puan datang ceurana  
Datang bidok siri lama

Datang adek datangkan nyawa  
Marilah dudok beursama-sama  
Seuot putroe bungong mirah  
Insya Allah po meukuta

Putroe peurab teuma ijang  
Seumbah tuan Ali Banta  
'Oh meulayang jibet jaroe  
Ampon kamoe po meukuta

Banta seuot sigra pantah  
Ampon bak Allah barang deesya  
Teutap sinan tuan putroe  
Lon hareutoe Male Kaya

Tok Male kheun teuma nyoe ban  
Deungo he intan lon peuhaba  
Bek trep sinoe tuan putroe  
Geuyue puwoe ubak raja

Meutrep sinoe putroe indah  
Meuhat salah lon bak raja  
Putroe Meulu seuot meunce  
Bahle kamoe jak bak raja

Tinggai sinoe si nyak putroe  
Ulun sidroe jak bak raja  
Meunyo meunan he boh ate  
Bek lale le uroe jula

Putroe Meulu ngui pakaian  
Sileungkapan bajee ija  
Sare ase dum sinaroe  
Jikheun meunoe putroe muda

Lon ka ase ma meutuah  
Beudoh langkah ubak raja  
Po Ni meuhei uleebalang  
Neuyue riwang bandum rata

Abeh riwang dumna rakyat  
Jikasyuk dap 'oh meubura  
Troh le keunan u leuen meuligoe  
Jikiloe dap ngon reubana

Teuma marit Tok Male nyoe  
Tadeungo kamoe he panglima  
Wahe bujang deungon meuntroe  
Cok putroe puwoe bak raja

Jiseuot le sigra pantah  
Insya Allah wahe po ma  
Dumna rakyat ka jiriwang  
Jipeh geundrang meuen gisa

Ka jibeudoh tukang badot  
Taeu jigrop meugisa-gisa  
Lambong batee pru jisambot  
Teubiet geuntot 'oh meubura

Putroe Meulu jiba sajan  
Jiwoe curam ubak raja  
'Oh troh putroe u leuen meuligoe  
Raja nanggroe ate suka

Jieu putroe rakyat tahe  
Bungong kundo jroh that rupa  
Teuma geupeuek u meuligoe  
Teutap putroe lam istana

Jinoe laen lon hareutoe  
Kisah muwoe ubak raja  
Raja Yaman neukheun nyoe ban  
Mupeurasan dum anekan

Meunan sabda nibak doli  
Jitet beude nubat lila  
Jikasyuk dap peh keudangdi  
Mula Bāri culek mata

Jipeh tambo deungon geundrang  
Suleng gambang ngon biula  
Uroe malam hana ploh  
Ban ujeuen toh yoh keunong sa

Jitet beude ban beureuteh  
Jibareh meuriam lila  
Adat teungeut mata peudeh  
Takeumeung eh-han teungeut mata

Peurasan le dumpeue abeh  
Laen wareh lon calitra  
Jinoe muwoe haba keudeh  
Keu cut puteh nyang indah rupa

Peurumoh geusyk duek-duek keudroe  
Peurumoh meuntroe peugah haba  
Nyang pijuet geuyue layu on  
Nyang tumbon bak batee lada

Nyang latah-latah jiseuet aboe  
Nyan lahee jimeuseurapa  
Nyang tuha boh ie lam geupet  
Nyang ciret peurab bak guha

Ladom inong bulenen ka sep  
'Oh nupiret budak keulua  
Bahkeu dumnun apa cut Abet  
That meusaket bak lon kira

'Oh sare'troh syiah faki  
Bri khanduri keu ulama  
Oh lheueh makeuen faki syah  
euet fatihah baca do'a

Kheun usikum 'ibadallah  
Sampoe sudah dum peukara  
'Oh sare lheueh beuet khuteubah  
Geupeunikah putroe ngon raja

Teuma neujok ie dalam glah  
Ngon srah babah poteu raja  
Meureudom Bunga putroe meutuah  
Lon peunikah ngon meukuta

Raja pahlawan seuot pantah  
Lon meunikah ngon putroe muda  
'Oh lheueh ijab kabui nikah  
Geufatihah le ulama

Lheueh nibak nyan teuma dudoe  
Raja nanggroe neumeusabda  
Neulakee mat tuan putroe  
Raja nanggroe ate suka

Di istana bungong panjoe  
Neucok jaroe raja raya  
'Oh ban jimat uleh putroe  
Raja pindoe ka krot muka

Jitanyong le putroe Meulu  
Tuanku pakon krot muka  
Bukon putroe muka kon krot  
Meusambot ngon rupa gata

Raja marit teuma nyoe ban  
judo badan bek meuseunda  
Hana di gop meunan lagee  
Di keue jamee tameuseunda

Inong agam dalam nanggroe  
Tuan putroe jiseurapa  
Di goppi na galak keu lakoe  
Malam phon woe han geumeuseunda

Bft ek jiduek deungon gajah  
Rupa indah keupeue guna  
Raja Pahlawan apoh-apah  
Jaroe siblah dalam singkla

Tan jimarit le sipatah  
Ate sosah dalam dada  
Kong that jimat uleh putroe  
Pula-paloe meulawan raja

Abeh hanco asoe meuligoe  
Ureueng nanggroe le that fana  
Abeh mate teungku syiah  
Abeh bicah leuen istana

Le that mate ureueng nanggroe  
Raja ngon putroe jimeuseunda  
Abeh jiplueng dum teureuban  
'Oh meuguncang kuta raja

Han jan jiplueng rot bak pinto  
Jitajo lam pancang junga  
Rakyat jiplueng ka'a-ka'u  
Barat timu han meuhingga

Ladom jiplueng gadoh ingat  
Sret seumangat sang-sang gila  
Teuduek siat nyang haba nyan  
Muwoe karangan keu aneuk raja

Teubiet faya uroe suboh  
Nyoe lon teuoh Banta muda  
Banta Ali neumupike  
Ngon Tok Male ureueng kaya

Wahe po ma bungong pade  
Pakri pike nyang seujahtra  
Putroe Meulu kadang pakri  
Udep mate han meuhingga

Bahle lon jak ma u dalam  
Bak sulotan raja raya  
Male Kaya seuot nyoe ban  
Hom he intan kri nyang suka

Meunan narit bak Tok Male  
Neubeudoh le Banta muda  
Neucok peudeueng ka neureugam  
Peunulang bak syiah rimba

Neujak laju hana pih  
Hingga troh bak kuta raja  
'Oh sare troh u leuen meuligoe  
Mat bak jaroe gajah meunta

Banta Ali ate rusak  
Laju neutak Pahlawan raja  
Neucang laju deungon peudeueng  
Raja bajeueng mate fana

'Oh lheueh mate raja pindoe  
Ek u meuligoe Banta muda  
Raja Yaman di meuligoe  
Tahe keudroe hana haba

Banta Ali peurab pantah  
Seumbah ayah deungon bunda  
'Oh sare 'lheueh seumbah ayah  
Lakee meu'ah barang deesya

Putroe Meulu beudoh rijang  
Seumbah tuan raja rayana  
poteu raja marit dudoc  
Deungon aneuk droe neubeurkata

Wahe aneuk bungong pade  
Lon kheun han le bijeh mata  
Jikheun mate gajah pajoh  
He aneuk beh jipeuhaba

Tuan putroe jipuwoe sajan  
Habaran meusikrah hana  
Teutap Banta lam meuligoe  
Ngon ayah droe sajan bunda

Hingga meugah jeuep-jeuep nanggroe  
Banta geuwoe dalam rimba  
Ladom jikheun han jipateh  
'Oh troh keudeli jieu ka na

Uroe malam jitren rakyat  
Miseue lalat taeu rupa  
Dalam peunoh mideuen sarat  
Le that rakyat nanggroe raya

'Oh meuhimpon dum meusapat  
Teuma jideelat raja raya  
Ubak raja jihei ampon  
Jiseuon jaroe bandua

Dua lhee seun jibet jaroe  
Raja nanggroe neumeusabda  
Han peue aneuk lon tadeelat  
Tamong leugat dumna gata

Meunan sabda bak sulotan  
Tamong curam rakyat dumna  
'Oh lheueh seumbah teuma geusurot  
Deungon likot na lhee deupa



Raja Yaman neukheun meunoe  
Deungo kamoe tuha muda  
Banta Ali teuyue keurajeuen  
Peutimang mideuen mat neuraca

Nyankeu narit bak lon tuan  
Cuba kheun ban dumna gata  
Uleebalang seut pantah  
Han peue salah po meukuta

Meunan seumbah dumna rakyat  
Jitet nubat beude lila  
Abeh meusu dum meuriam  
Tambo geundrang dap biula

Cukop ase dum lat-batat  
Teuma geudeelat raja muda  
Raja Yaman neumupakat  
Musyawarat ngon peutua

Tadeungo he uleebalang  
Dum sibarang tuha muda  
Deungo lon peugah bak uroe nyoe  
Hajat kamoe sangat raya

Tapeukawen Banta Ali  
Deungon cutti Meureudom Bunga  
Meunan hajat lon nyang tanggoe  
Cuba kheun proe dumna gata

Teuma seut uleebalang  
Wadi bujang ngon haria  
Han peue salah tuanku droe  
Dumna kamoe meuseureuta

Kamoe seun laba rugoe  
Tuanku droe bukon pura  
Meunan narit uleebalang  
Raja dalam ate suka

Raja Yaman lom neumarit  
Maken keubit nibak nyang ka  
Meunyo meunan lon peugah proe  
Durr-sinaroe jak mumita

Tapeuase dum lat-batat  
Bek meudap-dap jan keurija  
Jakle tajak bak Tok Male  
Tapeugah kri dum peukara

Takheun gop nyan bisa kamoe  
Meunan jinoo jak peuhaba  
Peue nyang hana dumpeue lon bri  
Tapeugah kri he bentara

Meunan sabda raja meugah  
Beudoh pantah dum peutua  
'Oh sare troh bak Tok Male  
Jipeugah kri dum peukara

Abeh dumpeue jihareutoe  
Seuot Tok Nyoe Male Kaya  
Bek deungon lon geumubisan  
Hana lawan lon ngon raja

Uleebalang seuot pantah  
Jipeugah bak Male Kaya  
Bek dawa le po ma intan  
Kamoe sajan peungon gata

Meunyo meunan nyan tapeugah  
Insya Allah lon seureuta  
Meunan narit Ni Kubayan  
Uleebalang ate suka

Teuma jiwoe bak sulotan  
Jipeugah ban dilee nyang ka  
Abeh dumpeue jihareutoe  
Raja nanggroe lom sabda

Meunyo meunan tapeugah kri  
Tapeuase dum peukara  
Uleebalang seuot pantah  
Insyā Allah po meukuta

Padum lawet teuma dudoe  
Dum sinaroepi ase ka  
Nibak rajapi ka ase  
Bak Tok Malepi ka leungka

Teuma geutet raja beude  
Lageuem geubri nibak raja  
Bak Tok Male uleebalang  
Sibarang geusyik panglima

Abeh jitren dumna rakyat  
Mideuen sarat han teukira  
Jitret beude sideh sinoe  
Leungo bumoe miseue geumpa

Hana teudoh malum uroe  
Suara bunyoe miseue taga  
Lheueh le beude teungku kali  
Meuriti peuet ploh sibanja

Nyoe baro phon keurija jadeh  
Teuku pakeh lawan raja  
Uleebalang timu barat  
Meusapat bak Male Kaya

Geusie keubeue hana teudoh  
Rakyat kiroh hana reuda  
Ureueng nanggröe tadeungo kiroh  
Meugeureupoh beungoh seunja

Peurasan le han teupeugah  
Le that ulah taeu rupa  
Jipeh tambo deungon geundrang  
Tarek gambang ngon biula

Jitet beude jimubareh  
Jimeutangkeh meuen gisa  
Biek jariah inong tari  
Jinari meupuseng gisa

Bak dada boh dokma bajee  
Di uee tampok ceumara  
Sok kawoh meuh nibak gaki  
Jipeunari kipah meucintra

Meuklep mata meuto-to bibi  
Jisyae keu nanggroe raja  
Di nanggroe Rom beude meutatah  
Nanggroe Makah keudeh geurika

Putroe ngon raja rupa cidah  
Malam nyoe sah jadeh keurja  
Jaroe gaki kaca hitam  
Jilinggang meupuseng gisa

Adat teungeut nata peudeh  
Tameung eh han teungeut mata  
Di ate jiyue jak keudeh  
Ka paleh leupah that gura

Jinoe laen lon atoran  
Raja dalam lofi calitra  
Nibak raja han peue peugah  
That barollah dum'peukara

Lagee sideh meunan sinoe  
Cit ka bunoe lon peuhaba  
Jinoe peungui dara baro  
Pakaian le han teukira

Bak jaroe kaca meuuka  
Nibak gaki gleueng suasa  
Bak dada boh dokma bajee  
Bak ulee pucak ceumara

Pakaian le han peue pike  
Bak Tok Male ureueng kaya  
'Oh lھےuh peungui dara baro  
Jinoe linto lon peuhaba

Cit ka ase dum sinaroe  
Ureueng nanggroe dum seureuta  
Ngon peurasan le that bagoe  
Ladom adoe sipak raga

Jikasyuk dap tarek gambang  
Jipeh geundrang ngon biula  
Dumna ureueng ate girang  
Uroe malam han jikira

Han jipateh lakoeji tham  
Jideungo geundrang meusuara  
Jitet beude wahe teungku  
Meu'u-'u han putoh taga

Adat teungeut mata leubui  
Jibeudoh srui bulee ruma  
'Oh jipeulھےuh bungong apui  
Meurui-rui jiek lam hawa

Bahkeu dumnan wahe teungku  
Han got laku meule cakra  
'Oh meusapat dum sinaroe  
Wadi meuntroe ngon peutua

Hingga seupot le ngon uroe  
Dum sinaroe<sup>pi</sup> ase ka  
Jipeh geundrang kasyam-kasye  
Geuintat linto malam jula

Rakyat rame han peue pike  
Sala wale sleueng saidina  
Troh u mideuē Kaya Male  
Geupioh le rakyat dumna

Ureueng gampongpi ka ase  
Jimarit le pantah sigra  
Na neuteu ka tuän bisan  
Ka lhee malam lon preh gata

Nabu kamoe tuän bisan  
Nyoe 'oh malam troh bak gata  
Lom jimarit ureueng nyang preh  
Maken leubeh nibak nyang ka

Di ateueh cot timoh riwat  
Ateueh jeurat timoh gaca  
Teuku ba linto pioh siat  
Meunan adat reusam keurija

Ie di laot sabe meuguncang  
Bak keutapang binch sungoe  
Neuyue pioh kamoe datang  
Got meuriwang kaman jinoo

Bintang timu cahya muble-ble  
Bak kayee mate umpung unoe  
Meunyo teungku jeuet saket ate  
Bahle ulon bri meu'oh seuramoe

Di pante krueng teupat manoe  
Bak pineueng bangoe di Teupin Kulam  
Hajat gata 'oh seuramoe  
Hajat kamoe ateueh tilam

Mumat jaroe geujok bate  
Abeh syawe seungap haba  
Geupeuk le u meuligoe  
Dum sinaroe jamee teuka

Hana sidroe le bak tanoh  
Dum meuseunoh u rana  
Geujok ranup dalam puan  
Ban atoran dilee nyang ka

Teungku syiahpi ka sampoe  
Cit ka uroe keunan teuka  
Teuma geubet ngon peuluman  
Adat meunan dilee nyang ka

Lheueh nibak nyan teuma lagi  
Syiah faki lakee do'a  
Kheun usikum 'ibadallah  
Sampoe sudah dum peukara

'Oh sare lheueh beuet khuteubah  
Geupeunikah raja muda  
Meureudom Bunga putroe meutuah  
Lon peunikah deungon meukuta

Banta Ali seuo pantah  
Lon meunikah putroe mud  
'Oh lheueh ijab kabui nikan  
Geufatihah le ulama

Rumbh inong cit ka sudah  
Ka geukeubah dum peukara  
Tika keurawang bantai indah  
Ate dasyah taeu rupa

Kasab pirak sukluet hijo  
Bak duek linto putroe muda  
Banta geupeuek u meuligoe  
Teuka sidroe inong tuha

'Oh sare troh keunan sampoe  
Beudoh putroe seumbah raja  
Putroe seumbah raja sambot  
Ban nyang patot reusam donya

Teuma geubet ngon idangan  
Bri makanan rakyat dumna  
Sare keumah geubet jaroe  
Ase kamoe teungku dumna

Hana an lheueh geubet jaroe  
Ka jiseudoe idang raya  
Ladom teungoh jisrah jaroe  
Ladom ka troe ka jiseuba

'Oh lheueh makeuen dumna rakyat  
Lon sambat putroe ngon raja  
'Oh sare lheueh buka idang  
Makeuen sajan sama-sama

'Oh lheueh makeuen raja ngon putroe  
Pinah dudoe idang raya  
Jula malam panyot geupeulen  
Peunganjo tren tinggai raja

Teubiet faja beungoh uroe  
Jaga putroe deungon raja  
Banta neutren di meuligoe  
Leugat neuwoe bak ayahda

Dumna rakyat ireng sajan  
Uleebalang ngon panglima  
Keudeh keunoe neuwoe sabe  
Hukom ade raja muda

Hana saho kureueng leubeh  
Sabe aleh on neuraca  
Padum lawet teuma dudoe  
Raja nanggroe mawot teuka

Kakeu saket raja Yaman  
Kheundak Tuhan Rabbon 'ala  
Wahe aneuk Banta Ali  
Deungo lon kheun kri bijeh mata

Beu tagaseh bandum rakyat  
Sidek sasat nibak gata  
Keupeue jeuet le beude ubat  
Meutan rakyat keupeue guna



Gop peusuna bek tapateh  
Meugoh abeh kira-kira  
Meukon meunan he aneuk droe  
Jeuep-jeuep nanggroe paleh ceulaka

Nyankeu aneuk ka lon peugah  
Bek taubah rugoe mubara  
Banta Ali seuot pantah  
Insya Allah han lon lupa

Lheueh neukheun nyan tan le narit  
Kalimah teehit laju neubaca  
Kakeu mate raja nanggroe  
Ka troh sampoe ajai teuka

Raja mate ateueh kaso  
Putroe bae ro ie mata  
Meureudom Bunga moe meu'u-'u  
Putroe Meulu moe meu'a-'a

Ceureupu Intan moe meurep-rep  
Ate saket putoh asa  
Troh le keunan syiah faki  
Geupeusuci poteu raja

'Oh lheueh suci boh lam gafan  
Lheueh nibak nyan lam keureunda  
Teuma geuba bak lieng lahad  
Rakyat jak intat troh meulaksa

Teuma geulhom dalam uruek  
Ulama duek lakee do'a  
'Oh sare ka lheueh geuseubee  
Woe meuree-ree rakyat dumna

Geusie keubeue seun-seun siploh  
Rakyat kiroh subra donya  
Meunan sabe troh bak peuet ploh  
Lheueh sireutoh sudah leungka

Teuduek 'oh nan raja mate  
Lon rawi bak raja muda  
Teutap keurajeuen Banta indah  
Gantoe ayah mat neuraca

Hukom ade hana lagee  
Bacut han mee nyang meuriba  
Kapai datang geunap uroe  
Raja nanggroe hukom beuna

Ujeuen di gle kayem jitren  
Ureueng gampong bandum kaya  
Raja muda peutimang nanggroe  
Dalam meuligoe Meureudom Bunga

Ureueng nanggroe mangat ate  
Raja ade hana ngon sa  
Teutap keurajeuen muda samlakoe  
Tuhan sidroe bri seujahtra

Padum lawet teuma dudoe  
Jimeulumpoe Meureudom Bunga  
Nakeu umu teungoh malam  
Dua jeuem klam watee seunia

Na nyum ie laot jiek u nanggroe  
Ngop meuligoe istana raja  
'Oh jisurot ie lam nanggroe  
Hanyot meuligoe u kual

Lompi jipot angen bade  
Patah kayee dum cut raya  
Abeh leumah dum sinaroe  
Jaga putroe tanglong donya

'Oh ban jaga bak meulumpoe  
Leungo asoe miscue geumpa  
Ie mata ro meuteutaloe  
Ingat keudroe ka troh masa

Teuma jaga putroe meulu  
Ngon teungku Ali Peurkasa  
Jimarit le putroe Meulu  
Adoe teungku pakon rugha

Cuba peugah wahe adoe  
Pakon tamoe peue kareuna  
Meureudom Bunga teuma peugah  
Asailiah phon bak punca

Phon bak uram troh bak ujong  
Abeh mufom dum peukara  
Deungo jinoe lon hareutoe  
Makna lumpoe lon peunyata

Meunyo ie laot jiek u nanggroe  
Takbi lumpoe teuka bahya  
Jiprang nanggroe uleh kafe  
Akhe-akhe lawet masa

Meuek talo jiprang nanggroe  
Gata adoe sajan jiba  
Nyankeu narit lon nyang tanggoe  
Lahe dudoe taeu nyata

Banta Ali marit dudoe  
Pakri putroe nyang sijastra  
Toh bicara cuba peugah  
Nyang ek leupah nibak bahya

Putroe Meulu seuot rijang  
Kheundak Tuhan barang keurija  
Karonya Po Tuhan Ahad  
Hana kuat tameung sangga

Neubri nekmat beu tasyuko  
Bala nyang le beu tasaba  
Meunan jkheun putroe intan  
Tamat kalam siklep mata

Jinoe laen lon boh ayat  
Bek meusambat han mupakhok  
Lagu Aceh ragam barat  
Mangat han that na dum ie jok

Salah bacut wahe sahbat  
Lon seumurat kalam pureh jok  
Lagi han tom lon seumurat  
Wahe sahbat kureueng pakhok

Bitpi meunan he syeedara  
Tuha muda ate mabok  
Bahkeu dumnann saboh leua  
Meule seunda meuteumee brok

## VI. NANGGROE YAMAN JIPRANG LE CINA

Jinoe laen lon hareutoe  
Deungo adoe cutda rayek  
Amma bakdu jinoe teuma  
Raja Cina nyoe lon rawi

Raja Cina jimeulumpoe  
Bak siuroe karonya Rabbi  
Na nyum jipot bungong jeumpa  
Bakpi raya hana sakri

Lhee seun jiek sret u donya  
Beungeh raya raja 'asi  
Lom jiek kafe mabok  
Troh u pucok raja 'asi

Jiteumee pot bungong jeumpa  
Ate suka hana sakri  
'Oh lheueh jipot bungong keumbee  
Boh bak ulee raja 'asi

Teuma jitren u peureudee  
Raja asee that beureuhi  
Angen tampoe bungong meurak  
Ate rusak raja 'asi

Abeh leumah dum sibarang  
Jaga rijang raja kafe  
Na sikeujap 'oh lheueh jaga  
Teubiet faja beungoh hari

Teuma jihei bujang meugah  
Troh le pantah jipeureugi  
'Oh sare troh keunan sampoe  
Jibet jaroe bujang tandi

Ubak raja jihei ampon  
Jiseuon dua blah jari

Dua lhee seun jibet jaroe  
Marit dudoe raja kafe

Takrah keunoe ahli nujum  
Nyang ka tudum urat bumi  
Meunan sabda raja meugah  
Beudoh pantah bujang tandi

'Oh sare troh bak peundita  
Marit sigra bujang tandi  
Wahe teungku deungo lon peugah  
Saleuem seumbah raja doli

Beu troh jinoe neumeulangkah  
Nyankeu titah wahe saidi  
Lheueh nibak nyan bujang jiwoe  
Troh sampoe bak raja 'asi

Na sikeujap teuma lheueh nyan  
Troh le keunan nujum kali  
'Oh troh keunan beuet jaroe  
Ban laku droe kafe Yahudi

Baro siseun jibet jaroe  
Marit dudoe raja kafe  
Wahe teungku deungo lon peugah  
Lon that sosah hana sakri

Bak simalam lon meulumpoe  
Hareutoe hana lon tukri  
Jinoe teungku neuhareutoe  
Takbi lumpoe cuba kheun kri

Raja Cina peugah lumpoe  
Dum sinaroe jipeugah kri  
Phon bak uram troh bak ujong  
Mangat mufom nujum kali

Meunan sabda raja meugah

Beurkatalah nujum kali  
Pioh dilee ampon deelat  
Lon loꝑ surat wahe doli

Yoh nyan nujum jilop surat  
Jitakat buleuen dan hari  
Jitakat bak bintang raja  
Panca indra banpeuet seugi

Ban sare lheueh jijumeulah  
Jipeugah bak raja neugri  
Lumpoe tuanku that seujahtra  
Bungong jetumpa nyankeu putri

Meureudom Bunga nan geurasi  
Banta Ali judo putroe  
That meusyehu dum seugala be  
Hukom ade hana bagoe

Ban jideungo putroe muda  
Miseue geumpa leungo asoe  
Bu jipajoh han meurasa  
Nyum di mata jieu putroe

Lom jitanyong ubak nujum  
Pakri maklum he teungku droe  
Cuba kalon dalam surat  
Ek troh jahat lon tueng putroe

Nujum kafe jilop surat  
Jitakat daerah nanggroe  
Jitakat bak bintang raja  
Panca indra banpeuet sagoe

Abeh jieu dum lat-batat  
Rame rakyat dalam nanggroe  
Abeh leumah dum sibarang  
Marit rijang nujum pindoe

Deungo lon peugah po meukuta  
Dum peukara lon hareutoe  
Abeh lon eu ka lon lihat  
Rame rakyat dalam nanggroe

Uleebalang ngon peutua  
Gagah raya hana bagoe  
Banta Alipi that gagah  
Meungdum gajah ek jikiloe

Putroe Meulu judo raja  
That peurkasa hana bagoe  
That kuasa putroe muda  
Ka jitapa yoh saboh roe

Paranggasoe han jitaba  
Beuthat raja ek kap beusoe  
Deelat tuanku troh ban hajat  
Mate rakyat muploh katoe

Adat taprang talo kuta  
Tateumee ba meulhee uroe  
Meunan narit nujum sihe  
Raja kafe marit dudoe

Bek taingat mate rakyat  
Meutroh hajat ulon sidroe  
Abeh ingat raja kafe  
Ka jipangge bujang meuntroe

Troh le keunan pantah sigra  
U jeumala seunon jaroe  
U ak raja jihei ampon  
Jiseun dua blah jaroe

'Oh lheueh seumbah meuntroe bujang  
Beurkataan raja nanggroe  
Takrah rakyat dum lasyeuka  
Tuha muda dum lam nanggroe



Phon di timu troh u barat  
Bek lambat jinoo beu sigra  
Bujang tandi jikrah rakyat  
Timu barat jiseuranta

Na sibuleuen meunan sabe  
Ka jitren le dum peutua  
Cina Mako Cina Hilam  
Uleebalang tuha muda

Abeh jitren Cina Jincu  
Dan itu Cina Malaka  
Jitren Cina ujong pasi  
Sipai nyang kawai raja

Abeh jitren uleebalang  
Dum sibarang ngon lasyeuka  
'Oh meuhimpon dalam mideuen  
Tamong u leuen leupu raja

Uleebalang peuek seumbah  
Bak khalifah raja raya  
Ampon tuanku syahi alam  
Di yup kidam po meukuta

Kamoe bandum hana troh fam  
Po junjongan peue na sabda  
Toh kuala nyang tan wase  
Kawom siri nyang kreueh jungka

Siri nanggroe neukeumeung prang  
Peugah rijang po meukuta  
Meunan seumbah uleebalang  
Seuot rijang raja Cina

Lon keumeung prang nanggroe Yaman  
Meugah sinan putroe muda  
Meuek talo kuprang nanggroe  
kutueng putroe Meureudom Bunga

Nyankeu hajat ulon tuan  
Cuba kheun ban dumna gata  
Han peue salah tuanku droe  
Taprang nanggroe putroe muda

Meunan jikheun dumji sare  
Jibeudoh le dum lasyeuka  
Ka jiangkot ubat beude  
Boh meurante aneuk lila

Ka jipeudieng ngon meuriam  
Laen nibak nyan dum peukara  
Peudieng beude deungon ubat  
Kapai sarat ban sineuna

Pioh rakyat dum keulasi  
Nyoe lon rawi raja Cina  
Wahe judo bungong giri  
Idin tabri lon kubungka

Han trep lon dong wahe putroe  
Siploh uroe troh lon gisa  
Lon kubungka jak prang nanggroe  
Gata putroe talakee do'a

Bak sealamat lon jak lon woe  
Kujak tueng putroe Meureudom Bunga  
Meunan jikheun raja nanggroe  
Seuot putroe indah rupa

Nama putroe Cahya keumbang  
Beungehji ban rimueng bangsa  
Meuka tajak bek le tawoe  
Kuduek sidroe lam istana

Kon meung gata ureueng lakoe  
Dalam nanggroe laenpi na  
Raja Cina seuot pantah  
Peue tapeugah judo muda

Tan bahgia gata putroe  
Ulon sidroe taseurapa  
Bek na narit geukoh ulee  
Rimueng pangkee badeuek seuba

Raja Cina jitren leugat  
Hana cakap bak jikira  
Ka jipasang guda peulanggi  
Jipeureugi u kuala

'Oh sare troh raja pindoe  
Dum sinaroe pi ase ka  
Jilhorn sambok ngon beunjalang  
Jiek curam dalam bahtra

Raja Cinapi ek leugat  
Deungon rakyat tuha muda  
Sare abéh jiek rakyat  
Kapai sarat deungon bahtra

Kapai le that han teupeugah  
Bangon ulah uteuen rimba  
Sare ase dum sinaroe,  
Marit jinoe raja raya

Tarek layeue gari saoh  
Bek le pioh uroe ka jula  
Ka jibeudoh dum keulasi  
Jurumudipi ka jaga

Tarek saoh boh hgon layeue  
Angenpi kheue barat daya  
Sira jijak jikrah rakyat  
Jipeusapat jeuep-jeuep donya

Troh le keunan bandum jijak  
Ate galak raja Cina  
Kapai hitam layeue puteh  
Le that wareh raja raya

Sare keumah dumpeue abeh  
Kafe paleh laju bungka  
Kapai jiplueng cula-caloe  
Angen tampoe barat daya

Raja Cina seuu sangat  
Angen mangat jitren pasa  
Na lhee buleuen jicre nanggroe  
Troh sampoe u nanggroe raja

Jilhom saoh jipioh droe  
Beungoh uroe leumah donya  
Raja tanyong ubak nujum  
Nyang ka tudum urat donya

Wahe teungku guree kamoe  
Peue nanggroe nyoe. geuhei nama  
Nujum seuot yoh masa nyan  
Nanggroe Yaman po meukuta

Ban jideungo narit meunan  
Marit yoh nyan raja raya  
Tet meuriam deungon beude  
Lageuem tabri dalam kuta

Jitet beude lada sicupak  
Su meuhayak u nanggroe raja  
Beude lila hana lanti  
Raja Ali hei peurdana

Troh le bujang deungon meuntroe  
Marit dudoe raja muda  
Tren u pasi jinoe laju  
Lon deungo su beude lila

Jibeudoh le bujang tandi  
Ka jiili u kualah  
Ka jidayong ngon siguci  
jiili bak kapai bahtra

'Oh troh uroe teuka seunja  
Bujang tandi peugah haba  
Tadeungo he ureueng datang  
Peue na barang keunoe taba

Meunyo kapai me meuneukat  
Tabri adat wase raja  
Meunyo kapai peurmusohan  
Pioh sinan di kuala

Walee kapai jak teumuntut  
Sinoepi jeuet prang lon ngaza  
Kon kapai nyoe ba meuneukat  
Hana hajat maniaga

Kamoe hajat jak prang nanggroe  
Jak tueng putroe Meureudom Bunga  
Meunan jikheun kafe pindoe  
Bujang meuntroe masam muka

Raja Cina jimupakat  
Musyawarat ngon peutua  
Pakri nyang got wahe rakan  
Cuba kheun ban dumna gata

Uleebalang seuot leugat  
Tabri surat dalam kuta  
jipeugot le saboh kireman  
Di dalam nyan jiboh haba

Meureudom Bunga keunoe kaintat  
Kupreh nyoe pat di kuala  
Meuhana troh keunoe kaintat  
Kuprang meuhat talo kuta

Rakyat kudrop dum kuikat  
Kuboh lam glap tuha muda  
Banta Ali kupoh mate  
Putroe kande kucok kuba

Meunan narit dalam surat  
Tuto jengkat si ceulaka  
Teuma jajok le bak meuntroe  
Leugat jiwoe ubak raja

Jijak laju cula-caloe  
Troh sampoe bak raja muda  
'Oh sare troh ubak deelat  
Jijok surat le peurdana

Raja Ali sambot surat  
Neuploh lipat kalon haba  
Neudeungo narit dalam surat  
Raja meugat beungeh raya


Ubak bujang neukheun leugat  
Takrah rakyat dum barangna  
Tunong baroh timu barat  
Bek le lambat yue tren beu sigra

Meunan sabda raja meugah  
Rakyat jikrah le peurdana  
Siploh uroe deungon malam  
Guda tajam jipoh lawa

Lheueh nyan jitren dumna rakyat  
Waki meugat keujruen muda  
Geusyik waki uleebalang  
Panglima prang imum muda

Deungon rakyat meuntroe kali  
Dan lagi teuku bentara  
'Oh meuhimpon dumna ureueng  
Tamong u leuen leupu raja

Uleebalang peuek seumbah  
Bak khalifah raja muda  
Dua lhee seun jibet jaroe  
Marit dudoe poteu raja



Tadeungo jinoe lon hareutoe  
Dum sinaroe tuha muda  
Ulon sidroe sosah ate  
Jeh pat kafe di kuala

Raja Cina nan geurasi  
Kafe 'asi keunoe teuka  
Jikheun hajat jiprang nanggroe  
Jitueng putroe jipeuhaba

Nyankeu narit bak lon tuan  
Pakri reumbang dumna gata  
Meunan neukheun sulotan Ali  
Bak Kaman Pari uleebalang

Kaman Pari seuot pantah  
Deungo lon peugah po meukuta  
Meugoh puntong gaki jaroe  
Bek tabri putroe keu raja Cina

Tulong Tuhan Poku Rabbi  
Kafe 'asi kuplah muka  
Meunan narit dumji sare  
Jiteubiet le u kuala

Rakyat rame han teupike  
Jipeugot le kuta raya  
Ladom angkot ubat beude  
Boh meurante ngon ramtaga

Tujoh malam deungon uroe  
Dum sinaroe pi ase ka  
Ato lila ateueh madat  
Aneuk ubat dum peukara

Nanggroe Yaman rame rakyat  
Ase siat tujoh kuta  
Tarek alam ngon pupanji  
Kaman Pari nyang peutua

Lheueh nibak nyan teuma akhe  
Jipubeude kapai Cina  
Jitet beude deungon nubat  
Jitakat bak kapai raja

Keunong tihang abeh reule  
Raja kafe beungeh raya  
Ubak rakan jisuroh le  
Pasoe beude nubat lila

Putroe muda tan jiintat  
Jinoe meuhap taprang kuta  
Meunan sabda raja kafe  
jitet beude jeuep-jeuep bahtra

Sideh sinoe beude jitet  
Asap seupot troh lam rimba  
Kapai kafe le that bicah  
That amarah raja Cina

Jiyue teungoh dumna rakyat  
Jiyue pagap bandum kuta  
Meunan sabda raja nanggroe  
Peukeumah droe rakyat dumna

Jilhom sambok ngon kuangkang  
Beunjalang ngon sampan raya  
Ka jiteungoh dum u darat  
Jimeusapat u kuala

Badan raya muka hebat  
Beusoe tungkat ube-be pha  
'Oh takalon sangat 'ajab  
Ngon siat sang talo kuta

Mat bak jaroe galang baci  
Cina Jinci that guranta  
Jiek laju hana sakri  
Jikap bibi jipet mata



Surak deumpek hana lanti  
That beurani kawom Cina  
'Oh sare troh dalam padang  
Ureueng dalampi ase ka

Jitet beude ngon meuriam  
Dalam kawan jipeulila  
Mate kafe han soe tuban  
Allah Tuhan tu'oh kira

'Oh abeh nyan troh le laen  
Maken ceuken nibak nyang ka  
Jiek Cina ujong pasi  
Galang baci dumji rata

Jibareh le ka meuriti  
Cina Jinci that guranta  
Nyang di laotpi tan reunggang  
Jiantam laju bak kuta

Abeh teubet junga pancang  
Jiantam ngon aneuk lila  
Ureueng lam kuta kuyu ate  
Le that kafe laju teuka

Teuma jipeugot saboh surat  
Jiyue intat keu raja muda  
Kamoe tuanku that meukarat  
Prang raya that hana reuda

Kafe le that hana sakri  
Hana lanti prang jingaza  
Abeh narit tamat surat  
Teuma jiintat pantah sigra

'Oh sare troh bak sulotan  
Jijok rijang surat haba  
Raja muda sambot surat  
Neuploh lipat kalon haba

Banta Ali neukheun meunoe  
Idin kamoe putroe muda  
That meukarat ureueng lam prang  
Lon jak eu ban pakri rupa

Teuma seuot tuan putroe  
Idin kamoe po meukuta .  
Lheueh nyan raja neubeurangkat  
Deungon rakyat geusyk panglima

'Oh troh keunan raja dalam  
Neukalon prang that guranta  
That meukarat ureueng lam prang  
Bantu rijang raja muda

Banta Ali neutepok gaki  
Jiteubiet le pahlawan dua  
Jibet le jaroe 'oh manyang  
Bak sulotan raja muda

Ampon meu'ah po cut ampon  
Ho neusuron kamoe dua  
Banta seuot teuma rijang  
Talawan prang kawom Cina

Ban jideungo geupeugah prang  
Miseue biram jiek bisa  
Jiteubiet le dalam mideuen  
Jisuet peudeueng pantah sigra

Jitren rakyat hana peue kheun  
Miseue ujeuen tren u donya  
'Oh troh keunan bak sulotar  
Uleebalang jimeusabda

Ampon meu'ah wahe po cut  
Peue neuyue buet kamoe dumna  
'Ansyah Pari seuot rijang  
Tamuprang ngon raja Cina

Ban jideungo meunan kalam  
That guransang dumji rata  
Mubak kamoe neuyue muprang  
Sang neupulang nanggroe donya

U padang prang jiteubiet le  
Peudeueng beude dumji rata  
Sinoe jipreh sideh jijak  
Deumpek surak ban geureuda

'Oh meuteumee dua oihak  
Prang meuhayak meugeumpita  
Meuhubo-hubo meuhayak-hayak  
Nyum meusigak taeu rupa

Keudeh keunoe mate rusak  
Jimeulot jalak ngon asee tantra  
Sukee Cina that guransang  
Jiek curam ban geulawa

Jiek Cina ujong pasi  
Dan lagi Cina Malaka  
Mat bak jaroe galang baci  
Hana sakri hebat rupa

Pahlawan le hebat-hebat  
Beusoe tungkat ube-be pha  
Tantra raja that meukarat  
Kafe le that laju teuka

Pahlawan dua beudoh laju  
Han got laku jieu rupa  
'Oh sare troh dalam padang  
Jieu lawan ban ie raya

Pahlawan dua jisuet peudeueng  
Jicang ureueng sukee Cina  
Le that mate Cina bajeueng  
Han jan jikheun Allah hai ma

Di phon beungoh troh cot uroe  
Abeh phang-phoe kawom Cina  
Keudeh keunoe meusurot-surot  
Bangon meulet leuek bangguna

'Oh meuteumee sabe pahlawan  
Saleuem haluan le jikata  
Assalam 'alaikom e samlakoe  
Pakon adoe jula teuka

Soebu nama gata adoe  
Cuba kheun proe jinoe sigra  
Meuhat mate bak uroe nyoe  
Nak kutusoe tinggai nama

Ansyah Pari seuot rijang  
Beungehji ban rimueng guha  
Na kadeungo he yahudi  
Ansyah Pari di kee nama

Nama ulon ka taturi  
Di kah yahudi cuba kata  
Tadeungo jinoe lon peugah kri  
Man Parisi di kee nama

Nyang sidroe treuk Man Asyeuki  
Nan geurasi nibak raja  
Kamoe suroh raja nanggroe  
Jak cok putroe po cut gata

Ban jideungo haba meunan  
Amarah yoh nyan pahlawan kuta  
Jisuet peudeueng dalam sarong  
Miseue seudong jiek bisa

Man Parisipi that pantah  
Bandua blah sabe padra  
Keudeh keunoe jimupoh-poh  
Bumoe reuloh jeuet keu paya

Nyang di rakyat sabe rakyat  
Prang raya that nibak nyang ka  
Uroe malam prang meuhayak  
Mate rusak muploh laksa

Kheundak Tuhan Poku Rabbi  
Man Parisi ka binasa  
Bacut silap jibet gaki  
Neutadi ngon cokma raya

'Oh lheueh mate Man Parisi  
Kafe 'asi ka jiguda  
Abeh jiplueng dum sinaroe  
Jipioh droe u kual

Dalam sambok jiek leugat  
Jikarat laju bak raja  
'Oh sare troh bak sulotan  
Uleebalang peugah haba

Deungo lon peugah wahe doli  
Man Parisi ka binasa  
Mate rakyat han teubileueng  
Keunong peudeueng deungon cokma

Adat meudong kamoe tuan  
Dum sibarang tinggai donya  
Meunan seumbah dumji sare  
Raja kafe beungeh raya

Raja Cina jimupakat  
Musyawarat ngon peutua  
Pakri laku nyang ek sampoe  
Cuba kheun proe dumna gata

Uleebalang seuot pantah  
Deungo lon peugah po meukuta  
Meunyo taprang tapeugajah  
Rakyat bicah muploh laksa

Tajak mita ureueng upah  
Pat na meugah ureueng tapa  
Meunan pakat dum sinaroe  
Teuma jiwoe raja Cina

Deungon rakyat dum sinaroe  
Troh sampoe bak sihe tapa  
'Oh troh keunan ubak sihe  
Raja kafe peugah haba

Wahe teungku deungo lon peugah  
Asailiah lon calitra  
Lon ka aeb he pangulee  
Lon ka malee ateueh donya

Ulon jak prang nanggroe Yaman  
Meugah sinan putroe muda  
Lon keumeung tueng putroe ahli  
Nan geurasi Meureudom Bunga

Han ek talo meu'oh pasi  
Raja Ali that peurkasa  
Lon ka 'aeb deungon keuji  
Areatapi abeh dumna

Gaseh sayang he ya akhi  
Upah lon bri meuh sibara  
Laen nibak nyan peue nyang napsu  
Lon bri laju peue nyang hawa

Meunan jikheun raja pindoe  
Seuot dudoe sihe tapa  
Hana hajat meuh meuguci  
Wahe doli han ho lon ba

Neubri nanggroe keu lon siblah  
Nyan keu upah wahe raja  
Raja Cina seuot lagi  
Nyanpi lon bri teungku raja

Marwan Alam ate seuu  
Ka troh napsu ban jipinta  
Na lhee buleuen teuma akhe  
Raja kafe lom jibungka

'Oh neuhimpon dum meusapat  
Bungka leugat raja Cina  
Kapai jiplueng malam uroe  
Troh sampoe ateueh kualala

Lom jimarit raja kafe  
Ubak sihe jipareksa  
Wahe teungku payong alam  
Pakri padan nyang seujahtra

Sihe tapa seuot rijang  
Laju taprang kuta raja  
Meunan narit teungku sihe  
Jiteungoh le rakyat dumna

Kuku manok jimeusapat  
Le that rakyat raja Cina  
Jijak laju hana pioh  
Hingga troh bak kuta raja

Ureueng lam kuta hana jithee  
Keunong tipee sihe tapa  
Beungoh uroe jipubeude  
Kawom kafe le lagoina

Deumpek surak beude jitet  
Teukeujot ureueng lam kuta  
Dumna ureueng muka pucut  
Kafe le that lingka kuta

Dumna rakyat tahe mandang  
Ladom rakan ro ie mata  
Puleh nibak tahe hireuen  
Beude peudeueng le jihila

Jitet beude lua dalam  
Masa nyan prang that guranta  
Jitet beude ngon meuriam  
Dalam kawan jipeulila

Ureung binoe ureung lakoe  
Dum jiboh droe dalam rimba  
Han jeuet sagaipi leumah le  
Jipubeude uleh Cina

Tuha muda plueng 'oh cikok  
Ladom sret syoh ngon ceureupa  
Tinggai ureung peuet reutoh droe  
Nyankeu asoe kuta raja

Sideh sinoe jitet beude  
Le that kafe lingka kuta  
Jiek Cina ujung pasi  
Cina Jinci that guranta

Bak jaroe galang deungon bajoe  
Jieungkoe pacang ngon junga  
Ureung lam kuta kuyu ate  
Le that kafe laju teuka

Raja Ali neutepok gaki  
Jiteubiet le pahlawan dua  
Abeh narit dum sinaroe  
Jilakee droe nibak raja

'Oh lheueh idin bak sulotan  
Panglima prang heundak ngaza  
Jisuet peudeueng pantah han ban  
Jieu lawan le lagoina

Ansyah Pari jikheun nyoe ban  
Beudoh rakan jak udehta  
Taeu rakyat miseue naleueng  
Han sret peudeueng ateueh donya



Diwa Peurkasa meunoe jikheun  
Na umpeuen peudeueng bak ri rupa  
Tulong Tuhan Poku sidroe  
Bah buet kamoe bek roh gata

Jiteubiet le dalam mideuen  
Jicang ureueng kawom Cina  
Wie ngon uneun peudeueng pajoh  
Seun sireutoh waba puta

Kafe mate miseue jeundrang  
Hana lapang bumoe donya  
'Oh jikalon le that mate  
Kawom kafe ka jiguda

Abeh jiplueng dum sinaroe  
Jipioh droe u kualala  
Peuek seumbah uleebalang  
Bak sulotan raja Cina

Ampon tuanku syahi alam  
Kamoe tuan talo ngaza  
Le that mate rakyat simpan  
Dua pahlawan that guranta

Adat meudong kamoe tuan  
Jiantam han jan teuhei ma  
Meunan seumbah uleebalang  
Seuot rijang sihe tapa

Idin kamoe po meukuta  
Lon jak mita putroe elok  
Bah lon jak cok putroe muda  
Po meukuta sinoe dudok

Meuhan ek troh ban nyang pinta  
Han lon gisa nanggroe rayek  
Meunan jikheun sihe tapa  
Jibeudoh lanja praŋg jimasok

Jipet jibleut mata dua  
Troh le raja jen nyang rayek  
Raya panyang na ube gle  
Kulet mise bagoe bak jok

'Oh troh keunan ubak sihe  
Jimarit le raja rayek  
Lon tapangge wahe sahbat  
Peue meularat nyang that rayek

Sihe tapa seuot rijang  
Lon keumeung prang raja rayek  
Meuna gaseh ngon tasayang  
Jinoe taprang keudeh beu trok

Meunan jikheun sihe tapa  
Jen kafe lanja prang jimasok  
Jideumpek le miseue guroh  
Rakyat ka troh 'oh peunoh lhok

Rakyat rame han teupike  
Biek jen kafe bandum kutok  
Jibeudoh le laju jiprang  
Kuta dalam le jicaphok

Ansyah Pari beudoh rijang  
Jieu lawan keunan ka trok  
Jisuet peudeueng pantah leugat  
Jitren rakyat siat ka trok

Sideh jijak sinoe geupreh  
Nyoe phon jadeh sabe antok  
'Oh meuteumee dalam mideuen  
Miseue tupeuen jimeueunsyok

Dua uroe deungon malam  
Hana reunggang prang meukasyok  
Jen kafe ngon jen eseulam  
Jimeuantam that meukeubok

Mate rusak han teupeugah  
Ile darah ban ie rayek  
Prang raya that meugeumpita  
Hana reuda jimeueunsyok

Keudeh keunoe mate rakyat  
Prang raya that nibak baroe  
Rakyat sihe meunyum tiwah  
Ngon Pari Syah gagah han soe

Deungon rakyat biek jen pari  
That beureuhi hana bagoe  
Sihe tapa meunyum malee  
Rakyat meuribee ka jiboh droe

Ka jibeuet eleumee sihe  
Jeuet laot le riyeuek phang-phoe  
Rakyat pari that teumakot  
Ka jisurot dum jiboh droe

'Oh jikalon rakyat han le  
Saket ate raja nanggroe  
Ansyah Pari cinta hekeumat  
Laot samat dum abeh doe

Diwa Peurkasa hekeumat jibeuet  
Di padang ka jeuet gunong beusoe  
Baranggasoe han jeuet jak keunan  
Manyang gunong nyan lam awan sampoe

Sihe tapa jibeuet hekeumat  
Gunong ka ranap dum sinaroe  
Rakyat sihe that guransang  
Jiek curam ban boh gandoe

Keudeh keunoe jimeutop tak  
Mate rusak muploh katoe  
Hana saho kureueng leubeh  
Nyoe phon jadeh wahe adoe

Keudeh keunoe hana undi  
Bandua si gagah han soe  
Kawom Cina ate seuu  
Prang jimaju dum sinaroe

Kawom Cina that beureuhi  
Galang baci mat bak jaroe  
Jiek Cina ujong pasi  
Cina Jinci dum sinaroe

Banta Ali neumasok prang  
Dum sibarang rakyat nanggroe  
Geusyik waki uleebalang  
Panglima prang ngon peutua

Jen kafe lawan jen pari  
Yahudi ngon manusia  
Masa nyan prang that beureuhi  
Bandua si rakyat that bha

Jitet beude ban beureuteh  
Kafe paleh that guranta  
Rakyat mate han teupeugah  
Ladom patah ladom luka

Sihe tapa saket ate  
Jicinta le hekeumat mintra  
Dumna rakyat abeh pangsan  
Jen eseulam ngon manusia

Putroe Meulu beuet hekeumat  
Puleh rakyat keunong mintra  
Meulu antara saket ate  
Jicinta le hekeumat mintra

Tuan putroe peulheueh saktian  
Ka jeuet di padang laot nuraka  
Abeh tutong rakyat sihe  
Jen kafe ngon kawom Cina

Sihe tapa nyang that ragoe  
Jipeujeuet droe keu cempala  
Dalam awan jipo tanggoe  
Sihe pindoe le bicara

'Oh sare troh dalam awan  
Jibacakan eleumee mintra  
Jatoh ujeuen sret u bumoe  
Dalam apui nyoe ka jeuet ie raya

Sihe tapa peulheueh saktian  
Rakyat di padang ka keunong mintra  
Dumna rakyat ka jeuet keu nimbee  
Abèh meuree-ree plueng lam rimba

Putroe Meulu ka jeuet keu nuri  
Raja Ali jeuet keu cempala  
Tan le rakyat dalam nanggroe  
Dum sinaroe ka lam rimba

Kakeu talo Banta Ali  
Keunong taki sihe tapa  
Raja Cinapi troh jijak  
Ate galak hana ngon sa

Troh ban hajat kafe pindoe  
Raja nanggroe ka binasa  
Ka jimarit sihe pindoe  
Jeh pat putroe lon kugisa

Abèh talo gampong nanggroe  
Lon kujak woe po meukuta  
Han jeuet trep le tuanku droe  
Gohlom sampoe masok tapa

Meuhat talo jiprang nanggroe  
Kadang jiwoe raja muda  
Raja Cina jikheun meunoe  
Idin kamoe teungku raja

Sihe tapa ka leupah woe  
Ek u meuligoe raja Cina  
Meureudom Bunga lam meuligoe  
Teungoh poh droe tumbok dada

Sira jimoe bungong kundo  
Jihei judo raja muda  
Wahe judo bantai suson  
Pat tinggai lon po meukuta

Meunan jikheun putroe intan  
Dum dendayang sret ie mata  
Dendayang moe bukon bubarang  
Rasa meuguncang ngon istana

Pakri gata po cut badan  
Jitawan le raja Cina  
Putroe muda teungoh bae  
Troh u pinto raja Cina

Raja Cina tulak pinto  
Putroe tajo jitheun sangga  
Putroe jimat le ngon peudeueng  
Jitak mupeung raja Cina

Putroe jitak deungon peudeueng  
Teulinteueng u yup seulasa  
Raja Cina keubai han soe  
Jiek tanggoe u istana

'Oh sare troh u meuligoe  
Jihei putroe tanglong donya  
Putroe seuot jikheun meunoe  
Peue buet keunoe rimueng seuba

Di gop nyang na laen putroe  
'Oh troh lakoe jijak sapa  
Nyoe di gata hana lagoe  
'Oh troh lakoe taseurapa

Meunan jkheun raja pindoe  
Teupike putroe dalam dada  
Putroe ingat dalam ate  
Akhe-akhe jeuet binasa

Bahle lon kheuen jeuet keu lakoe  
Meuna keunoe peutoe kaca  
Meunyo tuanku meuna napsu  
Kamoe judo po meukuta

Bitpi meunan teungku jamaloi  
Rayek kaoui du mupinta  
Meuka lon tren lam meuligoe  
Lam peutoe ceureumen kaca

Peutoe tuanku bek raya that  
'Oh jeuet sapat taeh dua  
Gunci di dalam aneuk bak kamoe  
Nyankeu jinooe jak tamita

Meunan kaoui ma ngon ayah  
Lon bungka sah nanggroe Cina  
Raja Cina seuot meunoe  
Na bak kamoe peutoe kaca

Meunyan talakee tuan putroe  
Siploh peutoe ek kupeuna  
Raja Cina kheun bak rakan  
Jak cok rijang peutoe kaca

Meunan jikheun raja pindoe  
Bujang jiwoe u kualaa  
Peutoe kaca jicok saboh  
'Oh seudang jroh taeh dua

Teuma jiba kaca peutoe  
Troh sampoe bak raja Cina  
Raja Cina meuhei putroe  
Tatren keunoe taeh dua

Raja tamong le u dalam  
Ate deundam hana ngon sa  
Teuma jikheun uleh putroe  
Kaoi kamoe ka meutuka

Kaoi ayah yoh saboh roe  
Dilee kamoe dudoe gata  
Lheueh nibak nyan wahe adoe  
Jitren putroe jiwéh raja

Teuma jitren tuan putroe  
Dalam peutoe tamong lanja  
'Oh sare troh dalam peutoe  
Gunci u jaroe le jihila

Troh u dalam puteh leusoh  
Teuka le troh raja Cina  
Peuebu laku tuan putroe  
Tinggai kamoe nyoe di lua

Buka peutoe e sambinoe  
Ulonteu nyoe sajan gata  
Peue buet keunoe kafe asee  
Bek sajan kee rimueng seuba

Saket ate aneuk jalang  
Beungehji ban rimueng bangsa  
Jicok galang le u jaroe  
Jikeumeung eumpoe peutoe kaca

Meunyo kaproh peutoeku nyoe  
Mate kamoe lam peutoe kaca  
Jimat sikin le bak jaroe  
Jimeung koh takue pura-pura

Raja kheun le bek he putroe  
Ulon rugoe gata hana  
Raja Cina hei rakan droe  
Tacok peutoe jak tagisa



Jicok peutoe ka jiseuon  
Ka jipeutren u kualala  
Deungon rakyat dum meuron-ron  
Sajan jitren deungon raja

'Oh sare troh keunan sampoe  
Jiek tanggoe dalam bahtra  
Tarek saoh weng keumudoe  
Leugat jiwoe raja Cina

Sira jiwoe mupeurasan  
Kafe jalang ka troh pinta  
Lhee buleuen siploh uroe  
Troh u nanggroe raja Cina

Teuduek 'oh noe saboh leua  
Bek that jula wahe polem  
Meunyo sabe bak ayat sot  
Le hana got wahe cut lem

Ladom galak saboh lagu  
Ladom teungku bak meulaen  
Ragam timu lagu barat  
Mangat han that wahe polem

Soe nyang deungo tuha muda  
Han jikira jak ho laen  
Sepkeu 'oh noe saboh punca  
Deungo cutda jinoe laen

## VII. FALAK ANTARA JAK TUENG BILA

Amma bakdu teuma dudoe  
Haba muwoe keu Banta canden  
Banta Ali Meulu antara  
Keunong mintra jeuet keu cicem

Dumna rakyat jeuet keu himbee  
Wahe sampee ensan ngon jen  
Keunong mintra sihe tapa  
Abeh lam rimba jeuet keu cicem

Sinan pioh dalam uteuen  
Jinoe lon kheun haba laen  
Falak Antara lon riwayat  
Jeuh teumpat nanggroe laen

Nyankeu guree putroe Meulu  
That meusyehuh wahe po lem  
Leumah jieu dalam tapa  
Keunong mintra putroe canden

Weueh that ate dalam dada  
Ro ie mata ka meuleng-leng  
Jiteubiet le dalam tapa  
Jipo lanja miseue cicem

Keudeh keunoe jijak mita  
Jeuep-jeuep rimba lam umpung jen  
Ie mata ro meuteutaloe  
Malam uroe hana tom krenge

Abeh jipo lam linggong gle  
Meuteumee le putroe cicem  
'Oh meuteumee bungong meurak  
Putroe Falak baro teukhem

Banta Ali putroe Meulu  
Rupa laku sang peureuleng

Putroe Falak hekeumat jibeuet  
Jileueng paleuet baca peunuleh

Puleh rakyat nyang keunong mintra  
Falak Antara that bit areh  
Puleh rakyat putroe ngon raja  
Hana le rupa miseue uroe jeh

Putroe Meulu peugah haba  
Deungon cutda bintang peureuseh  
Wahe cutda deungo kamoe  
Di lon sidroe hate peudeh

Abek rakyat keunong mintra  
Adak kon gata han soe peupuleh  
Gaseh keu lon bak meusampe  
Nanggroe kafe taprang keudeh

Taseutot putroe Meureudom Bunga  
Bak raja Cina nanggroe mureh  
'Aeb keuji malee mata  
Wahe cutda beu rayek gaseh

Falak Antara seuot pantah  
Insya Allah e dek puteh  
Tulong Tuhan Rabbon Kade  
Han kuturi kafe paleh

Kon meugata ate rusak  
Lonpi he nyak ate peudeh  
Falak Antara lom jimarit  
Maken keubit wahe mateh

Bahle jinoe tabeurangkat  
Deungon rakyat woe bak abek  
Meunan jikheun Falak Antara  
Hana ngon sa ate peudeh

Beudoh rakyat dum lasyeuka

Tuha muda woe dum abeh  
Geujak laju malam uroe  
Troh u nanggroe dumna . wareh

'Oh sare troh u meuligoe  
Tan le putroe bintang peureuseh  
Dumna rakyat ro ie mata  
Tuha muda ate peudeh

Seubab tan le putroe muda  
Ka kafe ba bungong nireh  
Lheueh nibah nyan teuma dudoe  
Marit putroe Falak Antara

Deungo kamoe adoe badan  
Jinoe taprang nanggroe Cina  
Seubab ate lon that seungkoe  
Beudoh adoe jak tabungka

Bahle tapo rot lam awan  
Mangat rijang troh u nanggroe Cina  
Diwa Peurkasa Ansyah Pari  
Laen lagi dum bek taba

Meunan leumah bak lon sidroe  
Ureueng nanggroe han jeuet taba  
Kareua meularat bak lon pike  
Tapa sihe that ceulaka

Jihpi jinoe lam tapan  
Kafe jalang goh troh tapa  
'Oh troh tapa aneuk bajeueng  
Han ek soe kheun ateueh donya

Nyankeu narit lon nyang tanggoe  
Pakri adoe nibak gata  
Seuot putroe ngon sulotan  
Kri nyang reumbang nibak gata

Nibak kamoe hana troh fam  
Han troh tuban jeuep peukara  
Meunan neukheun Banta Ali  
Dan lagi geusyik panglima

Putroe Falak lom jimarit  
Maken keubit nibak nyang ka  
Meunyo meunan wahe adoe  
Idin kamoe heundak bungka

Raja Ali seuot pantah  
Han peue salah wahe cutda  
'Oh lheueh idin bak sulotan  
Jibeuet rijang hekeumat donya

Timoh bulee dum bak badan  
Rupa na ban siwah raja  
Putroe Meulu Ansyah Pari  
Dan lagi Diwa Peurkasa

Putroe Falak meunan saban  
Jiteureubang dalam hawa  
Jipo laju dalam awan  
Uroe malam hana reuda

Tujoh malam deungon uroe  
Troh sampoe u nanggroe Cina  
Troh u mideuen raja pindoe  
Seupot uroe teuka seunja

Sihe tapa jiduek sapat  
Meulalat hana seureuta  
Uroe malam jitawajoh  
Jitakot troh Ali Banta

Leumah jieu lam tapan  
Ka troh lawan keunoe teuka  
Jibeuet hekeumat sihe pindoe  
Kuta meuligoe ka jeuet keu rimba

Hana leumah le daerah mideuen  
Ka jeuet keu uteuen meuligoë kuta  
Gajah ngon badeuek le di sinan  
Laen nibak nyan rimueng singa

Putroe Falak tahe mandang  
Geutanyoe he rakan ka keunong mintra  
Geutanyoe adoe keunong hekeumat  
Tacuba ingat di dalam dada

Hoka pahlawan Ansyah Pari  
Dan lagi Diwa Peurkasa  
Cuba ingat hekeumat sakti  
Tacuba ci lon eu rupa

Ansyah Pari seuo meunoe  
Bak kamoe hana kuasa  
Buet di kamoe neuyue muprang  
Meutop meucang lam biasa

Meunan jikheun Ansyah Pari  
Seuot po ti Meulu Antara  
Tulong Tuhan Poku Rabbi  
Bah ulon ci wahe cutda

Putroe Meulu cinta hekeumat  
Gunong ka ranap muwoe ban nyang ka  
Leumah kuta meuligoë mideuen  
Han le uteuen ka jeuet keu data

Putroe Falak hekeumat jibeuet  
Di padang ka jeuet saboh kuta  
Geutamong le keunan laju  
Putroe Meulu pahlawan dua

Tuan putroe jimupakat  
Musyawarat ngon panglima  
Bahle jinoe tabri surat  
Narit mangat dilee taba

Kadang jibri ngon talakee  
Keupeue dilee prang tangaza  
Banpeuet gop nyan santeut pakat  
Peugot surat saboh keu raja

Geuboh haba dalam surat  
Di uram mangat bak ujong bisa  
Tadeungo he raja nanggroe  
Tapulang putroe Meureudom Bunga

Bek ngon saket pulang mangat  
Bek keusumat kamoe ngon gata  
Ka lheueh taba dua lhee uroe  
Jinoe lon puwoe bek le bak gata

Kamoe suroh raja Ali  
Baranggakripsi seureuta  
Saket mangat kamoe seunon  
Meuseuki len tuboh ngon nyawa

Meunyo galak takeumeung muprang  
Bahle bek pulang Meureudom Bunga  
Meunyo na tulong sideh bak Tuhan  
Nanggroeteu kuprang gata kusula

Pike bak abeh he raja pindoe  
Bek teulah dudoe 'oh teuka bahya  
Falak Antara nama lon tuan  
Kamoe surohan bak raja muda

Abeh narit tamat surat  
Teuma jiyue intat bak angen bawa  
Na sikeujap ka troh sampoe  
Sret bak jaroe raja Cina

Raja kalon pantah leugat  
Jiploh lipat jikalon haba  
Jideungo narit dalam kireman  
Raja yoh nyan sosah raya

Ka jipangge sidroe wadi  
Nan jirasi Alam Peurkasa  
Rupa hebat han tajeuet pandang  
Jih nyan lam prang that guranta

'Oh troh keunan bak sulotan  
Marit rijang raja Cina  
Tadeungo he panglima prang  
Deungo lon kheun ban ubak gata

Tajak seutot Marwan Alam  
Ka troh lawan keunoe teuka  
Meuhana troh gop nyan geuwoe  
Talo nanggroe putroe jiba

Gop nyan suroh raja Ali  
Nan geurasi Falak Antara  
Nyankeu narit bak lon tuan  
Tapeugah ban he panglima

Meunan suroh raja meugah  
Jijak pantah dalam rimba  
'Oh sare troh bak Marwan  
Jipeugah ban sabda raja

Abeh dumpeue ka jipeugah  
Ban nyang titah raja raya  
Sihe tapa seutot rijang  
Han jeuet tuan lon keulua

Han lon teubiet bak siseun nyoe  
Han got lumpoe lam rahsia  
Adat han mate ajai sampoe  
Meutalo kuteumee rasa

Alam Peurkasa jikheun meunoe  
Han jeuet han tawoe u nanggroe raja  
Talo kuta meuligoe dalam  
Gop nyan surohan Ali Banta



Falak Antara nama urohan  
Geujak cok pulang Meureudom Bunga  
Meunyo meunan wahe rakan  
Bahle tuan lon keulua

Meunan jikheun tapa sihe  
Jiteubiet le dalam tapa  
Jicinta le saboh hekeumat  
Troh le sahbat raja guda

Ka jigiduék le jipasang  
Peurkasa Alam sihe tapa  
Jibeudoh le jiteureubang  
Troh sampoe nyan ubak raja

'Oh sare troh bak Sulotan  
Marit rijang sihe tapa  
Tadeungo he raja dalam  
Lon tapeusan peue na haba

Seuot raja jikheun meunoe  
Pakri jinoe toh bicara  
Ka troh keunoe ureueng landang  
Jilakee pulang Meureudom Bunga

Falak antara nama seubotan  
Gop nyan surohan Ali Banta  
Nyankeu narit nibak ulon  
Pakri mufom teungku raja

Sihe tapa seuot rijang  
Pakri tapulang han malee mata  
'Aeb keuji meuteumee lapang  
Meunyo tapulang keumala donya

'Aeb keuji seugala nanggroe  
Ngon pisang panjoe han geutuka  
Beuthat keulua nyawong lam badan  
Mubek keujian di ateuh donya

Meunan narit Marwan Alam  
Seureuta sajan Alam Peurkasa  
Jibeudoh le jimasok prang  
Uleebalang geusyik panglima

Kawom Cina that guransang  
Peurkasa Alam keu peutua  
Surak meuhubo sukee pahlawan  
Seuakan-akan geutuntut bela

Rakyat rame han teupeugah  
Guda gajah jipoh lawa  
'Oh troh keunan kaom kafe  
Jilingka le kuta raja

Pahlawan le meugah-meugah  
Jimeuharah meujuara  
Meunyo bit adek keumeung theun peudeueng  
Teubiet u mideuen bek le lam kuta

Meunan jikheun kafe pindoe  
Jilakee droe Diwa Peurkasa  
Idin kamoe po cut badan  
Ka troh lawan keunoe teuka

Bahle kamoe teubiet u mideuen  
Lon jak ampeueng jamee teuka  
Deungon tulong Tuhan sidroe  
Kukoh jaroe kuplah muka

Meunan jikheun bandua droe  
Seuot putroe Falak Antara  
Putroe Falak jikheun meunoe  
Idin kamoe he panglima

Jakleh teubiet gata dilee  
Lon eu lagee pakri rupa  
Meunyo mate gata lam prang  
Cit na lon tuan tuntutan bela

Tulong Tuhan bak sealamat  
Bak jeuh laknat beu jarak bahya  
Meunan jikheun putroe intan  
Dua pahlawan teubiet u lua

'Oh sare troh dalam mideuen  
Jisuet peudeueng le bandua  
Troh le rakyat muploh katoe  
Miseue puroe dilee nyang ka

Jimarit le uleebalang  
Bak sulotan raja dua  
Ampon tuanku syahi alam  
Peue sukaran po meukuta

Seuot raja pantah rijang  
Tamuprang ngon kawan Cina  
Meunam narit raja dua droe  
Seuot dudoe dum lasyeuka

Mubak kamoe neuyue muprang  
Miseue neupulang gunong meutia  
Jibeudoh le jimasok prang  
Uleebalang rakyat dumna

Sideh jiek sinoe jijak  
Deumpek-surak that meutaga  
Miseue guroh deungon tupeuen  
Miseue ujeuen teungoh keunong sa

'Oh meuteumee dua pihak  
Prang meuhayak meugeumpita  
Keudeh keunoe jimeutop tak  
Mate rusak muploh laksa

Prang meuhayak malam uroe  
Nyang le paloe ureueng po banda  
Le that mate kafe 'asi  
Biek jen pari that guranta


'Oh jikalon le that mate  
Kawom kafe ka jiguda  
Saket ate sihe pindoe  
Rakyat meukatoe ka jiguda

Jibeudoh le aneuk bisoe  
Ureueng nanggroe dum seureuta  
'Oh sare troh dalam padang  
Lom jimuprang miseue nyang ka

Sihe tapa cinta hekeumat  
Troh le sahbat milon raja  
Sajan rakyat dum sinaroe  
Peunoh nanggroe raja Cina

Rupa hebat raya han soe  
Bak jaroe cokma meulila  
Tujoh raja keunan jitren  
Le that milon teungoh teuka

Miseue ujeuen tren lam awan  
Buleuen bintang han le cahya  
Sarat padang mideuen peunoh  
Meusiteungoh gohлом teuka



Sihe tapa peugah rijang  
Tamuprang ngon ureueng teuka  
Bek tabri troh keunoe datang  
Ureueng landang jak tasangga

Tapoh mate dum sinaroe  
Bek sidroe jiteumeung gisa  
Meunan jikheun tapa sihe  
Jibeudoh le milon mareuga

Beudoh rakyat dum sibarang  
Uleebalang ngon lasyeuka  
Miseue reudok jiek hitam  
Dumnan angkatan milon mareuga

Sideh jijak sinoe geupreh  
Maken leubeh nibak nyang ka  
'Oh meuteumee dua pihak  
Prang meuhayak miseue geumpa

Uroe malam prang meualon  
Le that milon waba puta  
Diwa Peurkasa Ansyah Pari  
Biek jen pari that guranta

Tujoh uroe tujuh malam  
Prang meutunang sabe padra  
Biek jen pari ate kuyu  
Le that bantu milon mareuga

Maken geucang ma teungku e  
Maken that le lom jiteuka  
Mate sidroe meugantoe siploh  
Ma teungku beh le lagoina

Ansyah Pari jikheun nyoe ban  
Ubak rakan dum lasyeuka  
Na tadeungo a wahe rakan  
Jeuet tariwang dalam kuta

Geutanyoe dum that meukarat  
Le that rakyat laju teuka  
Meunan suroh raja nanggroe  
Rakyat jiwoe dalam kuta

Dumna rakyat abeh jiwoe  
Raja nanggroe tinggai di lua  
Ansyah Pari cinta hekeumat  
Di padang ka jeuet laot keunong sa

That teumakot milon piñdoe  
Dum sinaroe ka jiguda  
Raja milon jiteupok jaroe  
Laot ka doe ngon siklep mata

Dumna rakyat ka jiriwang  
That guransang nibak nyang ka  
Jiek laju ban boh gandoe  
Kuta beusoe ka jilingka

That teumakot sukee pari  
Milon 'asi le lagoina  
Falak Antara ate peudeh  
Dumna wareh ka jiguda

Jibeuet hekeumat saboh saktian  
Troh le rijang inong geureuda  
Rayapi that siblah nanggroe  
Jiseudoe milon mareuga

Tuha muda bandum abeh  
Jipeugieh uleh geureuda  
Sihe tapa kalon rijang  
Jicintakan hekeumat mintra

Troh le keunan pantah han soe  
Burong beuragoe nan geuhei geula  
Abeh wasiet sihe pindoe  
Bak beuragoe jibri aja

Teuma jilop lam geulunyueng  
Ka jiplueng inong geureuda  
Timu barat jipo tanggoe  
Beuragoe dalam teulinga

Rakyat sihe that guransang  
Laju jiprang kuta raya  
Troh le keunan dum sinaroe  
Leugat jieumpoe pinto kuta

Putroe Falak saket ate  
Seubab ka mate inong geureuda  
Jibeuet hekeumat saboh saktian  
Teukeudi Tuhan jiteuka geumpa

Nanggroe meuhayak malam uroe  
Rakyat lam nanggroe abeh fana  
Abeh reubah geumpa ngon badan  
Nanggroe meulinggang meugisa-gisa

Sihe tapapi gadoh ingat  
Keunong hekeumat Falak Antara  
Ulee mumang mata peudeh  
Nam uroe eh hana jaga

Falak Antara jikheun meunoe  
Ubak dum nyoe pari rimba  
Jakleh teubiet dum u padang  
Kafe jalang ka keunong mintra

Teubiet laju wahe adoe  
Jak boh taloe sihe tapa  
'Oh sare lheueh tapeutaloe  
Tapuwoe keunoe lam kuta

Abeh wasiet putroe indah  
Beudoh pantah dum lasyeuka  
'Oh sare troh keunan sampoe  
Jiboh taloe sihe tapa

Rakyat laen dum sinaroe  
Ka jieumpoe pari rimba  
Sihe pindoe ka jirante  
Jipuwoe le troh lam kuta

'Oh sare troh keunan sampoe  
Marit putroe Falak Antara  
Kadeungo he sihe pindoe  
Kahkeu sidroe le bicara

Katem jinoe kaeseulam  
Bek simpan tuboh ngon nyawa  
Sihe tapa seuot meunoe  
Nyan bak kamoe pantang raya

Phon lam donya troh 'an page  
Meuseuki mate han kurela  
Meunan jikheun tapa sihe  
Saket ate Falak Antara

Hoka gata Ansyah Pari  
Jak tatadi sihe tapa  
Jideungo narit han got lagee  
Sihe asee baca do'a

Jibeuet hekeumat saboh nyang tajam  
Ka jeuet badan keu cicem pala  
Jipo pantah miseue kumbang  
Jiteureubang han meuho ka

That teumakot aneuk bisoe  
Peusiblah droe bek binasa  
Dalam uteuen jijak som droe  
Raja ngon putroe han le jikira

Teutap sihe dalam uteuen  
Jinoe lon kheun Falak Antara  
Marit putroe Antara Falak  
Peugah ubak raja dua

Tadeungo he uleebalang  
Beudoh taprang kuta raja  
Sihe tapa ka jiboh droe  
Jinoe taeumpoe kuta raya

Meunan jikheun putroe seudang  
Seuot rakan dum lasyeuka  
Insya Allah po cut ampon  
Bak kamoe dum hana dawa

Meunan narit dumji sare  
Jibeudoh le jiprang kuta  
Falak Antara putroe Meulu  
Laen teungku dum barangna



Jiek laju ban boh sungkam  
Kuta dalam ka jilingka  
Surak deumpek 'a-'u kiam  
Lua dalampi ase ka

Jitet beude ngon meuriam  
Nyum ka karam bumoe donya  
Kawom kafe that guransang  
Dalam kawan jipeulila

Jitet beude han le meutum  
Meukrum-krum han putoh taga  
Rakyat mate han soe tuban  
Meulaenkan Tuhan tu'oh kira

Dua uroe deungon malam  
Prang meutunang sabe padra  
Sukee pari that guransang  
Jiek curam ban geulawa

Pahlawan le that seureuloe  
Laju jieumpoe pinto kuta  
That guranta biek jen pari  
Jiungki pacang ngon junga

Beukah pinto tajo u dalam  
Troh le keunan dum lasyeuka  
Geutamong le dum u dalam  
Kafe jalang ka jiguda

Abeh jiplueng kafe pindoe  
Dum sinaroe tuha muda  
Peudeueng beude sinan king-keueng  
Sira jiplueng jigeulawa

Jikira bek keumah nyawong  
Beuthat jitueng putroe muda  
Kawom kafe abeh talo  
Ka meuhambo nanggroe raya

Raja Cina teumakot that  
Han le rakyat ka jiguda  
Jikeumeung plueng han keumah le  
Gundah ate raja Cina

Troh le keunan sukee pari  
Jimeung tadi raja Cina  
Ladom kheun cang ladom kheun tak  
Putroe Falak peugah haba

Pioh dilee wahe rakan  
Bek taantam raja Cina  
Kadang jitem jiseulam  
Bek he rakan tapufana

Falak Antara jikheun nyoe ban  
Bak sulotan raja Cina  
Kadeungo he raja nanggroe  
Katem jinoe masok agama

Gata jinoe taeseulam  
He sulotan bek meudawa  
Bek le taseumbah matauroe  
Bek tapujoe Nabi Musa

Allah Tuhan Muhammad Nabi  
Bek na khali ingat gata  
Nyanku narit bak lon tuan  
Pakri reumbang nibak gata

Meuhan taikot agama kamoe  
Gata jinoe mawot teuka  
Falak Antara meunan jikheun  
Raja mideuen meunoe kata

Insyallah kamoe ikot  
Kamoe turot ban kheun gata  
Meungucap syahdat raja kafe  
Makna lahe dalam dada

Raja Cina teuduek siat  
Lon riwayat Falak Antara  
Jiek pantah u meuligoe  
Sajan putroe Meulu Antara

'Oh sare troh keunan sampoe  
Meuteentaloe ro ie mata  
Meureudom Bunga dalam peutoe  
Lumpok asoe jeuep angeeta

Hana makeuen malam uroe  
Trep that putroe jipusa  
Na dua thon sinan dukhoe  
Malam uroe lapa dahga

Jimarit le putroe Meulu  
Adoe teungku ka troh cutda  
Beudoh adoe tapeureugi  
Bek le lanti jak tabungka

Kamoe suroh nibak sulotan  
Adoe badan jak tueng gata  
Putroe dua meunan jikheun  
Miseue ujeuen ro ie mata

Seuot putroe bungong kipah  
Insya Allah wahe cutda  
Jibeudoh le sigra pantah  
Ka jipeuhah peutoe kaca

Jiseumbah le bandua droe  
Horeumat nyoe peumulia  
Putroe Meuiu ate galak  
Putroe Falak ate suka

Jibeudoh le jibeurangkat  
Deungon rakyat dum lasyeuka  
'Oh sare troh u binéh pasi  
Marit po ti Falak Antara

Pakri jinoe wahe adoe  
Ho rot tawoe geutanyoe dumna  
Han jetet tapo rot lam awan  
Sidroe rakan tan kuasa

Bahle tawoe rot meulaot  
Meunan patot bak lon kira  
Meunan leumah bak lon sidroe  
Pakri adoe nibak gata

Putroe Meulu seuat rijang  
Kri nyang reumbang nibak cutda  
Abeh narit keumah pakat  
Geuek leugat kapai Cina

Kapai Cina sinan le that  
Han teukimat cut ngon raya  
Tarek saoh linggang taloe  
Bungka putroe Falak Antara

Bungka laju uroe malam  
Angen amtam hana reuda  
Jipot angen teuka budueng  
Kapai jiplueng miseue geumpa

Lhee buleuen siploh uroe  
Troh sampoe ateueh kuala  
Geulhom saoh geupioh droe  
Beungoh uroe teubiet faja

Falak Antara jimarit le  
Tatet beude deungon lila  
Meunan adat dilee baroe  
Wahe adoe kapai teuka

Meunan suroh putroe Falak  
Ate galak asoe bahtra  
Jitet beude lila nuhat  
Teukeujot rakyat nanggroe raja

Jitet beude dagang rumpong  
Teukeujot eungkong bue lam rimba  
Jitet beude tupe beuradu  
Meu'u-'u sampoe lam rimba

Jitet beude lila gamboh  
U jeuoh han putoh taga  
Jitet beude geureuda gapi  
Teukeujot le raja muda

Abeh karu dumna rakyat  
Raja meugat hei peurdana  
Troh le keunan jipeureugi  
Raja Ali peugah haba

Tadeungo he bujang meuntroe  
Tatren jinoe u kuala  
Beude lila hana leueung  
Kadang ureueng woe di Cina

Meunyo kapai ba meuneukat  
Lakee adat wase kuala  
Meunan sabda raja meugah  
Ili pantah lem peurdana

Jidayong bhot cula-caloe  
Troh sampoe bak kapai bahtra  
'Oh sare troh keunan sampoe  
Bujang meuntroe le pareksa

Tadeungo he ureueng datang  
Peue na barang keunoe taba  
Meunyo kapai ba meuneukat  
Tabri adat wase raja

Walee kapai ba peurasan  
Tamong u dalam suroh raja  
Meunan jikheun bujang meuntroe  
Seuot putroe Falak Antara

Kon kapai nyoe ba meuneukat  
Hana hajat maniaga  
Tadeungo he meuntroe bujang  
Kamoe ureueng woe di Cina

Tulong Tuhan ka sealamat  
Dengon syafa'at dum Anbia  
Tapeugah bak raja dalam  
Ulon tuan ka troh gisa

Meunan narit ureueng datang  
Jiwoe rijang lem peurdana  
'Oh troh keudeh bak sulotan  
Meuntroe bujang peugah haba

Ampon tuanku syahi alam  
Di yup kidam haram mulia  
Deungo lon peugah nyang mustahak  
Putroe Falak ka troh gisa

Rakyat rame that meubulak  
Lon kalon bak kapai bahtra  
Ban raja deungo Antara Falak  
Ate galak raja muda

Pakri jinoe nyang muslihat  
Tapakat bak jinoe sigra  
Seuot meuntroe tandi bujang  
Bak lon reumbang meunoe kira

Tatet beude ngon meuriam  
Peurasan dum sianeka  
Sajan rakyat beusa seudang  
Peurheuntian di kuala

Seubab gop nyan ahli hekeumat  
Tabri horeumat peumulia  
Meunan leumah bak lon tuan  
Bitpi meunan kri nyang suka

Meunan jikheun bujang meuntroe  
Seuot dudoe raja muda  
Raja Ali seuot yoh nyan  
Got that meunan he peurdana

Sabda raja turon titah  
Rakyat jikrah le peurdana  
Troh le keunan dum meusapat  
Mideuen sarat rakyat that bha

Jibeudoh le dum sibarang  
Jitren rijang u kuala  
'Oh sare troh u bineh pasi  
That beureuhi rakyat dumna

Jitet beude ngon meuriam  
Jipeh geundrang ngon biula  
Jipale gong peh ceuracap  
Jikasyuk dap meuen gisa

Jipeh tambo jiyup suleng  
U geunireng paleng muka  
'Oh takalon meuk takhem  
Pruet beuteng meuklep-klep mata

Ladom rakyat meuen rungeng  
Nyang rajin meuen peundika  
Jitet beude sang beureuteh  
Sinoe sideh miseue geumpa

Nyang di laot sukee pari  
Hana sakri that guranta  
Lhee uroe meunan sabe  
Jiteungoh le u kuala

Dumna rakyat ate deundam  
Inong agam ate suka  
Hana ploh uroe malam  
Hana reunggang siklep mata

Sampoe troh u mideuen dalam  
Peurheuntian Falak Antara  
Bri horeumat muliaan  
Ban atoran dilee nyang ka

Mubri saleuem mumat jaroe  
Lheueh nyan geuwoe dalam kuta  
Ureueng teuka geunap uroe  
Jak eu putroe woe di Cina

Me bu leukat lawan tumpoe  
Ban laku droe reusam donya  
Teutap sinan lam meuligoe  
Raja ngon putroe ate suka

Putroe Falak sinan diam  
Tan le riwang dalam rimba  
Gaseh ate hana macam  
Keu sulotan raja muda

Bahkeu 'oh noe saboh syahdan  
Tamat kalām siklep mata  
Seubab ate lon that sosah  
Kheundak Allah uroe malam

Lon seumurat gohlom cidah  
Nyankeu sosah ulon tuan  
Seubab gop eu seugala nanggroe  
Buet jaroe nibak lon tuan

Uroe malam ie mata ile  
Rabbon Kade bri sampoekan  
Karonya Po Tuhan kaya  
Nyang kuasa seugala alam

Neubri keu lon beu troh pinta  
Tuhan kaya nyang laen tan  
Allah he Po Rabbon Kade  
Bak meusampe lon keumarang



Bahkeu dumnan saboh ato  
Khuteubah le han got ragam  
Amma bakdu teuma dudoe  
Karangan mu woe laen macam

## VII. MEUREUDOM BUNGA WOE BAK ABI BANTA ALI GEUBOH KEU RAJA

Meureudom Bunga lon hareutoe  
U nanggroe jiheundak pulang  
Ingat keu ayah deungon bunda  
Sret ie mata uroe malam

Padum lawet lama masa  
Putroe muda that dukaan  
Falak Antara jikheun meunoe  
Deungo kamoe putroe intan

Dumna kamoe peungon gata  
Seureuta ngon raja dalam  
Bek le gundah ate rugha  
Tuhan kaya nyang po alam

Han jeuet lupa ma ngon ayah  
Dudoe salah nibak Tuhan  
Meunan leumah nibak hamba  
Dumna gata pakri reumbang

Raja Ali seuot meunoe  
Nibak kamoe ate deundam  
Nibak kamoe hana dawa  
Ate suka baranggajan

Meunan neukheun raja nanggroe  
Falak putroe seuot nyoe ban  
Meunyo meunan wahe adoe  
Ho rot tawoe cuba kheun ban

Meunyo tawoe rot lam laot  
Bakat ribot hana reunggang  
Lagi jarak bak kira lon  
Na tujuh thon tabeurjalan

Rot lam awan bahle tawoe  
Troh sampoe deungon seukarang  
Teuma seuot raja nanggroe  
He cutda droe kri nyang reumbang

Falak Antara hekeumat jibeuet  
Sinan le jeuet kuta teureubang  
Cukop ase dum sileungkap  
Tamong rakyat dum sibarang

Geusyik waki dum lasyeuka  
Seureuta ngon raja dalam  
Sare ase dum sileungkap  
Bungka leugat rot lam awan

Padum lawet teuma dudoe  
Troh u nanggroe raja dalam  
Troh u ateueh kuta raja  
Ureueng bungka peurheuntian

Falak Antara jikheun meunoe  
Ubak dum nyoe lasyeuka prang  
Mupeurasan jinoe sigra  
Dumna gata wahe rakan

Tatet beude deungon lila  
Sianeka dum bunyian  
Meunan suroh nibak raja  
Ate suka dum sibarang

Jibeudoh le dumna rakyat  
Jikasyuk dap gong ngon geundrang  
Jipeh tambo ngon napiri  
That beureuhi inong agam

Dumna rakyat that beureuhi  
Jiyup bangsi tarek gambang  
Meunankeu buet hana lanti  
Beudoh nari dum dendayang

Ngon lagam su meusyuhadah  
Jikisah buleuen ngon bintang  
Soe nyang kalon hireuen dasyah  
Di sinan reubah akai hilang

Meunankeu buet hana reuda  
Ateuh guda raja dalam  
'Oh malam ateuh meuligoe  
Jan uroe keudeh lam hawa

Ureueng nanggroe Indra Sarah  
Ate gundah tuha muda  
That teumakot inong agam  
Lam awan jiteuka bahya

Lakee tuiong ubak Tuhan  
Beuet Quran dum ulama  
Ucap syuko faki syiah  
Lakee bak Allah do'a seujahtra

Meunankeu buet malam uroe  
Ureueng nanggroe sosah raya  
Phon dilee kon han tom meunoe  
Bala nyoe teuka lam hawa

Bek antara takaion sah  
Meugeupeugah han sapat na  
Teumakot that inong agam  
Raja dalam sret ie mata

Allah hai Po Ilahon Hak  
Neubri jarak bahya donya  
Beu gadoh bala lam sosahan  
Allah Tuhan nyang kuasa

Tan di kamoe buet lahan  
Meulaenkan nyang suroh gata  
Rukuk sujud dumna rakyat  
Hana ingat le keu donya

Seubab bala raya sangat  
Han le ingat napsu hawa  
'Oh ka uroe siat renggang  
'Oh ka malam keunan teuka

Dumna ureueng ate gundah  
Jihe Allah rijang jula  
Sidroe ureueng pungo alang  
Jikheun nyoe ban ubak raja

Geutanyoe dum pungo nyum sang  
Kadang-kadang bukon bala  
Adat balapi tapaban  
Buet di Tuhan soe meung sangga

Tajak seutot ahli nujum  
Nyang ka tudum urat donya  
Tayue kalon dalam kitab  
Peue alamat keunoe teuka

Han tatu 'oh buet di Tuhan  
Kadang-kadang nekmata beusa  
Santeut pakat ureueng bandum  
Seutot nujum pantah sigra

Troh le keunan bak khalifah  
Marit pantah nujum peundita  
Seuon jaroe bandua blah  
Mohon titah ubak raja

Baro siseun jibet jaroe  
Marit dudoe poteu raja  
Meunoe neukheun raja meugah  
Lon that sosah teungku raja

Cuba neueu dalam surat  
Peue alamat dalam hawa  
'Oh ka uroe gadoh peujam  
Watee malam troh le teuka

Suara beude ngon meuriam  
Peurasan dum sianeka  
Meunan sabda raja nanggroe  
Seuot dudoe syiah ulama

Pioh dilee ampon deelat  
Lon kalon bab pupoh angka  
Teungku nujum neulop surat  
Neutakat peuet panca indra

Kutika limong bintang tujuh  
Neuparoh keureuleng naga  
'Oh sare lheueh neujumeulah  
Beurkatalah nujum peundita

Ampon meu'ah tuanku droe  
Lon hareutoe seun sibanja  
Bukon bala dalam awan  
Kawom ensan raja raya

Aneuk tuanku putroe bintang  
Sudah pulang woe u tangga  
Meureudom Bunga putroe meutuah  
Ka troh langkah po meukuta

Sajan judo raja meugah  
Rakyat barollah sajan seureuta  
Geuheundak woe bak khalifah  
Putroe indah mubahgia

Judo putroe bungong giri  
Raja Ali nan geuhei geula  
Aneuk raja nanggroe Yaman  
Meusyeuhuran jeuep-jeuep donya

Geupoh gajah geucok putroe  
Yoh saboh roe dalam rimba  
Nyankeu narit lon nyang tanggoe  
Tuanku droe bukon pura

Teuma seuot raja nanggroe  
Pakri jinoo nyang seujahtra  
Seuot nujum jikheun meunoe  
Deungo kamoe po meukuta

Lagee sideh meunan sinoe  
Bak geutanyoe tapeumulia  
Meunan narit teungku nujum  
Neubri maklum ubak raja

Raja nanggroe ate deundam  
Neuhei bujang ngon peurdana  
Troh le keunan tandi bujang  
Raja dalam neumeusabda

Takrah rakyat dum sibirang  
Uleebalang ngon peutua  
Meunan sabda raja meugah  
Rakyat jikrah le peurdana

Lheueh nibak nyan teuma akhe  
Ka jitren le tuha muda  
Geusyik waki uleebalang  
Panglima prang dum lasyeuka

'Oh meuhimpon dum sibirang  
Raja dalam peugah haba  
Han jan seumbah uleebalang  
Marit rijang raja raya

Raja nanggroe peugah rijang  
Mupeurasan dumna gata  
Ate rindu lon han bagoe  
Ka troh woe Meureudom Bunga

Meunan sabda raja deelat  
Dumna rakyat ate suka  
Jibeudoh le dum sibirang  
Tambo geundrang ka jihila

Jikasyuk dap jipeh geundrang  
Suleng gambang ngon biula  
Dumna rakyat ate girang  
Han jituban uroe seunja

Peh geudumbak ngon napiri  
Keudangdi hareudammama  
Dumna rakyat that beureuhi  
Ulee-ili agam dara

Jitet beude lila nubat  
Ladom rakyat sipak raga  
Pasang guda peulheueh jaroe  
Ban laku droe maseng pinta

Ladom ureueng mabok keudroe  
Malam uroe han jikira  
Ladat mata ate seuu  
Setan tipu tuha muda

Ureueng binoe nyang that seuu  
Nyang ka lu-lu lam kawan bha  
Han jipateh suroh guree  
Setan tipee agam dara

'Oh jideungo geundrang meusu  
Ate seuu aneuk dara  
Keu lakoe han jan jibri bu  
Ate seuu bak keurija

Teuduek 'oh nan saboh laku  
Laen teungku jinoo haba  
Ureueng di manyangpi tan pioh  
Maken sunggoh nibak nyang ka

Leubeh sideh nibak sinoe  
Hana sunyoe siklep mata  
Biek jen pari sukee diu  
Han peue teungku lon peuhaba



Jipeurupa le that laku  
Kawom diu pari rimba  
Tujoh malam deungon uroe  
Troh sampoe u mideuen raja

Sajan kuta ngon meuligoe  
Sinaroe ngon balatantra  
Ureueng nanggroe Indra Sarah  
Cit ka keumah dum peukara

Dong meuriti banja teupat  
Bri horeumat jamee teuka  
Peurasan le han teupeugah  
Bandua blah raja raja

Bumoe hijo langet mirah  
That barollah tantra raja  
Geusiyik waki uleebalang  
Dong meureuntang rakyat dumna

Teubee meunon u meukarang  
Haluan dum sianeka  
Sabda raja turun titah  
Lakee langkah jamee teuka

Meunan sabda bak deelat syah  
Jimeulangkah bujang peurdana  
Jijak laju bujang meuntroe  
Troh sampoe bak kuta raya

Troh bak kuta nyang analan  
Meuntroe bujang peugah haba  
Ampon meu'ah deelat makam  
Lon peugah ban sabda raja

Kamoe suroh bak deelat syah  
Neuyue langkah teungku dumna  
Poteu raja ate deundam  
Keu tuan nyang baro teuka

Seubab aneukneu ka hilang  
Jitawan le gajah rimba  
Jinoe baro ka meuriwang  
Miseue bintang sret lam hawa

Meuhana troh teungku langkah  
Syah alam meugah keunoe teuka  
Nyankeu narit lon nyang sunggo  
He teungku beh bukon seunda

Ureueng landang seot pantah  
Insya Allah troh meuteuka  
Lah ka neutem neupeusayang  
Kamoe meudagang ureueng hina

Han peue deelat neujak keunoe  
Bahle kamoe keudeh teuka  
Meunan narit ureueng datang  
Jiwoe bujang ngon peurdana

Sare leupah bujang jiwoe  
Marit putroe Falak Antara  
Beudoh rakan aduen adoe  
Peukeumah droe dumteu rata

Bahle jinoe tameulangkah  
Bak ayah Meureudom Bunga  
Meunan jikkeun putroe intan  
Ngui pakaian rakyat dumna

Agam inong seukalian  
Keuaselan dum peukara  
Geubeudoh le geubeurjalan  
Bandum rakan tuha muda

Buka payong mirah puteh  
Ladom wareh pasang guda  
Ladom rakyat jak ngon gaki  
Sukee pari kawom indra

Ladom guda jimeukandran  
Ladom rakan ateueh kaha  
Jitet beude hana reunggang  
Jipéh geundrang dap biula

Peurasan le sideh sinoe  
Bahkeu dumnoe he syeedara  
Ureueng landang geujak laju  
Troh teungku u pinto kuta

'Oh sare troh keunan sampoe  
Keudeh keunoe geuseumapa  
Assalam 'alaikom teungku bandum  
Lon sapa siseun bandum rata

Kureueng meujeulih kamoe duson  
Beu rayek ampon teungku dumna  
Teuma seuot ureueng datang  
'Alaikom salam he teungku raja

Lhok ngon deue hana lon tupat  
Reusam ngon adat lon tukri hana  
Teureutib meujeulih hana lon tukri  
Kamoe mise mate lam rimba

Abeh narit tamat kalam  
Bahkeu dumnán bek that jula  
Mumat jaroe geujok bate  
Geutamong le dalam kuta

'Oh troh uleuen bale gadeng  
Putroe leunteng seumbah raja  
Sajan judo raja Ali  
Seureuta suri sigo bandua

Rakyat laen bandum sajan  
Seumbah juhan raja raya  
Poteu raja ate laloe  
Neucok putroe neucom neuwa

Reubah pangsang le teupipoe  
Banlhee droe ayah ngon bunda  
Meureudom Bungá meunan saban  
Banlhee gop nyan teungeut indra

Geucok sinan teuma dudoe  
Geupuwoe dalam istana  
Na sikeujap teuma dudoe  
Puleh putroe jaga raja

Banlhee gop nyan geumoe riah  
Ban ujeuen toh sret ie mata  
Putroe muda ate dasyah  
Ma ngon ayah ate suka

Han sapeue le jeuet neupeugah  
Neukheun Allah ka roh mawa  
Neukheun aneuk ka roh adoe  
Neukheun putroe ka roh maja

Meunankeu buet ureueng lhee droe  
Ulah bagoe ureueng gila  
Teuduek siat nyang haba nyan  
Bri makanan jamee teuka

Ka geubet le ngon idangan  
Peurjaman rakyat dumna  
Lheueh geupeuduek geubet jaroe  
Ban laku proe dilee nyang ka

Han jan meulheueh geubet jaroe  
Ka geutampoe idang raya  
Ladom baro geusrah jaroe  
Ladom ka troe ka jiseuba

'Oh lheueh makeuen dum sibirang  
Pinah idang pantah sigra  
Lheueh nibak nyan teuma dudoe  
Raja nanggroe neumeusabda

Tadeungo he uleebalang  
Dum sibarang tuha muda  
Di lon han le kumat nanggroe  
Judo putroe taboh keu raja

Nyankeu narit ulon tuan  
Pakri reumbang dumna gata  
Uleebalang seuot meunoe  
Bak kamoe ate that suka

Dumna kamoe han peue salah  
Ban nyang titah po meukuta  
Seutot pakat dum kafilah  
Peuek seumbah bak raja muda

Marit sidroe uleebalang  
That bijakan bak meuhaba  
Tadeungo lon meuntroe intan  
Saleuem tuan raja raja

Ubak kamoe neusurohan  
Neuyue kheun ban bak meukuta  
Sabda raja wahe intan  
Neyue peugang nanggroe raya

Seubab ateneu that deundam  
Akan intan bijeh mata  
Neukeumeung bri meuh ngon pirak  
Tan meusigak bak neukira

Nyang peue laen han ek neubri  
Raja faki tan areuta  
Meunan narit meuntroe kali  
Raja Ali seuot sigra

Insy Allah teungku ampon  
Lon seuon ateh jeumala  
Saboh bak teungku siploh bak lon  
Rasa lon seuon buket meutia

Nyang ka neubri ka lon teurimong  
Lon miseue bungong sirungke dua  
Bitpi meunan he teungku ampon  
Na nibak lon sipatah haba

Han jeuet keurajeuen dalam nanggroe nyoe  
Kareuna kamoe rijang meugisa  
Meunan neupeugah bak ayah laman  
Di nanggroe Yaman hana soe raja

Meunan neupeugah bak raja nanggroe  
Neuhareutoe wahe syeedara  
Bitpi hana lon peugang nanggroe  
Seureuta kamoe barang keurija

Meunan narit Banta seudang  
Uleebalang woe bak raja  
'Oh sare troh bak deelat syah  
Ka jipeugah miseue nyang ka

Abeh dumpeue jiriwayat  
Teuduek siat raja raja  
Putroe Falak lon hareutoe  
Jilakee droe heundak gisa

Idin kamoe adoe badan  
Heundak pulang dum barangna  
Banta Ali seuot meunoe  
Idin kamoe wahe cutda

Bitpi meunan cutda bungong  
Pakri keunong nibak cutda  
Ho rot kamoe woe u nanggroe  
Akhe dudoe jan lon gisa

Falak Antara hekeumat jibeuet  
Yoh nyan ka jeuet saboh guda  
Nyoe na adek saboh guda plang  
Jiteureubang dalam hawa

Ngon sikeujap troh u nanggroe  
Guda nyoe hekeumat raya  
Abeh narit pakat sampoe  
Bungka putroe Falak Antara

Sajan rakyat dum sinaroe  
Troh u nanggroe bandum rata  
Teutap raja lam meuligoe  
Sajan putroe Meulu Antara

Bri hukoman dalam nanggroe  
Ban laku proe dilee nyang ka  
Banta Ali sajan putroe  
Dalam nanggroe Sarah Indra

Rukuk sujud malam uroe  
Tuhan sidroe hana dua  
Gaseh Tuhan Rabbon Karim  
Ate taklem putroe ngon raja

Ureueng nanggroe ate gaseh  
Jitren keudeh ubak raja  
Banta Ali lam meuligoe  
Deungon putroe Meureudom Bunga

Keudeh keunoe neujak neuwoe  
Siuroe tujoh go gisa  
Tan deungon na hom he rakan  
Nyang tuban Allah Ta'ala

Bahkeu dumnan tamat kalam  
Karangan putroe ngon raja  
Uroe Ahad surat lon puphon  
Abeh suson malam Seulasa

Dua blah uroe buleuen Rajab  
Lon puphon surat mula-mula  
Jamadon Awai sudah tamat  
Watee he sahbat malam Seulasa

MINISTERI PERENCANAAN  
DIREKTORAT TEKNOLOGI  
INFORMASI DAN KOMUNIKASI  
JENJANG NASIONAL DEPKOP-AR





HIKAYAT GAJAH TUJUH ULEH



PN BALAI PUSTAKA — JAKARTA



Perpustakaan  
Jenderal Kel  
899.22  
RAM  
h